

ORE I MEXŮ GA CUÁŮ ŮMATŮXŮ

Tupana Nane rü duŷxŷãcü nangox

¹ Naxŷpa ga guxŷma, rü marŷ nayexma ga Tupana Nane. Rü Tupanamaã nayexma rü woetama Tupana nixĩ ga nümax. Nüma rü Tupanaãrŷ Ore nixĩ i naega erŷ tamaã nüxŷ nixu i Tupanachiga. ² Rü naxŷpa ga guxŷma rü nüma ga Tupana Nane rü naxŷtawatama nayexma. ³ Rü guma Nanexŷ nixĩ ga namuxŷ ga Tupana na naxŷãxŷcèx ga guxŷma. Rü nataxuma i ŷacü i ñuxma ngèxmaxŷ i tama nüma naxŷxŷ. ⁴ Rü Nanewa nixĩ i nangexmaxŷ i maxŷ. Rü ngema maxŷ rü guxŷ i duŷxŷgŷarŷ ngóonexèèruŷ nixĩ. ⁵ Rü yima Nane rü woo chixexŷ íporaxŷwa rü duŷxŷgŷxŷ nüxŷ nacuèxèè i Tupanachiga. Rü ngèma chixexŷ rü taxucü-rŷwama ngèma mexŷxŷ narŷyexera. ⁶⁻⁷ Rü nayexma ga wŷxi ga yatŷ ga Cuáŷ ga baiŷxèèruŷgu ãegacü. Rü guma nixĩ ga Tupana núma namucü na nüxŷ yaxuxŷcèx ga nachiga ga guma ngóonexèèruŷ na yemaãcü guxãma nüxŷ yaxôgŷxŷcèx. ⁸ Rü nüma ga Cuáŷ rü tama Tupana Nane ya duŷxŷgŷarŷ ngóonexèèruŷ nixĩ. Natŷrŷ nüma nixĩ ga Tupana núma namuxŷ na nüxŷ yaxuxŷcèx ga nachiga ga guma ngóonexèèruŷ. ⁹ Rü ñoma ga naãnewa nangu ya yima aixcŷma Tupana Nane ixĩcü i guxŷma i duŷxŷgŷxŷ ngóonetanŷxèècü. ¹⁰ Rü nüma ga guma Nane ga Tupanaãrŷ Ore ixĩcü rü ñoma

ga naãnewa nayexma. Rũ woo nagagu nixĩ ga naxũãxũ ga guxũma ga ñoma ga naãne, natürü ñoma ga naãne-cũãx ga duũxũgũ rü tama nüxũ nacuêxgũ na texe yĩxũ. ¹¹ Nuã norü naãnewatama nangu, natürü norü duũxũgũ ga Yudíugũ rü tama nanayauxgũ. ¹² Natürü guxema nayauxgũxe rü nüxũ yaxõgũxe rü tüxũ nanatauxchaxêê na Tupanaxãcũgũ tixĩgũxũ. ¹³ Rũ ñuxma rü Tupanaxãcũgũ tixĩgũ ga guxema yaxõgũxe. Natürü tama noxri tabuexũgagu nixĩ i ngẽma rü tama tümanatũgũarü ngũchaũgagu nixĩ. Natürü i ñuxma rü Tupanaxãcũgũ tixĩgũ ga guxema yaxõgũxe yerü nümatama ga Tupana rü naxãcũgũxũ tüxũ nixĩgũxêê. ¹⁴ Rũ nüma ya yima Nane ya Tupanaãrũ ore ixĩcũ rü duũxũãcũ nangox. Rũ totanüwa nayexma rü poraãcũ toxũ nangechaũ rü aixcũma nixĩ ga norü ore. Rũ toma nüxũ tadaugũ ga ñuxãcũ na naxũünexũ. Rũ Nanatũxũtawa nanayaxu ga yema üüne yerü nügũmaã nüxũ nawũxicèx ga nüma. ¹⁵ Rũ gumachigaxũ nixĩ ga yaxuxũ ga Cuáũ ga yexguma ñaxgu: —Daa nixĩ ga guma pemaã nüxũ chixuchigacũ ga yexguma ñachaxgu:

“Rũ yima choweama ne ücü rü choxũ rüyexeracũ nixĩ, yerü woetama marũ nayexma ga tauta chabuxgu ga chomax”, ñanagürü ga Cuáũ. ¹⁶ Rũ yima Tupana Nane rü namecũmaxũchi rü naxmẽxwa nangẽxma i guxũma. Rũ naxũtawa nixĩ i nayauxgũxũ i guxũma i ngũxêêgũ. ¹⁷ Rũ Moĩchẽxũ nixĩ ga namuxũ ga Tupana na tüxũ nangúexêêxũcèx ga yema norü mugũ. Natürü Ngechuchu ya Cristuxũ nixĩ ga namuxũ na tüxũ nangúexêêxũcèx na yigũ ingechaũgũxũ rü nagu

imaxēxūcèx i ore i aixcūma ixīxū. ¹⁸ Taguma texé ñuxgu nūxū tadau ga Tupana. Natürü Nane ya nügūmaã nūxū wūxicacū nixī ya tūxū nūxū cuèxēēcū. Rū yima Nane rü Tupanaxūchi nixī, rü Nanatūmaã wūxiwa nangēxmagū.

Cuáŭ ga baiŭxēēruŭ rü nūxū nixu ga Ngechuchu ya Cristuchiga

(Mt 3.11-12; Mr 1.7-8; Lc 3.15-17)

¹⁹ Rū yema Yudíugüarü ãēxgacügü ga Yerucharéüçüãx rü Cuáŭ ga baiŭxēēruŭxütawa nanamugü ga paigü rü Lebítanüxügü na nūxna yacagüexūcèx na texe yīixū. ²⁰ Rū nūma ga Cuáŭ rü meãma nügü nixu, rü ñanagürü: —Tama nixī i Cristu chiixū i chomax —ñanagürü. ²¹ Rū wenaxärü nūxna nacagü rü ñanagürügü: —¿Texé ēxna quixī? ¿Éxna cuma ga nuxcūmaücü ga Tupanaärü orearü uruŭ ga Eria quiixū? —ñanagürügü. Rū Cuáŭ nanangãxū rü ñanagürü: —Tama Eria chixī —ñanagürü. Rū nūmagü rü wenaxärü nūxna nacagüe rü ñanagürügü: —¿Éxna cuma quiixū ya yima orearü uruŭ ga Moiché nūxū ixucü ga ínguxchaücü? —ñanagürügü. Rū Cuáŭ nanangãxū rü ñanagürü: —Tama yima chixī —ñanagürü. ²² Rū yexguma ñanagürügüama: —¿Éxna texé quiixū? Erü tanaxwèxe i ngēma núma toxū mugüxūxütawa tanange i curü ngãxüga. ¿Rü ñuxū ñacuxū i ñuxma na texé quiixū? —ñanagürügü. ²³ Rū Cuáŭ nanangãxū rü ñanagürü nūxū: —Choma nixī i ngēma duŭxū i dauxchitawa i ngextá taxúema íxãpataxūwa tagaãcü ñachaxū:

“¡Rü nüxŭ perüxoe i pecüma i chixexŭ rü ipeyanawëxãchixëëx i perü maxŭ naxcèx ya Cori ya Tupana!” ñachaxŭ, guma nuxcümaŭcü ga orearü uruŭ ga Ichaxía nüxŭ ixuxŭrüŭ — ñanagŭrü. ²⁴⁻²⁵ Rü yexguma ga yema paigŭ rü Parichéugŭ yéma mugŭxŭ ga Cuáŭmaã na yanadexagŭxŭcèx rü wenaxãrŭ nüxna nacagŭe, rü ñanagŭrügŭ: —Rü ngëxguma tama Cristu quixŭgu, rü tama Ería quixŭgu, rü tama yima orearü uruŭ ya ínguxchaŭcü quixŭgu, ¿rü tüxcüŭ i duŭxŭgŭxŭ ícubaiŭxëëxŭ i ñuxmax? —ñanagŭrügŭ nüxŭ. ²⁶⁻²⁷ Rü Cuáŭ nanangãxŭ rü ñanagŭrü: —Choma rü dexáwamare íchanabaiŭxëë i duŭxŭgŭ. Natŭrü petanüwa nangëxma ya yima tama nüxŭ pecuácü ya choweama ne ũcü. Rü choma rü napëxewa rü taxuwama chame, rü bai i norü chapatucunügŭarŭ wëgŭwa chame —ñanagŭrü ga Cuáŭ. ²⁸ Rü yema nachica ga Betániãgu äegaxŭwa nixŭ ga Cuáŭ ga nüxŭ yaxuxŭ ga yema ore. Rü natŭ ga Yudáŭãrŭ tocutüwa nixŭ ga yema nachica ga ngextá Cuáŭ duŭxŭgŭxŭ íbaiŭxëëxŭwa.

Ngechuchu nixŭ ga Tupana núma namucü na duŭxŭgŭarŭ pecaducèx nayuxŭcèx

²⁹ Rü moxŭãcü ga Cuáŭ rü Ngechuchuxŭ nadau ga naxcèx na yaxŭxŭ. Rü ñanagŭrü ga Cuáŭ: —¡Rü dücax! Daa nixŭ ya yima Tupana núma namucü na nayuxŭcèx na ñoma i naãnecŭãx i duŭxŭgŭarŭ pecaduxŭ iyanaxoxëëxŭcèx. ³⁰—Rü choma rü daa Ngechuchuchigaxŭ nixŭ ga chixuxŭ ga yexguma ñachagu:

“Rü choweama ne naxŭ ya wüxi ya chorü yexeracü, yerü núma rü woetama nayexma ga

tauta chabuxgu ga chomax”, ñachagu. ³¹ —Rü chomatama ga noxri rü tama nüxũ chacuèx ga texe na yĩxũ ga nümax. Natürü núma chaxũ na dexáwamare duũxũgũxũ íchibaiũxêetanũxũcèx na tatanũxũ i Yudiugũ nüxũ cuèxgũxũcèx na texé yĩxũ —ñanagürü. ³² Rü ñanagürü ta ga Cuáũ: —Rü chomatama nüxũ chadau ga Tupanaãe ga Üünexũ ga yexguma wüxi ga muxtucurũ daxũwa ínaxexeegu rü Ngechuchuxũnegu yanawèxgux. ³³ —Choma rü noxri tama nüxũ chacuèx ga texe na yĩxũ ga nümax. Natürü ga Tupana ga choxũ mucü na dexáwamare duũxũgũxũ íchabaiũxêèxũcèx, rü ñanagürü choxũ:

“Rü yima nüxũ cudaucü ya chauãe i Üünexũ naetügu íruxexeecü, rü yima tá nixĩ ya chauãe i Üünexũ duũxũgũna nguxèècü”, ñanagürü choxũ. ³⁴ —Choma rü marü yima Ngechuchuxũ chadau rü pemaã nüxũ chixu na nüma rü aixcüma Tupana Nane yĩxũ —ñanagürü.

Nüxĩraũxũ ga norü ngúexũgü ga Ngechuchu

³⁵ Moxũãcü rü wenaxârü Cuáũmaã yema nachicawa tayexmagü ga toma ga taxre ga norü ngúexũgü. ³⁶ Rü yexguma Ngechuchuxũ nadèuxgu ga yéma na naxüpetũxũ, rü Cuáũ rü ñanagürü toxũ: —¡Dücèx! Yima nixĩ ya Tupana núma namucü na pecaducèx nayuxũcèx —ñanagürü. ³⁷ Rü toma ga Cuáũãrü ngúexũgü rü nüxũ taxĩnèe ga yexguma yema ñaxgu. Rü Ngechuchuwe tarũxĩ. ³⁸ Rü nügü ínidau ga Ngechuchu, rü toxũ nadau ga nawe na tarũxĩxũ. Rü toxna naca rü ñanagürü toxũ: —¿Tacücèx pedau? —ñanagürü. Rü tomagü rü ñatarũgũgü:

—Pa Ngúexêẽruũx, ¿ngexta nixĩ i cupexũ? —
ñatarügügü. ³⁹ Rũ Ngechuchu toxũ nangãxũ,
rũ ñanagürü toxũ: —¡Nuã chowe peruxĩ rũ
ípeyadèux! —ñanagürü. Rũ nawe taruxĩ, rũ nüxũ
tadaugü ga na ngexta napexũ. Rũ yexguma yéma
tangugügu, rũ marü ägümücüarü orawa nangu
ga na nayáuanexũ. Rũ yexma naxũtagu tarücho
rũ ñuxmata nachüta. ⁴⁰ Rũ choma chixĩ ga noxri
Cuáũ ga baiũxêẽruũxũ chaxĩnüxũ ga yixcama
Ngechuchuwe charüxũxũ. Rũ chomücü rũ Aũdré
nixĩ. Rũ nüma rũ Pedru ga Chimáũẽneẽ nixĩ. ⁴¹ Rũ
yexgumatama ga Aũdré, rũ naẽneẽ ga Chimáũcèx
nayadau. Rũ ñanagürü nüxũ: —Rũ marü nüxũ
itayangau ya yima Cristu ga nuxcüma Tupana
nüxũ unetacü —ñanagürü. ⁴² Rũ yemawena, rũ
Ngechuchu íyexmaxũwa Chimáũxũ naga ga Aũdré.
Rũ yexguma Ngechuchu Chimáũxũ dèuxgu, rũ
ñanagürü nüxũ: —Cuma nixĩ i Chimáũ i Cuáũ
nane quiixũ. Natürü i ñuxmawena rũ Nuta tá
nixĩ i cuéga —ñanagürü. Rũ ngẽma naega rũ Pedru
ñaxũchiga nixĩ.

Ngechuchu rũ naxcèx naca ga Piripi rũ Natanae

⁴³ Rũ moxũãcü ga Ngechuchu rũ nügü namexêẽ
na Gariréaanewa naxũxücèx. Rũ Piripixũ inayan-
gau rũ ñanagürü nüxũ: —¡Chowe rüxũ! —ñanagürü.
⁴⁴ Rũ nüma ga Piripi rũ ñãne ga Bechaídacũãx
nixĩ. Rũ yémacũãx ta nixĩ ga Aũdré rũ Pedru.
⁴⁵ Rũ Piripi rũ Natanaecèx nayadau, rũ ñanagürü
nüxũ: —Marü nüxũ itayangau ya yima Cristu
ga Moĩché nachiga naxümatücü ga mugüarü pop-
erawa, rũ nuxcümaũgüxũ ga Tupanaärü orearü
uruügü ta nachiga naxümatügücü. Yima nixĩ ya

Yúche nane ya Ngechuchu ya Nacharétucŷãx — ñanagürü. ⁴⁶ Rŷ ñanagürü ga Natanae: —¿Ñuxãcü i tacü rŷ mexŷ i Nacharétuwa ne naxŷxŷ? — ñanagürü. Rŷ Piripi nanangãxŷ, rŷ ñanagürü nüxŷ: —¡Dŷcèx, ngŷã rŷ Ítayadau! —ñanagürü. ⁴⁷ Rŷ yexguma Ngechuchu Natanaexŷ dèuxgu ga naxcèx na yaxŷxŷ, rŷ ñanagürü: —¡Dŷcèx! Yéa ne naxŷ i wŷxi i yatü i aixcüma Yudíu ixŷxŷ i aixcüma ngearü chixexŷãxŷ —ñanagürü. ⁴⁸ Rŷ yexguma ga Natanae rŷ Ngechuchuna naca, rŷ ñanagürü nüxŷ: —¿Ñuxãcü i choxŷ cucuáxŷ? — ñanagürü. Rŷ Ngechuchu nanangãxŷ rŷ ñanagürü nüxŷ: —Naxŷpa ga Piripi cuxcèx na yaçaxŷ, rŷ choma rŷ cuxŷ chadau ga yexguma orix ga igueratŷŷgu curŷxãŷxgux —ñanagürü. ⁴⁹ Rŷ Natanae nanangãxŷ rŷ ñanagürü nüxŷ: —Pa Ngúexêeruŷx, cuma rŷ Tupana Nane quixŷ. Rŷ cuma nixŷ i guxŷma i Yudíugŷarŷ Æëxgacü quiŷxŷ —ñanagürü. ⁵⁰ Rŷ Ngechuchu nanangãxŷ, rŷ ñanagürü nüxŷ: —Cuma rŷ choxŷ cuyaxõ erü cumaã nüxŷ chixu na igueratŷŷwa cuxŷ na chadauxŷ. Rŷ ngẽmacèxicatama nixŷ i cuyaxõxŷ. Natürü ngẽma ñuxma nüxŷ cudauxŷãrŷ yexera tá nixŷ i nüxŷ cudauxŷ i yixcüra —ñanagürü. ⁵¹ Rŷ ñanagürü ta ga Ngechuchu: —Rŷ aixcüma pemaã nüxŷ chixu rŷ tá nüxŷ pedaugü na yawãxnaxŷ i daxŷguxŷ i naãne. Rŷ tá nüxŷ pedaugü i Tupanaãrŷ orearŷ ngeruŷgü i daxŷcüãx i ngema daxŷ ïgŷxŷ rŷ írŷxŷgŷüxŷ i naetŷuwa ya Tupana Nane ya duŷxŷxŷ ixŷcü —ñanagürü.

Ngĩarũ peta ga ãne ga Canáwa üxũ ga Gariréaanewa

¹ Rũ yexguma marũ tomaẽxpũx ga ngunexũ Gariréaanearũ ãane ga Canáwa nayexmagu ga Ngechuchu, rũ nayexma ga wũxi ga ngĩarũ peta. Rũ yemawa ngxina naxugũ ga naẽ ga Ngechuchu. ² Rũ Ngechuchuna rũ toxna rũ ta naxugũe na yéma taxĩũcèx. ³ Rũ nagux ga norũ axexũ ga binu. Rũ Ngechuchu naẽ ngĩgürügũ nüxũ ga Ngechuchu: —Marũ nagúarũ binuãxgũ —ngĩgürügũ. ⁴ Natürũ Ngechuchu ngĩxũ nangãxũ, rũ ñanagürũ: —Pa Mamax, ¿tüxcüũ chomaã nüxũ quixu i ngẽma? Erũ tauta nawa nangu na chanaxũxũcèx i tacü rũ mexũ i Tupanaãrũ poramaã üxũ —ñanagürũ. ⁵ Natürũ ga ngĩma ga naẽ rũ ngĩgürügũ nüxũ ga yema baegũxũ namaã ga binuchiũ: —¡Penaxũx i guxũma i ngẽma nüma pemaã nüxũ yaxuxũ! —ngĩgürügũ. ⁶ Rũ yéma iyexma ga 6 ga tüxũ ga nutagüngĩxcèx. Rũ wũxichigũ ga yema tüxũwa rũ maneca yexma name ga 50 rũ ãxna 70 litrugũ ga dexá. Rũ yema tüxũgũ iyixĩ ga yema Yudiugũ ngĩxũ ixügũãcugücũ ga yexguma dexámaã nügũ yayauxmẽxgũchaũgu na Tupanacèx nügũ yamexẽegũxũcèx. ⁷ Rũ Ngechuchu rũ yema baegũxũxũ namu, rũ ñanagürũ: —¡Dexámaã ngĩxũ pixügũãcu i ñaã tüxũgũ! —ñanagürũ. Rũ nümagũ ga yema baegũxũ rũ meãma ngĩxũ nixügũãcu. ⁸ Rũ Ngechuchu ñanagürũ nüxũ: —Rũ ñuxma chanaxwèxe i íraxũ peyaxu, rũ petaarũ yoraxũtawa penange —ñanagürũ. Rũ yemaãcü nanaxügũ ga yema baegũxũ. ⁹ Rũ yema petaarũ yora nüxũ naxaxneta ga yema dexá ga binuxũ nacèxichixũ. Natürũ tama nüxũ nacuèx ga ngextá

na nayauxgũãxũ. Rũ yema baegũxũĩcatama nixĩ ga nũxũ cuèxgũxũ ga dexámare na yĩxũ ga noxrix. Rũ yexgumatama ga yema petaarũ yora rũ yema yatũ ga ingĩxũcèx naca. ¹⁰ Rũ ñanagũrũ nũxũ: —Guxũ i naãnewa rũ duũxũgũ rũ noxri rũ namaã nabae ya mecũ ya binu. Rũ ngẽxguma marũ meãma guxũma axegũgu i ngẽma nũxna naxuxũ, rũ ngẽmawena rũ nũxna nanaxã ya ngexcũrũcũmare ya binu. Natũrũ i cuma rũ marũ nagũxchaũgu i peta, rũ mexèchicũ ya binumaãtama cuyaxaxegũxẽẽ i duũxũgũ —ñanagũrũ. ¹¹ Rũ guma Gariréanewa yexmane ga ããne ga Canáwa nixĩ ga yema naxũxũ ga Ngechuchu. Rũ yema nixĩ ga nũĩraũxũ ga cuèxruũ ga Tupanaãrũ poramaã üxũ ga nawa nũgũ inawéxũ ga Tupana Nane na yĩxũ. Rũ toma ga norũ ngúexũgũ rũ nũxũ tayaxõgũ. ¹² Rũ yemawena rũ Capernáũ ga ããnewa naxũ ga Ngechuchu. Rũ naẽ rũ naẽneẽgũ rũ toma ga norũ ngúexũgũ rũ ta Ítayaxũmũcũgũ. Rũ yéma guma ããnewa tayexmagũ ga ñuxre ga ngunexũ.

*Ngechuchu rũ tupauca ga taxũnewa ínanawoxũ
ga yema duũxũgũ ga yéma taxegũxũ
(Mt 21.12-13; Mr 11.15-18; Lc 19.45-46)*

¹³ Rũ toma ga Yudiũgũ rũ marũ ningaica ga torũ peta ga Üpetũchiga. Rũ yemacèx ga Ngechuchu rũ Yerucharéũwa naxũ. ¹⁴ Rũ yexma tupauca ga taxũnegu nũxũ nayangau ga duũxũgũ ga yéma norũ wocagũmaã rũ carnerugũmaã rũ muxtucugũmaã taxegũxũ. Rũ yéma nũxũ nadau ta ga duũxũgũ ga norũ taxechicawa rütogũxũ rũ Tupanaarũ ãmarewa mexũ ga dĩerumaã yéma taxegũxũ. ¹⁵ Rũ yexguma yemaxũ nadèuxgu ga

Ngechuchu, rü nanaxü ga wüxi ga cúaixruŦ ga naxchëxmünaxcëx. Rü yemamaã tupauca ga taxünewa ínanawoxü ga yema duŦxügü guxüma ga norü carnerugümaã rü wocagümaã. Rü yema dïerucëx taxegüxüârü dïeru rü ngïxü narüwoŦ ñaxtüanegu. Rü norü mechagü rü ta nüxü nawoneta. ¹⁶ Rü yema muxtucugümaã taxegüxüxü ñanagürü: —¡Ipeyana i ngëma perü muxtucugü i nuã! Tama name i taxepataxü peyaxïxëë ya daa ChaunatuŦata —ñanagürü. ¹⁷ Rü yexguma ga toma ga norü ngüexügü rü nüxna tacuëxãchie ga nuxcümaŦxü ga ümatüxü ga ñaxü:

“DuŦxügü rü tá chauxchi naxaie erü chanachuxu i tacü i chixexü na naxügüxü i Tupanapatawa”,

ñaxü. ¹⁸ Rü yexguma ga yema ãëxgacügü rü Ngechuchuna nacagü, rü ñanagürügü: —¿Tacü rü cuëxruŦxü toxü cudauxëë na nawa nüxü tacuáxüçëx na aixcüma Tupana yïxü ya cuxü mucü na ícunawoxüxüçëx i ñaã duŦxügü i nuã? —ñanagürügü. ¹⁹ Rü Ngechuchu nanangãxü, rü ñanagürü: —¡Nagu pepogüe ya daa tupauca ya taxüne! Rü choma rü tomaëxpüx i ngunexügu rü tá wena íchanadaxëë —ñanagürü. ²⁰ Rü yexguma ga yema ãëxgacügü rü nanangãxügü, rü ñanagürügü: —Rü 46 ga taunecü nawa napuracüe ga duŦxügü na naxügüãxüçëx ga daa tupauca ya taxüne. ¿Rü ñuxãcü tá i cuma i tomaëxpüx i ngunexü tátama wena ícunadaxëëxü? —ñanagürügü. ²¹ Natürü guma Tupanapata ga Ngechuchu nachiga idexane rü naxünechigatama nixï. ²² Rü yemacëx ga toma ga norü ngüexügü, rü yexguma Ngechuchu yuwa írüdaxgu, rü nüxna tacuëxãchie ga yema

ore ga Ngechuchu nüxŭ ixuxŭ. Rŭ aixcŭma tayaxŭgŭ ga yema ore ga nüxŭ yaxuxŭ rŭ yema Tupanaärŭ ore ga nuxcŭmaŭgŭxŭ ga orearŭ uruŭgŭ Ngechuchuchigagu ũmatŭgŭxŭ.

Ngechuchu rŭ nüxŭ nacuèx i guxŭma i duŭxŭgŭ

²³ Rŭ yexguma Ngechuchu Üpetŭchigaarŭ petacèx Yerucharéŭwa yexmagu, rŭ muxŭma ga duŭxŭgŭ rŭ nüxŭ nayaxŭgŭ, yerŭ nüxŭ nadaugŭ ga yema taxŭ ga mexŭgŭ ga Tupanaärŭ poramaã naxŭxŭ. ²⁴ Natŭrŭ ga nüma ga Ngechuchu rŭ tama yema duŭxŭgŭmèxèwa nügŭ nayexmaxèèchaŭ, yerŭ woetama marŭ nüxŭ nacuèx ga ŭacŭgu na naxŭnŭèxŭ ga guxŭma ga yema duŭxŭgŭ. ²⁵ Rŭ yemacèx ga nüma rŭ taxucèxma texé namaã nüxŭ tixu na ŭacŭgu naxŭnŭèxŭ ga yema duŭxŭgŭ. Yerŭ nümatama marŭ nüxŭ nacuèx ga ŭacŭgu na naxŭnŭèxŭ ga naãèwa ga wŭxichigŭ.

3

Ngechuchuxŭtagu nanaxŭãne ga Nicodému

¹ Nayexma ga wŭxi ga Parichéu ga Nicodémugu ãegacŭ. Rŭ nüma rŭ wŭxi ga ãèxgacŭ ga nüxŭ nangechaŭgŭcŭ nixŭ ga Yudŭgŭtanŭwa. ² Rŭ guma Nicodému rŭ Ngechuchuxŭtagu nanaxŭãne ga chŭtacŭ. Rŭ ñanagŭrŭ Ngechuchuxŭ: —Pa Ngúexèèruŭx, toma nüxŭ tacuèx na aixcŭma Tupana núma cuxŭ muxŭ na toxŭ cungúexèèxŭcèx. Erŭ taxucŭrŭwa texé cuxrŭŭ tanaxŭ i ngèma taxŭ i mexŭgŭ i Tupanaärŭ poramaã ŭxŭ, ega tama Tupana tŭmaxŭtawa ngèxmagu—ñanagŭrŭ. ³ Rŭ Ngechuchu nanangãxŭ rŭ ñanagŭrŭ nüxŭ: —Aixcŭma cumaã nüxŭ

chixu, rü yíxema tama wenaxârü buxe rü taxucürüwama Tupana ãëxgacü íixîxüwa tangu —ñanagürü. ⁴ Rü Nicodému rü Ngechuchuna naca, rü ñanagürü nüxü: —¿Natürü ñuxácü i wüxi i yatü i marü yaxü i wena nabuxü? ¿Éxna wena naëânügu naxücuxü rü ngëmaácü wena nabuxü? —ñanagürü. ⁵ Rü Ngechuchu nanangãxü rü ñanagürü: —Rü aixcüma cumaã nüxü chixu rü yíxema tama nüxü rüxoxe i tümaârü pecadu rü tama Tupanaãë i Üünexüwa nayaxúxe i maxü i ngexwacaxüxü, rü taxucürüwama Tupana ãëxgacü íixîxüwa tichocu ⁶ —Yíxema duïxüwa buxe rü duïxütama tixî. Natürü yíxema Naãë i Üünexüwa nayaxúxe i maxü i ngexwacaxüxü, rü Tupanaxácü tixî. ⁷ —¡Tãütáma cubaixãchiãë na cumaã nüxü chixuxü na Tupana naxwëxexü na guxüma i duïxügü rü wena nabuexü! ⁸ —Ya buaneçü rü nüma ínanaxwëxexüwa nabu. Rü nüxü cuxînü i naga, natürü tama nüxü cucuëx na ngextáama ne naxüxü rü ngextáama na naxüxü. Rü ngëxgumarüü ta tixîgü ya guxãma ya yíxema Naãë i Üünexüwa nayaxúxe i maxü i ngexwacaxüxü —ñanagürü. ⁹ Rü Nicodému wenaxârü Ngechuchuna naca, rü ñanagürü: —¿Natürü ñuxácü nixî i ngëma? —ñanagürü. ¹⁰ Rü Ngechuchu nanangãxü, rü ñanagürü nüxü: —Cuma rü Yudíugüarü ngúexëëruü i nüxü cuáxü quixî. ¿Rü ñuxácü chi i cuma i tama nüxü cucuáxü i ngëma? ¹¹ —Aixcüma cumaã nüxü chixu rü toma rü namaã tidexagü i ngëma nüxü tacuáxü. Rü norü uruü tixîgü i ngëma nüxü tadaugüxü. Natürü pema rü tama toxü peyaxögü i ngëma pemaã nüxü

tixuxŦ. ¹²—RŦ űuxma na tama choxŦ peyaxŦgŦxŦ i ngema pemaã nŦxŦ chixuxŦ i űoma i naãneãrŦ ngẽmaxŦchiga, rŦ űuxãcŦ tá peyaxŦgŦxŦ ega pemaã nŦxŦ chixuxgu i daxŦgŦxŦ i naãneãrŦ ngẽmaxŦchiga? ¹³—Taguma texé daxŦgŦxŦ i naãnewa taxŦ. NatŦrŦ i choma i Tupana Nane na duŦxŦxŦ chiŦxŦ, rŦ chaxicatama niŦi i ngema ne chaxŦxŦ rŦ ngema tá chaxŦxŦ. ¹⁴⁻¹⁵—Pema nŦxŦ pecuex ga űuxãcŦ nuxcŦmaxŦchima yema nachica ga ngextá taxúema íxãpataxŦwa, rŦ Moíché wŦxi ga naígu nanaxŦnagŦ ga yema ãxtape ga dŦerumŦnaxcèx. RŦ ngẽxgumarŦŦ tá ta i choma i Tupana Nane i duŦxŦxŦ chiŦxŦ, rŦ wŦxi i naígu tá choxŦ naxŦnagŦgŦ i duŦxŦgŦ na guxãma ya texé ya choxŦ yaxŦgŦxe rŦ tŦxŦ nangẽxmaxŦcèx i maxŦ i taguma gúxŦ.

Tupana rŦ poraãcŦ nŦxŦ nangechaŦ i űoma i naãnecŦãx

¹⁶—RŦ Tupana rŦ poraãcŦ nŦxŦ nangechaŦ i űoma i naãnecŦãx i duŦxŦgŦ. RŦ yemacèx inanamu ga Nane ga nŦgŦmaã wŦxicacŦ na guxãma ya texé ya nŦxŦ yaxŦgŦxe rŦ tama itarŦtauxexŦcèx rŦ tŦxŦ nangẽxmaxŦcèx i maxŦ i taguma gúxŦ. ¹⁷—YerŦ ga Tupana rŦ tama űoma ga naãnewa nanamu ga Nane na duŦxŦgŦmaã naxueguãxŦcèx na napoxcuexŦ. NatŦrŦ núma nanamu na namaxẽxẽãxŦcèx i duŦxŦgŦ. ¹⁸—RŦ yíxema Tupana NaneãxŦ yaxŦxẽ, rŦ Tupana rŦ tama tŦmamaã nanaxuegu na tapoxcuxŦ. NatŦrŦ yíxema tama nŦxŦ yaxŦxẽ, rŦ marŦ tŦmamaã nanaxuegu na tapoxcuxŦ, erŦ tama nŦxŦ tayaxŦ ya yima Tupana Nane ya nŦgŦmaã wŦxicacŦ.

19 —Rü yíxema tama nüxŭ yaxōgŭxe, rŭ Tupana rŭ marŭ tŭmamaã nanaxuegu na tapoxcuexŭ. Yerŭ yexguma ñoma ga naãnewa nanguxgu ga Tupana Nane ya duŭxŭgŭarŭ ngóonexēeruŭ, rŭ tama nawe tarŭxŭchaŭ. Natŭrŭ yexera tŭmaãrŭ me nixŭ ga ēãnexŭwaama na tayexmagŭxŭ, yerŭ chixexŭ taxŭgŭ. 20 —Guxãma ya yíxema chixexŭ ŭgŭxe rŭ naxchi taxaie i ngóonexŭ. Rŭ tama nüxna tangaicamagŭchaŭ erŭ tama tanaxwèxe na nangóxŭ i ngēma chixexŭ i ítaxŭgŭxŭ. 21 —Natŭrŭ yíxema aixcŭma Tupanaãrŭ ore nüxŭ ixuxŭãcŭma meã maxēxē rŭ nüxna tangaicama i ngēma ngóonexŭ. Rŭ ngēmaãcŭ tanaxŭ na meã nangóxŭcèx na Tupanaãrŭ ngŭchaŭãcŭma na yŭixŭ i guxŭma i ngēma taxŭgŭxŭ —ñanagŭrŭ.

Cuáŭ ga baiŭxēeruŭ rŭ wenaxãrŭ nüxŭ nixu ga Ngechuchucha

22 Rŭ yemawena rŭ tomaã Yudéaanewa naxŭ ga Ngechuchu. Rŭ ñuxre ga ngunexŭ tomaã yéma nayexma rŭ yéma duŭxŭgŭxŭ ítabaiŭxēēgŭ. 23 Rŭ Cuáŭ ga baiŭxēeruŭ rŭ Enóãrŭ iãnewa ga Charíarŭ ngaicamana rŭ ínanabaiŭxēē ta ga duŭxŭgŭ yerŭ yéma nayexma ga taxŭ ga dexá. Rŭ yema yéma íngugŭetanŭxŭ ga duŭxŭgŭ, rŭ Cuáŭ ínayabaiŭxēētanŭ. 24 Rŭ yemaãcŭ nangu-petŭ naxŭpa ga na poxcupataŭgu yatèxcuchixŭ ga Cuáŭ. 25 Rŭ yexguma rŭ ñuxre ga norŭ ngúexŭgŭ ga Cuáŭ, rŭ wŭxi ga Yudíumaã ni-poragatanŭcŭŭ nachiga ga nacŭmagŭ na ñuxãcŭ namexŭ na Tupanacèx nügŭ yamexēēgŭxŭ ga duŭxŭgŭ. 26 Rŭ Cuáŭmaã nüxŭ nayarŭxugŭe, rŭ ñanagŭrŭgŭ: —Pa Ngúexēeruŭx, dŭcax guma yatŭ

ga tomaã nüxŭ quixucü rü cumaã yexmacü ga natü i Yudaŭŭrŭ tocutüwa, rü yima rü ñuxma rü duŭxŭgŭxŭ ínbaiŭxëë, rü guxŭma i duŭxŭgŭ rü nawe narüxí—ñanagŭrŭgŭ. ²⁷ Rŭ Cuáŭ nanangãxŭ rü ñanagŭrŭ nüxŭ: —Taxúema tacü tŭxŭ nangëxma ega Tupana tama tŭxna naxãxgu. ²⁸ —Pematama rü marŭ choxŭ pexĩnüë ga yexguma ñachagu:

“Choma rü tama Cristu chixí. Natŭrŭ choma chixí i Tupana yima Cristupëxegu choxŭ imuxŭ na nüxŭ chixuxŭcèx i nachiga”, ñachagu. ²⁹ —Rŭ wŭxi i ngŭgŭwa rü yima yatü ya ingŭcŭ rü naxmèxãrŭ yora nixí. Rŭ yima yatŭmŭcŭ i naxŭtawa ngëxmaxŭ rü nüxŭ inarŭxĩnü i norŭ ore. Rŭ nataãë i ngëxguma nüxŭ naxĩnügu i ngëma na yadexaxŭ. Rŭ ngëxgumarŭŭ i choma rü aixcŭma Cristumaã chataãëxŭchi i ñuxmax. ³⁰ —Nŭma rü tá nixĩnagŭchigŭ na ãëxgacŭ yŭxŭ, natŭrŭ i choma rü tá ícharŭxŭchigŭ.

Yima daxŭwa ne ŭxcŭchiga

³¹ —Rŭ yima Cristu ya daxŭwa ne ŭxcŭ rü guxãetüwa nangëxma. Natŭrŭ i choma rü ñoma i naãnewa changëxma, rü ñoma i naãnecŭãx chixí, rü ngëma ñoma i naãnewa ngëxmaxŭchigaxŭ chixu. Natŭrŭ i nŭma ya Cristu ya daxŭwa ne ŭxcŭ, rü guxãetüwa nangëxma. ³² —Rŭ nŭma rü tamaã nüxŭ nixuchiga ga yema nüxŭ nadauxŭ rü nüxŭ naxĩnüxŭ. Natŭrŭ noxretama nüxŭ nayaxŭgŭ i ngëma nüxŭ yaxuxŭ. ³³ —Natŭrŭ ngëxguma texé nüxŭ yaxŭxgu i norŭ ore, rü ngëmaãcŭ tanangoxëë na aixcŭma yŭxŭ i ngëma Tupana nüxŭ ixuxŭ. ³⁴ —Rŭ yima Tupana núma namucŭ, rü Tupanaãrŭ orexŭ nixu. Erŭ Tupana rü nüxna nanamu i Naãë i

Üünexŭ na guxŭguma naxŭtawa nangĕxmaxŭcèx.
³⁵ —Rŭ Tanatŭ ya Tupana rŭ Nanexŭ nangechaŭ.
 Rŭ ngĕmacèx marŭ naxmĕxwa nanangĕxmaxĕĕ
 i guxŭma i tacŭ i ngĕxmaxŭ. ³⁶ —Rŭ yixema
 Tupana Naneãxŭ yaxŏxĕ rŭ tŭxŭ nangĕxma i
 maxŭ i taguma gúxŭ. Natŭrŭ yixema tama nŭxŭ
 yaxŏxchaŭxĕ ya Tupana Nane, rŭ tãŭtãma tŭxŭ
 nangĕxma i ngĕma maxŭ i taguma gúxŭ. Natŭrŭ
 tá tanayaxu i ngĕma ãŭcŭmaxŭ i poxcu i Tupana
 tá namaã tŭxŭ poxcuxŭ —ñanagŭrŭ ga Cuãŭ ga
 baiŭxĕĕruŭ.

4

Ngechuchu rŭ Chamáriaanecŭãx ga ngecŭ

¹ Rŭ Parichéugŭ rŭ nŭxŭ nacuáchigagŭ
 ga Ngechuchu rŭ Cuãŭãrŭ yexera nŭxŭ na
 nayexmaxŭ ga norŭ ngúexŭgŭ, rŭ norŭ yexera
 duŭxŭgŭxŭ na ínabaiŭxĕĕxŭ. ² Natŭrŭ tama
 Ngechuchu nixĭ ga ínabaiŭxĕĕcŭ ga duŭxŭgŭ.
 Rŭ toma ga norŭ ngúexŭgŭ tixĭ ga tanaxŭxŭ ga
 yema. ³ Rŭ yexguma Ngechuchu nŭxŭ ñnŭgu ga
 Parichéugŭ rŭ nachigagu na yadexagŭxŭ, rŭ yéma
 Yudéaanewa ítachoxŭ na Gariréaanecèx tawoeguxŭ.
⁴ Natŭrŭ ga yema nama ga nagu tawoeguxŭ rŭ
 Chamáriaanewa nadapetŭ. ⁵ Rŭ yemacèx ga toma
 rŭ nawa tangugŭ ga wŭxi ga Chamáriaaneãrŭ
 ñãne ga Chicaru. Rŭ guma ñãneãrŭ ngaicamana
 nayexma ga yema naãne ga nuxcŭmaŭcŭ ga
 Acobuaxŭ yexmaxŭ rŭ yixcama rŭ nane ga
 Yúchena naxãxŭ. ⁶ Rŭ yéma nayexma ga wŭxi
 ga puchu ga duŭxŭgŭ dexácèx ixaixmaŭgŭcŭ ga
 Acobuarŭ Puchugu ãĕgacŭ. Rŭ poraãcŭ nipa ga

Ngechuchu ga namagu na yaxũxũ. Rũ yemacèx guma puchuxũtawa nayarũtoõchi. Rũ tocuchiwa nanguxchaũ ga yexguma. ⁷⁻⁸ Rũ toma ga norũ ngũexũgũ rũ guma ãanewa taxĩ na torũ õnacèx tayataxegũxũcèx. Rũ towena yéma ingu ga wũxi ga ngecũ ga Chamáriaanecũãx ga guma puchuwa dexáwa ũcũ. Rũ Ngechuchu rũ ñanagürũ ngĩxũ: —¡Íraxũ i dexá choxna naxã! —ñanagürũ. ⁹ Natürũ ga yema nge rũ ãaixãchiãẽ yerũ ga Yudíugũ rũ Chamáriaanecũãxgũmaã nũgũchi naxaie rũ yemacèx ga yema nge rũ inangãxũ rũ ngĩgürũgũ nũxũ: —¿Ñuxãcü i cuma na Yudíu quiĩxũ i dexácèx choxna cuçaxũ i choma na Chamáriaanecũãx chiĩxũ? —ngĩgürũgũ. ¹⁰ Rũ Ngechuchu ngĩxũ nangãxũ, rũ ñanagürũ: —Ngẽxguma chi nũxũ cucuèxgu i ngẽma mexũ i Tupana cuxna ãxchaũxũ, rũ chi nũxũ cucuèxgu na texé yĩxũ ya yima dexá cuxna taçacũ, rũ cuma rũ chi nũxnata cuca i dexá i maxũ nawa ngẽxmaxũ rũ nũma rũ chi cuxna nanaxã i ngẽma dexá —ñanagürũ. ¹¹ Rũ yema ngecũ inangãxũ, rũ ngĩgürũgũ nũxũ: — Pa Corix, ¿ñuxãcü tá i dexáta cuyaxu? Erũ daa puchu rũ namátamaxũchi rũ cuxũ nataxuma na ãacũmaã cunayaxuxũcèx i dexá. ¿Rũ ngextá tá i cunayaxuxũ i ngẽma dexá i maxũ nawa ngẽxmaxũ na choxna cunaxãxũcèx? ¹² —Nuxcũmaũcü ga tórũ õxi ga Acobu toxçèx núma Chamáriaanewa nanatèx ga daa puchu. Rũ gumawa nixĩ ga naxaxexũ ga nũma rũ nanegũ rũ norũ wocagũ. ¿Rũ ñuxãcü chi i cuma i norũ yexera quiĩxũ? — ngĩgürũgũ. ¹³ Rũ Ngechuchu ngĩxũ nangãxũ, rũ ñanagürũ: —Rũ guxãma ya texé ya daa pucharũ

dexáwa axexe, rü wena táxarü tiṭawae. ¹⁴—Natürü texé ya yíxema choma tüxna chaxãxũ i dexáwa axexe, rü tagutáma wena tiṭawa. Erü ngẽma dexá i choma tüxna chaxãxũ rü wüxi ya puchu ya guxũguma ibalbecürüũ tá nixĩ i tũmawa, erü ngẽma dexáwa nangẽxma i maxũ i taguma gúxũ —ñanagürü. ¹⁵Rü ngĩma ga yema nge rü inangãxũ rü ngĩgürügü: —Pa Corix, ꞑchoxna naxã i ngẽma dexá na taguma wena chiṭawaxüçèx, rü taguma wena daa puchuwa dexáwa chaxũxüçèx! —ngĩgürügü. ¹⁶Rü Ngechuchu ñanagürü ngĩxũ: —ꞑíyadau ya cute, rü naxcèx yaca, rü nuã pexĩ! —ñanagürü. ¹⁷Rü yema ngecü rü inangãxũ, rü ngĩgürügü nüxũ: —Nataxuma ya chaute —ngĩgürügü. Rü Ngechuchu ñanagürü ngĩxũ: —Aixcüma nixĩ i ngẽma nüxũ quixuxũ na nataxuũma ya cute. ¹⁸—Yerü wüximẽẽxpüxchirẽx nixĩ ga cute, rü yima ñuxma cuxũtawa ngẽxmacü rü tama aixcüma cutexüchi nixĩ. Rü ngẽmacèx aixcüma nixĩ i curü ore i chomaã nüxũ quixuxũ —ñanagürü. ¹⁹Rü yexguma yemaxũ naxĩnügu ga yema ngecü, rü ngĩgürügü: —Pa Corix, nüxũ chicuèxãchi rü cuma rü wüxi i Tupanaãrü orearü uruũ quixĩ. ²⁰—Nuxcümaũgüxũ ga torü oxigü ga Chamáriaanecũãxgü rü daa mëxpüne ga Garachíũwa Tupanaxũ nicuèxüügü. Natürü i pema i Yudiugü rü ñaperügü:

“Rü Yerucharéũ nixĩ i nachica i mexũ i ngextá Tupanaxũ ticuèxüügü”, ñaperügü. ²¹⁻²² Rü Ngechuchu ngĩxũ nangãxũ rü ñanagürü: —Pema i Chamáriaanecũãxgü rü tama aixcüma nüxũ pecuèxgü ya yima nüxũ picuèxüügü. Natürü

toma i Yudíugü rü aixcüma nüxŦ tacuèx ya yima nüxŦ ticuèxüŦgücü, erü Yudíugügagu nixĩ i Tupana namaxêxêxŦ i guxŦma i duŦxŦgü. ¡ChoxŦ yaxŦ, Pa NgecŦx! Rü aixcüma ínangu tá i ngunexŦ na tãŦtãma daa mèxpŦnewa rü êxna YerucharéŦwa tá nüxŦ na picuèxüŦgüxŦ ya Tanatü ya Tupana. ²³ —Erü yíxema aixcüma TupanaxŦ icuèxüŦgüxe rü nüetama nixĩ i ngêxŦrŦüxŦmare i nachicawa TupanaxŦ ticuèxüŦgü. Erü ñŦxma rü ngêma Naãê i ÜünexŦ naxwèxexŦ nixĩ na guxŦma i tŦmaãemaã rü tŦmaãrŦ maxŦmaã aixcüma TupanaxŦ ticuèxüŦgüxŦ. Rü ngêmaãcü nixĩ i nanaxwèxexŦ ya Tanatü na nüxŦ ticuèxüŦgüxŦ. ²⁴ —Erü Tupana rü wŦxi i Naãê nixĩ. Rü ngêmacèx yíxema texé ya nüxŦ icuèxüŦgüxe rü tanaxwèxe i guxŦma i tŦmaãemaã rü tŦmaãrŦ maxŦmaã na aixcüma nüxŦ ticuèxüŦgüxŦ, ngêma Naãê i ÜünexŦ naxwèxexŦãcüma —ñanagŦrŦ. ²⁵ Rü yema ngecü inangãxŦ rü ngĩgŦrŦgü: —Choma nüxŦ chacuèx rü tá ñoma i naãnewa nangu ya yima Cristu ya Tupana nüxŦ unetacü. Rü ngêxguma yima núma ũxgu rü tá tamaã nanangoxêê i guxŦma i Tupanachiga —ngĩgŦrŦgü. ²⁶ Rü Ngechuchu rü ñanagŦrŦ ngĩxŦ: —Choma na cumaã chidexaxŦ, rü yima chixĩ —ñanagŦrŦ. ²⁷ Rü yexguma íyadexayane rü ítangugü ga toma ga norü ngúexŦgü. Rü tabaixãchiãêgü yerü ga Ngechuchu rü wŦxi ga ngecümaã ínindexa. NatŦrŦ taxúema ga toma rü togü taporaxêê ga nüxna na tacagŦxŦ ga tacü ngĩmaã na nanaxwèxexŦ rü tacŦchiga yŦxŦ ga ngĩmaã na íyadexaxŦ. ²⁸ Rü yexguma ga yema ngecü rü yéma ngĩxŦ itèx ga ngĩrŦ tŦxŦ. Rü ñãnewa ixŦ na

duŭxŭgŭmaã nüxŭ yanaxuxŭcèx. ²⁹ Rŭ ngŭgŭrŭgŭ: —¡Ngŭĩxã rŭ Ítayadaugŭ i wŭxi i yatŭ i chomaã nüxŭ ixuxŭ ga guxŭma ga tacŭ ga chaxŭxŭ! ¿Taux êxna yima yŭxŭ ya Cristu? —ngŭgŭrŭgŭ. ³⁰ Rŭ inaxŭĩachi ga yema ñanecŭãx, rŭ Ngechuchu Íyexmaxŭwa naxŭ. ³¹ Rŭ yoxni ga toma ga norŭ ngúexŭgŭ rŭ Ngechuchuxŭ tachixewegŭ na nachibŭxŭcèx. ³² Natŭrŭ ga nüma rŭ ñanagŭrŭ toxŭ: —Choma rŭ choxŭ nangêxma i chowemŭ i pema tama nüxŭ pecuáxŭ —ñanagŭrŭ. ³³ Rŭ yexguma ga toma ga norŭ ngúexŭgŭ rŭ togŭna tacagŭe, rŭ ñatarŭgŭgŭ: —Bexmana marŭ ¿texé nuã tanange i nawemŭ? —ñatarŭgŭgŭ. ³⁴ Natŭrŭ ga Ngechuchu rŭ ñanagŭrŭ toxŭ: —Ngêma õna i choxŭ poraxêexŭ nixŭ na chanaxŭxŭ i norŭ ngúchaŭ ya yima nuã choxŭ mucŭ ya Chaunatŭ, rŭ na chayanguxêexŭ i norŭ puracŭ. ³⁵ —Rŭ pema rŭ ñaperŭgŭgŭ:

“Rŭ ãgŭmŭcŭ ya tauemacŭ nataxu na yabuxgŭxŭ i trigu”, ñaperŭgŭgŭ. Natŭrŭ i choma rŭ ñacharŭgŭ pexŭ:

“¡Dŭcèx, rŭ meã penangugŭ i duŭxŭgŭ! Erŭ marŭ Ínamegŭ na Tupanaxŭ nayauxgŭxŭcèx, ngêxgumarŭŭ i wŭxi i trigunecŭ i marŭ nawa nanguxŭ na yabuxgŭxŭ erŭ marŭ nidau”. ³⁶ —Rŭ yŭxema Tupanacèx nadexe i duŭxŭgŭ rŭ tá tanayaxu i tŭmaãrŭ natanŭ. Rŭ guxŭma i ngêma duŭxŭgŭ i tŭxŭ irŭxŭñŭexŭ rŭ tá nanayauxgŭ i maxŭ i taguma gúxŭ. Rŭ ngêmaãcŭ rŭ wŭxigu tá tataãgŭ ya yŭxema tŭxira ngêma duŭxŭgŭmaã Tupanaãrŭ orexŭ ixuxe rŭ yŭxema yixcama ngêma duŭxŭgŭxŭ Tupanacèx dexe. ³⁷ —Rŭ aixcŭma nixŭ i ngêma ore i ñaxŭ:

“Wüxie tixĩ ya namaã toexe i trigu rü togue tixĩ ya yíxema yabuxgüxe i norü o”, ñaxũ. [Rü ngẽxgumarüũ rü wüxie tixĩ ya tüxira duũxügümaã nüxũ ixuxe i Tupanaãrũ ore, rü togue tixĩ ya yixcama ngẽma duũxügüxũ dexe Tupanacèx.] ³⁸ — Rü noxri rü togü nixĩ ga duũxügümaã nüxũ ixuxũ ga Tupanaãrũ ore, natürü ga duũxügü rü tama nayaxõgü ga yexguma. Rü yemawena rü pexũ chamu na yema duũxügümaã nüxũ pixuxücèx ga yema ore. Rü pema nixĩ ga yema duũxügüxũ pedexũ Tupanacèx, yerü nayaxõgü ga yexguma namaã nüxũ pixuxgu ga yema ore. Rü yemaãcü ga pema rü marü peyoxniẽ nawa ga togüarü puracü —ñanagürü. ³⁹ Rü muxüma ga guma Chamáriaanewa yexmane ga ñanecũãx rü Ngechuchuaxũ nayaxõgü, yerü nüxũ nayaxõgü ga yema ore ga yema ngecü namaã nüxũ ixuxũ ga yexguma ngĩxgu:

“Guxüma ga tacü ga ũpa chaxüxũ rü chomaã nüxũ nixu” ngĩxgu. ⁴⁰ Rü yemacèx ga yema Chamáriaanecũãxgü rü yexguma Ngechuchuxütawa nangugügu rü nüxũ nacèèxügü ga yexma natanügu na naxãũxücèx. Rü taxre ga ngunexũ yexma natanügu narüxãũx ga Ngechuchu. ⁴¹ Rü muxüma ga togüamachigü ga Chamáriaanecũãxgü rü Ngechuchuaxũ nayaxõgü ga yexguma nüxũ naxĩnüëgu ga yema norü ore ga nümatama nüxũ yaxuxũ. ⁴² Rü yexguma ga yema duũxügü rü ñanagürügü ngĩxũ ga yema ngecü: —Ñuxma waxi nixĩ i aixcüma nüxũ tayaxõgüxũ erü tomatama nüxũ taxĩnüë i ngẽma norü ore i tomaã nüxũ yaxuxũ. Rü ngẽmawa nüxũ tacuèx na

aixcūma yima yīxŭ ya Cristu ya ñoma i nañecŭāx i duŭxŭgŭarŭ maxēxēruŭ. Rŭ tama ngēma cuma tomaã nŭxŭ quixuxŭcèxicatama tayaxōgŭ —ñanagŭrŭgŭ.

Ngechuchu rŭ nanamexē ga wŭxi ga āēxgacŭ nane

⁴³ Rŭ taxre ga ngunexŭguwena ga Ngechuchu rŭ tomaã inaxŭāchi ga Chamáriaanewa na Gariréaanewa naxŭxŭcèx. ⁴⁴ Rŭ nŭmatama ga Ngechuchu ga ŭpaacŭ rŭ ñanagŭrŭ: —Wŭxi i Tupanaārŭ orearŭ uruŭ, rŭ norŭ nañewatama i duŭxŭgŭ rŭ tama meã nanayauxgŭ —ñanagŭrŭ. ⁴⁵ Natŭrŭ yexguma Gariréaanewa tangugŭgu, rŭ yema nañecŭāx ga duŭxŭgŭ rŭ meãma nanayauxgŭ. Yerŭ nŭmagŭ ga yema nañecŭāxgŭ rŭ Yerucharéŭwa naxī ta naxcèx ga Ūpetŭchigaarŭ peta, rŭ yéma nŭxŭ nadaugŭ ga yema taxŭ ga mexŭgŭ ga Tupanaārŭ poramaã naxŭxŭ ga Ngechuchu ga yexguma. ⁴⁶ Rŭ ga Ngechuchu rŭ tomaã nataegu naxcèx ga guma ñāne ga Caná ga Gariréaanewa yexmane. Rŭ guma ñānewa nixī ga binuxŭ nanguxuchixēēāxŭ ga dexá. Rŭ ñāne ga Capernáŭwa nayexma ga wŭxi ga tacŭ ga āēxgacŭ, rŭ nidaawe ga wŭxi ga nane. ⁴⁷ Rŭ yexguma guma āēxgacŭ nŭxŭ cuáchigagu ga Ngechuchu rŭ Gariréaanewa na nanguxŭ ga Yudéaanewa na ne naxŭxŭ, rŭ naxŭtawa naxŭ. Rŭ nŭxŭ nayacéèxŭ na napatawa naxŭxŭcèx, rŭ naxcèx na yanataanexēēāxŭcèx ga guma nane ga marŭ turaxŭchicŭ. ⁴⁸ Rŭ Ngechuchu nanangāxŭ, rŭ ñanagŭrŭ nŭxŭ: —Pema rŭ tama peyaxōgŭ ega tama nŭxŭ pedauxiragu i taxŭ i cuèxruŭgŭ i

Tupanaãrũ poramaã üxũ —ñanagürũ. ⁴⁹ Natürũ ga guma ãëxgacũ rü ñanagürũ nüxũ: —Pa Corix, ipaxa chowe rüxũ naxũpa na nayuxũ ya chaune! —ñanagürũ. ⁵⁰ Rũ Ngechuchu nanangãxũ rü ñanagürũ nüxũ: —¡Nataegu i cupatawa! Erũ cune rü marũ naxcèx nitaane —ñanagürũ. Rũ guma yatũ rü nayaxõ ga yema ore ga Ngechuchu namaã nüxũ ixuxũ. Rũ napatacèx nataegu. ⁵¹ Rũ yexguma napatawa nanguxchaũgu ga guma ãëxgacũ, rü norũ duũxũgũ napëxegu nayayi, rü ñanagürũgũ nüxũ: —Cune rü marũ naxcèx nitaane —ñanagürũgũ. ⁵² Rũ yexguma rü norũ duũxũgũna naca, rü ñanagürũ nüxũ: —¿Tacũ rü oragu inaxũgũxũ na naxcèx yataanexũ? —ñanagürũ. Rũ yema norũ duũxũgũ nanangãxũ rü ñanagürũgũ: —Ñe tocuchiguwena nixĩ ga nüxũ nangupetũxũ ga na yaxaxünexũ —ñanagürũgũ. ⁵³ Rũ guma bucũ nanatũ rü nüxna nacuèxãchi ga yema oragu na yĩxũ ga Ngechuchu ga ñaxũ nüxũ: “Cune rü marũ naxcèx nitaane” ñaxũ. Rũ nüma ga guma ãëxgacũ rü guxũma ga napatacũãx rü Ngechuchuaxũ nayaxõgũ. ⁵⁴ Rũ yexguma Yudéaanewa ne naxũxgu ga Ngechuchu, rü yema nixĩ ga norũ taxre ga cuèxruũ ga taxũ ga Tupanaãrũ poramaã duũxũgũxũ nawéxũ ga Gariréaanewa.

5

Ngechuchu rü nanamexëë ga wüxi ga yatũ ga idaawexũ ga Betchawa yexmaxũ

¹ Rũ ñuxre ga ngunexũgũ ngupetũguwena rü nayexma ga wüxi ga peta ga Yudũgũ auregũxũ na yemaãcũ Tupanaxũ yacuèxũgũxũcèx. Rũ

yemacèx ga Ngechuchu rü Yerucharéŭcèx nataegu. ² Rü guma ìãneãrũ poxeguxũ rü nüxũ nayexma ga wüxi ga ìãx ga Carneruarũ Choxũchicagu ãegaxũ. Rü yema ìãxãrũ ngaicamana nayexma ga wüxi ga puchu ga Yudíugügawa Betechagu ãegaxũ. Rü guma puchuanacüwa nayexma ga wüximẽexpũx ga chopetũchica ga ãxpataũetũgũxũ. ³ Rü yema chopetũchicagu nacagũ ga muxũma ga duũxũgũ ga idaaweexũ. Rü nümaxũ rü nangexetũgũ, rü togũ rü nachixeparagũ, rü togũ rü nanawãixãchigũ. Rü yema idaaweexũ rü yéma nananguxẽegũ ga guma puchu ga na naxĩãxãchichiũxũcèx. ⁴ Yerũ ñuxguacũ rü guma puchugu ìnarũxĩxũ ga wüxi ga daxũcũãx ga Tupanaãrũ orearũ ngeruũ, rü nayaxĩãxchiücũxũẽexũ. Rü guxema tũxira tũgũ yéma táexe nachiüwa ga guma puchu ga yexguma yaxĩãxchiücũügu, rü tũmacèx nitaane woo ga ngẽxũrũũmare ga daawe tũxũ yexmaxẽ. ⁵ Rü yéma natanüwa nayexma ga wüxi ga yatũ ga marũ 38 ga taunecũ idaawecũ. ⁶ Rü yexguma Ngechuchu nüxũ dèuxgu ga guma yatũ ga yexma na nacaxũ, rü nüxũ nacuáchiga ga marũ mucüma ga taunecũ na yadaawexũ. Rü yemacèx nüxna naca rü ñanagürũ nüxũ: —¿Cunaxwèxexũ i cuxcèx na yataanexũ? — ñanagürũ. ⁷ Rü Ngechuchuxũ nangãxũ ga guma idaawecũ, rü ñanagürũ: —Pa Corix, tataxuma ya texé ya choxũ rüngũxẽẽxẽ na ngema choxũ tataéxũcèx i ngẽxguma naxĩãxãchichiügu ya daa puchu. Rü guxũguma i ngẽxguma ngema chaugũ chatáechaũgu, rü yoxni i togũ rü marũ nüxĩra

nügü ngema nataégü —ñanagürü. ⁸ Rü Ngechuchu rü ñanagürü nüxŭ: —¡Inachi, rü nayaxu i curü caruŭ, rü íxŭ! —ñanagürü. ⁹⁻¹⁰ Rü yexgumatama naxcèx nitaane ga guma yatü. Rü nanayaxu ga norü caruŭ, rü ínixŭ. Natürü ga yema ngunexŭ rü ngŭxchigaarü ngunexŭ nixŭ. Rü yemacèx ga yémacŭãxgü ga Yudíugüarü ãëxgacügü rü ñanagürügü nüxŭ ga guma yatü ga naxcèx itaanecü: —Ñoma nixŭ i ngŭxchigaarü ngunexŭ. Rü ngëmacèx nachuxu nixŭ na cuyangexŭ i curü caruŭ erü yemaãcü tamaã nüxŭ nixu ga Moïché —ñanagürügü. ¹¹ Natürü ga guma yatü rü yema Yudíugüarü ãëxgacügüxŭ nangãxŭ, rü ñanagürü: —Yima choxŭ rümexëëcü rü ñanagürü choxŭ:

“¡Nayaxu i curü caruŭ rü íxŭ!” ñanagürü. ¹² Rü yexguma ga yema ãëxgacügü rü nüxna nacagü, rü ñanagürügü: —¿Texé ngëma ñatarügü cuxŭ:

“¡Nayaxu i curü caruŭ rü íxŭ!” ñatarügü cuxŭ? —ñanagürügü. ¹³ Natürü ga guma yatü rü tama nüxŭ nacuèx ga texé naxcèx na yataanexëëxŭ, yerü namuxŭchi ga duŭxŭgü ga yéma, rü yexma nayarütaxu ga Ngechuchu. ¹⁴ Natürü yixcama ga Ngechuchu rü tupauca ga taxŭnegu nüxŭ nayangau ga guma yatü, rü ñanagürü nüxŭ: —¡Dücèx i ñuxma marü cuxcèx na yataanexŭ, rü tãütáma wena chixexŭ cuxŭ na tama quidaawexŭcèx namaã i wüxi i ðaawe i ngëma marü cuxŭ ngupetüxŭärü yexera ixŭxŭ! —ñanagürü. ¹⁵ Rü ínixŭ ga guma yatü, rü Yudíugüarü ãëxgacügümaã nüxŭ nayarüxu ga Ngechuchu na yŭxŭ ga guma namexëëcü. ¹⁶ Rü yemacèx nixŭ ga yema ãëxgacügü ga

Ngechuchucèx nadaugüxü na yamèxgüãxücèx, yerü ngüxchigaarü ngunexügu napuracü. ¹⁷ Natürü ga Ngechuchu rü ñanagürü nüxü: —Chaunatü ya Tupana rü guxü i ngunexügu napuracü rü mexü naxü. Rü ngēmacèx i choma rü ta naxrüü chapuracü —ñanagürü. ¹⁸ Rü yemacèx ga yema Yudíugüarü ãëxgacügü rü yexeraãcü Ngechuchuxü nimèxgüchaü. Yerü tama naxrüü nanaxaure ga ngüxchigaarü ngunexü rü ñuxüchi nüxü nixu ga Nanatüxüchi na yïixü ga Tupana, rü yemaãcü nügü nixu ga Nanatü ga Tupanamaã na nawüxiguxü.

Nüma ga Tupanatama nixi ga Nanena naxããxü ga pora

¹⁹ Rü yexguma ga Ngechuchu rü ñanagürü nüxü ga yema ãëxgacügü: —Aixcüma pemaã nüxü chixu rü choma i Tupana Nane rü tama chorü poramaã chanaxü i tacü rü puracü i mexü. Natürü ngēma nüxü chadauxü i Chaunatü üxüxicatama nixi ichaxüxü. Rü guxüma i ngēma Chaunatü üxü, rü choma ya Nane rü ta chanaxü. ²⁰ — Chaunatü ya Tupana rü choxü nangechaü, rü ngēmacèx choxü nüxü nadauxëë i guxüma i tacü i nüma naxüxü. Rü ngēma ñuxma choxü nüxü nadauxëëxüãrü yexera tá choxü nüxü nadauxëë i yixcüra. Rü ngëxguma i pema ega ngēmaxü pedaugügu, rü tá pebaixãchiãëgü namaã. ²¹ — Rü Chaunatü rü ínanadagüxëë i yuexügü rü wena nanamaxëxëë. Rü ngëxguma-rüü ta i choma i Nane rü tüxna chanaxã i maxü ya yixema chatümawèxéxe na tüxna chanaxãxü. ²²⁻²³ —Rü tama Chaunatü nixi ya duüxügüxü icagücü i norü maxüchiga.

Natürü choxů nixĩ i namuxů na chanaxůxůcèx i ngẽma, na choxů yacuèxůůgůxůcèx i duůxůgů, ngẽma Chaunatůxů na yacuèxůůgůxůrůů. Rů yixema tama choxů icuèxůxůxẽ, rů tama nüxů ticuèxůů ta ya Chaunatů ya choxů nuã mucü. ²⁴ —Aixcůma pemaã nüxů chixu rů yixema texé ya choxů irůxĩnůxẽ i chorů ore, rů nüxů yaxõxẽ ya yima Chaunatů ya núma choxů mucü, rů tüxů nangẽxma i maxů i taguma gúxů. Rů Chaunatů rů tãütáma tůmamaã nanaxuegu na tapoxcuxů erů marů nawa ítanguxuchi na tayuxů, rů tüxů nangẽxma i maxů i taguma gúxů. ²⁵ —Rů aixcůma pemaã nüxů chixu rů marů nawa tá nangu i ngunexů rů ñuxmatama nixĩ i chauga naxĩnüèxů tá i ngẽma duůxůgů i norů pecadugu yuexů rů iyarůtauxexů. Rů texé ya chauga ñnüèxẽ rů tá tamaxẽ. ²⁶ —Nůma ya Chaunatů rů nüxů nangẽxma i pora na namaxẽxẽãxůcèx i duůxůgů. Rů ngẽma pora rů choxna nanaxã ya Chaunatů na choma rů ta duůxůgůxů chamaxẽxẽãxůcèx. ²⁷ —Rů Chaunatů ya Tupana choxů namu na duůxůgůna chaçaxůcèx naxcèx i norů maxůchiga, erů choma nixĩ i Nane i duůxůxů chiixů. ²⁸ —jTãxů i pebaixãchiãègůxů namaã i ñãã ore i pemaã nüxů chixuxů! Erů tá ínangu i ngẽma ngunexů i nagu guxůma i duůxůgů i yuexů rů tá na nüxů naxĩnüèxů i chauga. ²⁹ —Rů naxmaůgůwa tá ínachoxů. Rů ngẽma meã maxèxů, rů tá ínarůdagů na nayauxgůãxůcèx i maxů i taguma gúxů. Natürü ngẽma chixexů ůgůxů, rů tá ínarůdagů na napoxcuexůcèx.

Nawa nüxů icuáxů na Tupana yĩxů ga Ngechuchuna naxãců ga pora

30 —Choma rü taxucürüwa tacü chaxü chaeuchamatama ega tama choxü naxüxêẽãgu ya Chaunatü. Rü Chaunatü chomaã nüxü ixuxüãcüma nixĩ i nüxna chaçaxü i duũxügü i norü maxüchiga. Rü ngẽxguma nüxna chacaxgu rü aixcüma meãma chanangugü i duũxügü. Erü tama choxrütama ngúchaũ nixĩ i ngẽma chaxüxü, natürü Chaunatü ya nuã choxü mucüarü ngúchaũ nixĩ i ngẽma chaxüxü. 31 —Rü ngẽxguma chi chauchigaxütama chixuxgu rü taxuwama name i ngẽma. 32 —Natürü nangẽxma i to i chauchigaxü ixuxü. Rü nüxü chacuèx rü aixcüma nixĩ i norü ore i pemaã nüxü yaxuxü. 33 Pema rü Cuáũ ya baiũxêẽruũxütawa penamugü ga perü duũxügü na nüxü pecuáxücèx ga ore ga aixcüma ixixü ga chauchiga. Rü yema ore ga Cuáũ pexü namaã ngãxüxü rü aixcüma nixĩ. 34 —Natürü i choma rü tama chanaxwèxe i tacü rü yatü chauétüwa nachogü, erü choma tátama chaugüna chadau. Natürü pemaã nüxü chixu i ngẽma Cuáũãrü ore na choxü peyaxögüxücèx rü na penayauxgüxücèx i maxü i taguma gúxü. 35 —Cuáũ rü wüxi ga omü ga iyauracüüxü rü pexü baxixü-rüũ nixĩ ga pexcèx. Rü pema rü paxaãchi namaã petaãëgü. 36 —Natürü nangẽxma i tacü i Cuáũãrü orearü yexera chauétüwa íchogüxü. Rü ngẽma nixĩ ga yema taxügü ga cuèxruũgü ga Chaunatü choxü muxü na norü poramaã chanaxüxücèx. Rü yemawa pexü nüxü chadauxêẽ na aixcüma Chaunatü ya Tupana yĩxü ga núma choxü mucü. 37 —Rü ngẽxgumarüũ ta ya Chaunatü ga guma núma choxü mucü, rü marü chauétüwa ínachogü, woo taguma nüxü pexĩnüẽ ga naga rü taguma nüxü pedau. 38 —Rü

ngẽma Chaunatüarü ore rü ta tama peãẽwa nixücu, erü tama choxü peyaxõgü woo Chaunatü núma choxü na muxü. ³⁹⁻⁴⁰—Pema meãma nawa pengúe i Tupanaãrü ore i ümatüxü, erü nagu perüxĩnüe rü ngẽmawa tá nüxü ipeyangau i perü maxü i taguma gúxü. Natürü woo ngẽmatama Tupanaãrü ore i ümatüxüwa rü chauchiga meã na yadexaxü, natürü i pema rü tama choxü peyaxõgüchaü na ngẽmaãcü penayauxgüxücèx i ngẽma maxü. ⁴¹⁻⁴²—Rü choma rü tama chanaxwèxe na choxü picuèxüügüxü erü meãma pexü chacuèx, rü nüxü chacuèx na tama aixcüma Tupanaxü pengechaügüxü. ⁴³—Chaunatü ya Tupana nixĩ ga núma choxü mucü, natürü i pema rü tama choxü peyauxgüchaü. Natürü ngẽxguma chi tomare i yatü nagagutama núma üxgu, rü ngẽma chi nixĩ i taãẽacüma peyauxgüxü. ⁴⁴—¿Rü ñuxãcü chi choxü peyaxõgü ega penaxwèxegu na pemücügütama pemaã taãèxü rü tama naxcèx pedaugügu na Tupanaxüchi pemaã taãèxü? ⁴⁵—¡Tãxü i nagu perüxĩnüèxü na choma tá yĩxü na pexü chixugüxü i Chaunatüxütawa! Erü Moïché ga guma perü maxücèx nüxü peyaxõgücü tátama nixĩ ya yima pexü ixugücü i Chaunatüxütawa. ⁴⁶—Rü ngẽxguma chi peyaxõgügu i ngẽma ore ga Moïché ümatüxü, rü choxü rü chi ta peyaxõgü. Yerü ga Moïché rü chauchigagu nixĩ ga naxümatüãxü ga norü poperawa. ⁴⁷—Natürü ngẽxguma tama peyaxõgügu i ngẽma Moïché ümatüxü i ore, ¿rü ñuxãcü tá peyaxõgü i ngẽma choma pemaã nüxü chixuxü? —ñanagürü ga Ngechuchu.

6

*Ngechuchu rü nanachibüexêê ga 5000 ga yatügü
(Mt 14.13-21; Mr 6.30-44; Lc 9.10-17)*

¹ Rü yemawena ga Ngechuchu rü naxtaxa ga Gariréagu ãeganearütocutüwa tomaã naxü. Rü norü toéga ga guma naxtaxa rü Tibéria nixĩ. ² Rü muxüma ga duüxügü rü nawe narüxĩ. Yerü üpaacü rü marü nüxü nadaugü ga ñuxãcü Ngechuchu na naxüxü ga taxü ga mexügü ga Tupanaärü poramaã üxü ga yexguma duüxügü ga idaaweegüxücèx yataanexêêgüägu. ³ Rü yexguma ga Ngechuchu rü wüxi ga mèxpünewa tomaã ínaxüãchi. Rü wüxigu tomaã yéma narüto. ⁴ Rü marü ningaica ga yema Yudíugüarü peta ga Üpetüchiga. ⁵ Rü yexguma Ngechuchu nüxü dawenügu rü nüxü nadau ga muxüma ga duüxügü ga nawe rüxüxü. Rü yemacèx Piripina naca, rü ñanagürü: —¿Rü ngextá tá naxcèx tataxe i nawemü i ñaã duüxügü na nachibüexêêxücèx? —ñanagürü. ⁶ Rü nümatama ga Ngechuchu rü marü nüxü nacuèx ga tacü tá na naxüxü. Natürü yema ñanagürü Piripixü, yerü nüxü nacuáxchaü ga tacümaã tá na nangãxüãxü. ⁷ Rü yexguma Ngechuchuxü nangãxü ga Piripi, rü ñanagürü: —Woo chi naxcèx itaxegügu i 200 i dñeru naguxü i pãü, rü tãü chima nüxü ningu ega woo wüxichigüna íraxü íxãchigügu —ñanagürü. ⁸⁻⁹ Rü yexguma ga Aüdré ga Ngechuchuarü ngüexü ga Pedru ga Chimáü naêneê, rü ñanagürü: —Nuã nangèxma i wüxi i buxü rü nüxü nangèxma i 5 i pãü i chebadanaxcèx rü taxre ta i choxni. ¿Natürü tacüwa name i ngéma naxcèx i ñaã muxüchixü

i duũxũgũ? —ñanagürü. ¹⁰ Rũ yexguma ga Ngechuchu rũ ñanagürü toxũ: —¡Ēcũ, namaã nüxũ pixu i duũxũgũ na ínatogũxũcèx! —ñanagürü. Rũ yema nachicawa rũ nametẽxeane ga guma maxẽ. Rũ gumatẽxewa narũtogũ ga duũxũgũ. Rũ maneca 5000 wa nangu ga yexguma yatũgũxica ixugũgu. ¹¹ Rũ yexguma ga Ngechuchu rũ nanade ga yema pãũgũ, rũ Tupanana moxẽ naxã. Rũ yemawena rũ toxũ nayanu na yema duũxũgũ ga yéma rũtogũxũxũ tayanuxũcèx. Rũ yexgumarũũ ta ga choxni rũ nüxũ toxũ nayanuxẽẽ, ñuxmata meãma nachibũe ga guxũma ga yema duũxũgũ. ¹² Rũ yexguma marũ meã nachibũegu ga guxũma, rũ Ngechuchu toxũ namu rũ ñanagürü toxũ: — ¡Penade i ngẽma naxchipẽxegũ i íyaxũgũxũ na tama inaxaiyèxũcèx! —ñanagürü. ¹³ Rũ tanade ga yema naxchipẽxegũ ga yema 5 ga pãũwa iyaxũxũ, rũ 12 ga pexchi namaã tanaxũãcugũ. ¹⁴ Rũ yexguma yema duũxũgũ nüxũ daugũgu ga yema mexũ ga taxũ ga Tupanaãrũ poramaã naxũxũ ga Ngechuchu, rũ ñanagürũgũ: — Aixcũmaxũchi daa nixĩ ya Tupanaãrũ orearũ uruũ ga guma ínanguxẽẽcũ —ñanagürũgũ. ¹⁵ Natürũ ga Ngechuchu rũ nüxũ nicuèxãchi ga duũxũgũ rũ na norũ ãẽxgacũxũ yangu-cuchixẽẽgũchaũãxũ. Rũ yemacèx nüxna nixũgachi rũ yeamaxũra naxũ nawa ga guma mèxpũne na nüxĩcatama nayexmaxũcèx.

Dexáétũgu nixũ ga Ngechuchu

(Mt 14.22-27; Mr 6.45-52)

¹⁶ Rũ yexguma marũ nachũtagu, rũ toma ga Ngechuchuarũ ngũexũgũ rũ wenaxãrũ naxtaa-

cutüwa taxĩ. ¹⁷ Rũ poraãcü naxẽãne. Rũ tama ínangu ga Ngechuchu. Rũ yemacèx wüxi ga ngue ga taxũnegu tichoŭ, rũ itaxĩãchi ga na tocutüwa taxĩxũ ga Capernáũârũ ãñewa na tangugũxücèx. ¹⁸ Rũ yexguma tixãũyane rũ inaxügü ga na poraãcü yabuaxũ. Rũ yemagagu rũ poraãcü nayuape. ¹⁹ Rũ yexguma marü 5 ga kilómetru tixãũgu, rũ Ngechuchuxũ tadaugü ga na dexáchiüétügu yaxũxũ. Rũ toma ga norü ngúexügü rũ poraãcü tamuũẽ. ²⁰ Natürü nüma ga Ngechuchu rũ ñanagürü toxũ: —Choma chixĩ. ¡Rũ tãxũ i pemuũèxũ! —ñanagürü. ²¹ Rũ yexguma ga toma ga norü ngúexügü rũ taããcũma tanayauxgüchaũ ga toweüwa. Rũ yexgumatama ítangugü ga yema ítaxĩxũwa.

Ngechuchucèx nadaugü ga duũxügü

²² Rũ moxũãcü ga yema duũxügü ga naxtaxaarü tocutügu rüchoxũ, rũ nüxũ nicuèxãchitanü ga toma ga Ngechuchuarü ngúexügü ga marü nagu na taxĩxũ ga guma ngue ga taxũne ga nügümaã wüxicane. Rũ nüxũ nacuèxgü ta ga Ngechuchu rũ tama towe na naxũxũ. ²³ Rũ yexguma yemagu ínaxĩnüëyane, rũ yoxocüne ínangugü ga náígü ga ngue ga itaxũne ga Tibériaarü ãñewa ne ãxũne. Rũ norü ngaicamana nangugü ga yema nachica ga ngextá Ngechuchu ínachibüexẽxũwa ga yema muxũma ga duũxügü ga yexguma moxẽ inaxãxgu naxcèx ga yema pãü. ²⁴ Rũ yexguma yema duũxügü nüxũ daugügu ga guma nguewa na Ngechuchu rũ toma ga na tatauxexũma rũ yexma guma nguegügu nichoŭ na Ngechuchucèx yadaugũxũ Capernáũârũ ãñegu.

Ngechuchu nixĩ i pãũ i maxũ tüxna ãxũ

²⁵ Rũ yexguma guma naxtaxaarũ tocutüwa nangugũga ga yema duũxũgũ, rũ Ngechuchuxũ yexma nayangaugũ. Rũ nüxna nacagũe, rũ ñanagürügũ: —Pa Ngúexẽẽruũx, ¿ñuxgu nixĩ i nuã cunguxũ? —ñanagürügũ. ²⁶ Rũ Ngechuchu nanangãxũ, rũ ñanagürü nüxũ: —Aixcũma pemaã nüxũ chixu rũ tama yema nüxũ na picuèxãchitanüxũcèx ga yema mexũgũ ga Tupanaarũ poramaa chaxũxũ nixĩ i chauxcèx pedaügũxũ. Natürü chauxcèx pedaügũ yerü meãma pechibüe nawa ga yema õna ga pexna chaxãxũ. ²⁷ —¡Tãxũ i naxcèx pepuracüexũ i õna i paxama gúxũ! Rũ narümemaẽ nixĩ i naxcèx pepuracüe i ngema maxũ i aixcũma ixĩxũ i taguma gúxũ. Rũ ngẽma nixĩ i maxũ i choma i Tupana Nane ya duũxũxũ chixĩcü tá pexna chaxãxũ, erü Chaunatü ya Tupana rũ marü nanangõxẽẽ na aixcũma Nane chiĩxũ —ñanagürü. ²⁸ Rũ yexguma ga nümagü rũ nüxna nacagü, rũ ñanagürügũ: —¿Tacü tá taxüe na tayanguxẽẽxũcèx i ngẽma Tupana toxũ naxwèxexũ? —ñanagürügũ. ²⁹ Rũ Ngechuchu nanangãxũ rũ ñanagürü nüxũ: —Rũ Tupana rũ núma choxũ namu. Rũ ngẽma nüma pexũ nanaxwèxexũ nixĩ na choxũ peyaxõgũxũ —ñanagürü. ³⁰ Rũ yexguma ga nümagü rũ nüxna nacagü, rũ ñanagürügũ nüxũ: —¿Tacü rũ cuèxruũxũ tá toxũ cudauxẽẽ na cuxũ tayaxõgũxũcèx na aixcũma Cristu quiĩxũ? ¿Rũ tacü i to i mexũ tá toxcèx cuxũxũ i ñuxmax? ³¹ Yerü nuxcũmaũgũxũ ga tórü oxigü, rũ nanangõxgü ga yema pãũ ga Tupana nüxna ãxũ ga chianexũwa ga ngextá taxúema íxãpataxũwa. Rũ Tupanaãrũ ore i

ümatüxüwa rü ñanagürü:

“Tupana rü daxücüâx ga pãumaã nanachibüexëë
ga duüxügü”,

ñanagürü i ngëma orewa. ³² Rü Ngechuchu nanangãxü rü ñanagürü nüxü: —Aixcüma pemaã nüxü chixu rü tama nixĩ ga Moĩché yiixü ga nüxna naxãxü ga yema pãu ga daxü- cüâx, natürü Chaunatü ga Tupana nixĩ ga nüxna naxãcü. Rü nüma nixĩ i ñuxma i pexna naxããxü i pãu i aixcüma ixixü i daxüwa ne üxü. ³³ —Erü ngëma pãu i Tupana ixãxü, rü daxüguxü i naãnewa ne naxü rü nanamaxëxëë i ñoma i naãnecüâx i duüxügü —ñanagürü. ³⁴ Rü nümagü rü naxcëx ínacagü, rü ñanagürügü nüxü: —Pa Corix, jguxüguma toxna naxãëcha i ngëma pãu! —ñanagürügü.

³⁵ Rü Ngechuchu ñanagürü nüxü: —Choma nixĩ i ngëma pãu i maxëxëëruü chiixü. Rü yixema texé ya chauxütawa üxë rü tagutáma tataiya. Rü texé ya choxü yaxõxë rü tagutáma tiṭawa.

³⁶ —Natürü marü pemaã nüxü chixu rü woo na choxü pedaugüxü rü tama choxü peyaxõgü i pemax. ³⁷ —Rü guxãma ya yixema duüxëgü ya Chaunatü choxna tüxü mugüxe rü chorü duüxügü tixigü. Rü texé ya choxü yaxõgüxe rü tãütáma tüxü chaxoox. ³⁸ —Yerü tama choxrütama ngúchaü na chaxüxcëx nixĩ ga daxüguxü ga naãnewa ne chaxüxü. Natürü núma chaxü na chanaxüxcëx i norü ngúchaü ya Chaunatü ya núma choxü mucü. ³⁹ —Rü ngëma norü ngúchaü ya Chaunatü ya Tupana ya núma choxü mucü nixĩ i na taxüexüma ichayarütauxëëxü ya yixema choxna tüxü namugüxe. Erü nüma ya Chaunatü nanaxwae na tüxü yuwa ícharüdagüxëëxü i

naãneãrũ guxgu. ⁴⁰—Choma nixĩ i Tupana Nane chiĩxũ. Rũ ngẽma norũ ngũchaũ ya Chaunatu ya Tupana ya núma choxũ mucũ nixĩ na tũxũ nangẽxmaxũ i maxũ i taguma gũxũ ya guxãma ya texé ya choxũ daugũxe rũ choxũ yaxõgũxe. Erũ choma tá nixĩ i tũxũ ícharũdagũxẽẽxũ i naãneãrũ guxgu —ñanagürũ. ⁴¹ Rũ yexguma yema orexũ naxĩnũẽgu ga yema Yudíugũ, rũ inanaxũgũe ga Ngechuchuchiga na yadexagũxũ. Yerũ ñanagürũ ga Ngechuchu: —Choma nixĩ i pãũ i daxũguxũ i naãnewa ne chaxũxũ —ñanagürũ. ⁴² Rũ ñanagürũgũ: —¿Taux ẽxna ñaã yĩxũ i Ngechuchu i Yúche nane? Rũ yixema rũ tũxũ tacuèx ya nanatũ rũ naẽ. ¿Rũ ñuxãcũ i nũma i “Daxũwa ne naxũxũ”, ñaxũ? —ñanagürũgũ. ⁴³ Rũ Ngechuchu ñanagürũ nũxũ: —¡Nũxũ perũxoe na choxũ na pixuechaxũ! ⁴⁴—Taxúema chauxõtawa tangu ega tama choxna tũxũ namuxgu ya chaunatu ga guma núma choxũ mucũ. Rũ texé ya chauxõtawa ngugũxe rũ choma rũ tá wena tũxũ chamaxẽxẽẽ i naãneãrũ guxgu. ⁴⁵—Nuxcũmaũgũxũ ga Tupanaãrũ orearũ uruũgũarũ poperawa naxũmatũ i ore i ñaxũ:

“Tupana tá guxãxũ nangúexẽẽ”,

ñaxũ. Rũ ngẽmacèx guxãma ya texé ya Chaunatu xũ ñnũxẽ rũ naxõtawa ngũxe, rũ chauxõtawa taxĩ. ⁴⁶—Taguma texé Chaunatu ya Tupanaxũ tatau. Rũ chaxicatama nixĩ i nũxũ chadauxũ erũ naxõtawa ne chaxũ. ⁴⁷—Aixcũma pemaã nũxũ chixu rũ texé ya choxũ yaxõxẽ rũ tũxũ nangẽxma i maxũ i taguma gũxũ. ⁴⁸—Choma nixĩ i pãũ i maxẽxẽẽruũ chiĩxũ. ⁴⁹—Rũ perũ oxigũ ga nuxcũmaũgũxũ rũ nanangõx ga yema pãũ ga Tupana nũxna ãxũ ga yema nachica

ga ngextá taxúema íxãpataxűwa. Natürü woo nanangõxgü ga yema pãü rü nayueamatama.⁵⁰ —Natürü ñaã pãü i pemaã nüxű chixuxű i daxűwa ne ũxű rü chomatama chixĩ. Rű guxãma ya texé ya choxű yaxúxe ñoma pãü tangõxűrű rű tá tamaxěcha.⁵¹ —Chomatama nixĩ i pãü i maxěxěruű i daxűwa ne chaxűxű. Rű texé ya ñoma chomaã taxãweműxűrű choxű yaxõxě rű guxűgutãma tamaxěcha. Erű ngěma pãü i choma tũxna chaxãxű rű chaxunetama nixĩ. Rű ichanaxã i chaxune na namaxěxűcèx i ñoma i naãnecűãx i duűxűgű —ñanagürü ga Ngechuchu.⁵² Rű yexguma ga yema Yudűgű rű poragaãcü nűgűna nacagűe, rű ñanagürűgű: —¿Nuxãcü tá i ñaã yatű i naxűne tátama tũxű nangõxěxű? —ñanagürűgű.⁵³ Rű Ngechuchu ñanagürü nüxű: —Rű choma i Tupana nane na duűxűxű chiixű rű aixcűma pemaã nüxű chixu rű ngěxguma pema rű tama chaxunemaã pexãweműgűgu rű tama nawa pexaxegűgu ya chaugű, rű tãütãma pexű nangěxma i maxű i taguma gűxű.⁵⁴ —Texé ya chaxunemaã aweműxě rű chaugűwa axexe rű tũxű nangěxma i maxű i taguma gűxű. Erű choma rű tá tũxű chamaxěe ega naãneärű guxgu.⁵⁵ —Erű chaxune rű õnaxűchi nixĩ rű chaugű rű axexűxűchi nixĩ.⁵⁶ —Texé ya chaxunemaã aweműxě rű chaugűwa axexe rű chowa tayaxűx rű choma i tũmawa.⁵⁷ —Chaunatű ga núma choxű mucű rű namaxű. Rű nűma choxna nanaxã i maxű. Rű ngěxgumarű ta i choma rű tá tũxna chanaxã i maxű ya yixema choxű yaxúxe rű choxű yaxõxě.⁵⁸ —Marű pemaã nüxű chixu na choma rű pãü i daxűwa ne ũxű chiixű. Natürü choma rű tama yema pãü ga

nuxcūmaũgũxũ ga perũ oxigũ ngõxgũxũ ga pãũrũũ chixĩ. Yerũ woo ga yema pãũ na nangõxgũxũ ga perũ oxigũ rũ nayueamatama. Natürũ texé ya choxũ yaxúxe, ñoma pãũ tangõxũrũũ, rũ choxũ yaxõxẽ rũ guxũgutáma tamaxũ —ñanagürũ. ⁵⁹ Rũ Ngechuchu rũ duũxũgũmaã nüxũ nixu ga yema ore ga yexguma nangúexẽãgu ga Yudíugüarũ ngutaquẽxepataũwa ga ñãne ga Capernáũwa.

Ngechucharũ orewa nangẽxma i maxũ i taguma gúxũ

⁶⁰ Rũ yexguma nüxũ naxĩnüẽgu ga yema nguxẽẽtae, rũ muxũma ga yema duũxũgũ ga nawe rũxĩxũ rũ ñanagürũgũ: —Rũ ngẽma tamaã nüxũ yaxuxũ, rũ naguxchaxüchi na nüxũ icuáxũ na ñuxũ ñaxũ. ¿Ñuxãcü texé tüxũ natauxcha na naga taxĩnüxũ? —ñanagürũgũ. ⁶¹ Natürũ ga Ngechuchu rũ nüxũ nacuèxama ga yemaãcü nügũmaã na iyadexagũxũ naxcèx ga yema nguxẽẽtae, rũ yemacèx nüxna naca, rũ ñanagürũ: —¿Éxna peãẽwa nangux i ngẽma ore? ⁶² —Rũ ngẽxguma peãẽwa nanguxgu i ngẽma ore i pemaã nüxũ chixuxũ, rũ ¿tacügu chi perũxĩnüẽxũ ega choxũ pedèuxgu na wenaxãrũ daxũ na chaxĩxũ, ga noxri ne chaxũxũwa na chaxũxũ i choma i Tupana Nane na duũxũxũ chiĩxũ? ⁶³ —Tupanaãe i Üünexũ nixĩ i inaxãxũ i maxũ i taguma gúxũ. Rũ tama pexene nixĩ i pexũ maxẽxẽxũ. Rũ ngẽma ore i pemaã nüxũ chixuxũ rũ peãecèx nixĩ, rũ nawa nangẽxma i maxũ i taguma gúxũ. ⁶⁴ —Natürũ tangẽxma i petanũwa ya ñuxre ya tama yaxõgũxe —ñanagürũ. Rũ yema ñanagürũ ga Ngechuchu yerũ noxriarũ ügũgumama marũ nüxũ nacuèx ga texé

tá nüxŦ na yaxŏgŭxŦ, rŭ texé tá cúãcü ínaxuaxŦxŦ.
⁶⁵ Rŭ ñanagŭrŭ ta: —Rŭ ngẽmacèx marŭ pemaã nüxŦ chixu rŭ taxuacŭma texé chauxŦtawa tangu ega tama Chaunatŭ chauxŦtawa tŭxŦ gaxgu — ñanagŭrŭ. ⁶⁶ Rŭ yexguma inanaxŭgŭe ga nüxna na yaxŭgŭxŦ ga muxŭma ga yema duŦxŭgŭ ga noxri nawe rŭxŭchiréxŦ. Rŭ marŭ tama nawe ínaxŭxŦ. ⁶⁷ Rŭ yexguma ga Ngechuchu rŭ norŭ 12 ga ngŭexŭgŭna naca, rŭ ñanagŭrŭ nüxŦ: — ¿Éxna pema rŭ ta choxna pixŭgachitanŭchaŦ? —ñanagŭrŭ. ⁶⁸ Natŭrŭ Chimáŭ ga Pedru rŭ nanangãxŦ, rŭ ñanagŭrŭ: —Pa Corix, ¿TexéxŦtawa chi taxŭxŦ ega cuxna tixŭgachitanŭgu? Erŭ cuma rŭ cuxŦ nangẽxma i ore i nawa nangẽxmaxŦ i maxŦ i taguma gŭxŦ. ⁶⁹ —Toma rŭ marŭ cuxŦ tayaxŏgŭ, rŭ nüxŦ tacuèx na cuma quiŭxŦ ya Cristu ya Üŭnecŭ ya Tupana Nane —ñanagŭrŭ. ⁷⁰ Rŭ Ngechuchu toxŦ nangãxŦ, rŭ ñanagŭrŭ: — ¿Taux éxna choma yŭxŦ ga pexŦ chidexechixŦ ga pema ga 12? Natŭrŭ nangẽxma i wŭxi i petanŭwa i Chatanáãrŭ duŦxŦ ixŭxŦ —ñanagŭrŭ. ⁷¹ Rŭ Yuda ga Icariŭte ga Chimáŭ nanechiga nixŭ ga yadexaxŦ ga Ngechuchu. Yerŭ Yuda tá nixŭ ga cúãcü ínaxuaxŦxŦ rŭ woo ga nüma rŭ wŭxi ga totanŭxŦchiréx na yŭxŦ.

7

Ngechuchueneẽgŭ rŭ tama nüxŦ nayaxŏgŭ

¹ Rŭ yemawena ga Ngechuchu rŭ Gariréaanewa yexmagŭne ga ñãnegŭgu nixŭãgŭchigŭ. Rŭ tama Yudéaanewa nayexmachauŦ yerŭ yémacŭãx ga Yudŭgŭarŭ ãẽxgacŭgŭ rŭ naxcèx nadaugŭ ga na

yamèxgüchaũãxücèx. ² Natürü marü ningaica ga yema Yudíugüarü peta ga nagu norü düxenüğü yaxüğüxũ na yemawa nüxna nacuèxãchiexücèx ga ñuxãcü nuxcümaũğüxũ ga norü oxigü na naxüğüxũ ga norü düxenüğü ga naĩxãtünaxcèx ga yexguma Moĩchéwe naxĩxgu ga ngextá taxúema íxãpataxũwa. Rũ yemacèx nixĩ ga Düxenüğüarü Petagu naxãegaxũ. ³ Rũ naẽneẽgü ga Ngechuchu rü ñanagürüğü nüxũ: —Tama name i nuxã Gariréaarü naãnegu curüxãũx. Rũ name nixĩ i petacèx Yudéawa cuxũ, na ngẽma duũxüğü i cuwe rüxĩxũ i ngema ngẽxmagüxũ nüxũ daugüxücèx i ngẽma cuèxruũgü i mexüğü i Tupanaãrũ poramaã cuxüxũ. ⁴ —Erü ngẽxguma chí wüxi ya yatü rü duũxüğüxũ nüğü nacuèxẽẽchaũgu rü tama cúãcü nanaxü i tacü i naxüxũ. Rũ ñuxma na cunaxüxũ i muxũma i mexüğü i Tupanaãrũ poramaã cuxüxũ, rü name nixĩ i guxũ i duũxüğüpẽxewa cunaxü —ñanagürüğü. ⁵ Rũ yema ñanagürüğü ga naẽneẽgü yerü woo ga nümagü rü ta tama nüxũ nayaxõgü. ⁶ Rũ yexguma ga Ngechuchu rü nanangãxũ, rü ñanagürü nüxũ: —Tauta nawa nangu i ngunexũ na petawa chaxũxũ. Natürü pexcèx rü ngẽxürüxũmare i ngunexũ nixĩ i mexũ na petawa nagu pexĩxũ. ⁷ —Ngẽma duũxüğü i ñoma i naãnecũãx rü tama pexchi naxaie. Natürü chauxchi naxaie erü chanangoxẽẽ i ngẽma naxüğüxũ rü na nachixexũ. ⁸ —Name nixĩ i petawa pexĩ i pemax. Choma rü tauta ngema chaxü erü tauta nawa nangu i ngunexũ i nagu ngema chaxũxũ —ñanagürü ga Ngechuchu. ⁹ Rũ yexguma yema ñaxguwena, rü Gariréaanegu narüxãũx.

Ngechuchu rü Düxenügiarü Petawa naxü

10 Natürü nawena ga naēneēgü ga petawa na naxixü, rü Ngechuchu rü ta yéma naxü. Natürü cúacü yéma naxü, rü tama poraacü duixügüxü nügü nadauxēē. 11 Rü yema Yudügiarü aēxgacügü rü naxcèx nadaugü ga yema petawa, rü ñanagürügü: —¿Ngextá nangēxma i ngēma yatü? —ñanagürügü. 12 Rü nügütanüwa ga yema duixügü ga yéma yexmagüxü, rü poraacü Ngechuchuchiga inidexagü. Rü ñuxre ga yema duixügü rü ñanagürügü: —Yima rü wüxi ya yatü ya mecü nixi —ñanagürügü. Natürü ga togü rü ñanagürügü: —Ngēma yatü rü tama name erü duixügüxü nawomüxēē —ñanagürügü. 13 Natürü taxuüma ga duixügü rü mea togüpēxewa Ngechuchuxü nicuèxüügüchaü, yerü yema Yudügiarü aēxgacügüxü namuüē. 14 Rü yexguma marü yema petaarü ngäxüwa nanguxgu, rü nixücu ga Ngechuchu nawa ga tupauca ga taxüne. Rü inanaxügü ga na nanguxēētaexü. 15 Rü yema Yudügiarü aēxgacügü, rü nabaixächiaēgü namaã ga yema ore ga Ngechuchu nüxü ixuxü. Rü ñanagürügü: —¿Ñuxäcü i ngēmaäcü poraacü nüxü nacuáxü, rü taguma texé nanguxēē? —ñanagürügü. 16 Rü Ngechuchu nanangäxü rü ñanagürü nüxü: —Ñaa chorü nguxēētae rü tama choxrü nixi, erü Chaunatü ya núma choxü mucüarü nixi. 17 —Ngēxguma texé naxüxchaügu i Tupanaärü ngüchaü rü yixema tá nüxü tacuèx ngoxi aixcüma Tupanaxütawa chanayaxu i ngēma chorü nguxēētae rü ēxna chaugüxütawatama chayaxuxü yixi i ngēma. 18 —Yixema texé ya mexü

i tümachigaxŭtama ixuxe rŭ ngēmaācŭ tanaxŭ erŭ tanaxwēxe i duŭxŭgŭ na tŭxŭ icuèxŭŭgŭxŭ. Natŭrŭ texé nŭxŭ tixu i ore i mexŭ nachiga i ngēma tŭxŭ muxŭ, rŭ aixcŭma nixŭ i tŭmaārŭ ore. Rŭ tama dora nixŭ i ngēma nŭxŭ tixuxŭ. ¹⁹ —¿Tama ěxna aixcŭma yŭxŭ ga Moŭché pexna naxāxŭ ga Tupanaārŭ mugŭ? Natŭrŭ taxŭema i pema naga pexŭnŭē i ngēma mugŭ. ¿Rŭ ñŭxma rŭ tŭxcŭŭ nixŭ i choxŭ pimèxgŭchaŭxŭ? —ñanagŭrŭ. ²⁰ Rŭ yema duŭxŭgŭ nanangāxŭgŭ, rŭ ñanagŭrŭgŭ: —Cuma rŭ ngoxo cuwa nangēxmamare. ¿Ěxna texé cuxŭ timèxgŭchaŭ? —ñanagŭrŭgŭ. ²¹ Natŭrŭ ga Ngechuchu rŭ ñanagŭrŭ nŭxŭ: —Choma rŭ ngŭxchigaarŭ ngunexŭgu chanamexēē ga wŭxi ga yatŭ. Rŭ guxāma i pema rŭ penuāēgŭ naxcèx ga yema wŭxitama ga mexŭ ga ngŭxchigaarŭ ngunexŭgu chaxŭxŭ. ²² —Natŭrŭ pema rŭ ta ngŭxchigaarŭ ngunexŭgu pepuracŭe na naga pexŭxŭcèx ga Moŭchéarŭ mugŭ. Rŭ Moŭché pemaā nŭxŭ nixu na tŭxŭ ípewiechèxmŭpèxechiraŭxŭ ya guxāma ya yatŭxe ya buxe. Natŭrŭ tama Moŭché nixŭ ga inaxŭgŭcŭ ga yema, yerŭ nuxcŭmaŭgŭxŭ ga perŭ oxigŭwa nixŭ ga ne naxŭxŭ. Rŭ ñŭxma i pema rŭ yema mugagu rŭ tŭxŭ ípewiechèxmŭpèxechiraŭ ya guxāma ya buxe ya yatŭxe woo ngŭxchigaarŭ ngunexŭ yixŭgu. ²³ —Rŭ ngēmaācŭ i pema rŭ ngŭxchigaarŭ ngunexŭgu buxexŭ ípewiechèxmŭpèxechiraŭ erŭ naga pexŭnŭēchaŭ i Moŭchéarŭ mugŭ. ¿Rŭ ñŭxma rŭ tŭxcŭŭ yŭxŭ i chomaā penuēxŭ naxcèx na ngŭxchigaarŭ ngunexŭgu chanamexēēxŭ ga wŭxi ga yatŭ ga idaaweecŭ? ²⁴ —Rŭ ngēmacèx

tama name i ngürümare penangugü i ngëma chaxüxü. Rü penaxwëxe i meã nagu perüxĩnũëxira, na aixcüma meã penangugüxüçex —ñanagürü ga Ngechuchu.

Ngechuchu rü Tupana Nane nixĩ

²⁵ Rü ñuxre ga yema duüxügü ga Yerucharéügu ãchiügüxü rü nügüna nacagüe, rü ñanagürügü: — ¿Taux éxna daa yĩxü ya yima yatü ya ãëxgacügü naxçèx daugücü na yamëxgüchaũãxüçex? ²⁶ — ¡Düçèx! Gua nixĩ rü yéa guxü i duüxügüpëxewa nidexa rü taxúema ñuxü ñatarügü nüxü. ¿Taux éxna i tórü ãëxgacügü i marü nüxü yaxögüãxü na aixcüma Cristu na yĩxü i nümax? ²⁷ — Natürü i yixema rü nüxü tacuëxgü na ngextá ne naxüxü i nümax. Natürü ngëxguma aixcüma Cristu núma üxgu rü taxúetáma nüxü tacuèx na ngextá na ne naxüxü —ñanagürügü. ²⁸ Rü nüma ga Ngechuchu rü tupauca ga taxünewa ínanangüexëë ga duüxügü. Rü yexguma nüxü naxĩnügu ga yema ore ga Yudíugü nüxü ixugüexü ga nachiga, rü tagaãcü ñanagürü: —Pema rü marü choxü pecuèx rü nüxü pecuèx na ngextá na ne chaxüxü. Natürü tama chaugagu nixĩ i núma chaxüxü. Choma núma chaxü yerü núma choxü namu ga Tupana ya naxwëxecü na nüxü yaxögüxü natürü i pema rü tama nüxü pecuácü. ²⁹ —Choma rü nüxü chacuèx yerü naxütawa ne chaxü, rü nüma nixĩ i núma choxü namuxü —ñanagürü. ³⁰ Rü yexguma ga yema ãëxgacügü rü Ngechuchuxü niyauxgüchaũ. Natürü taxuüma nayayauxgü, yerü tauta nawa nangu ga ngunexü ga na yayauxgüãxü rü na yamëxgüãxüçex. ³¹ Natürü muxüma ga duüxügü

rü nüxŭ nayaxõgü. Rü ñanagürügü: —¿Ngëxguma ínanguxgu ya Cristu rü tacü rü cuèxruŭ i taxŭ tá naxü ya daa yatü tama üxŭ i ñuxmax? — ñanagürügü.

Parichéugü rü Ngechuchuxŭ niyauxgüchaŭ

³² Rü yema Parichéugü rü duŭxügüxŭ naxĩnë ga yemaäcü Ngechuchuchiga na yadexagüxŭ. Rü yemacèx ga nümagü rü paigüarü äëxgacügü rü yéma nanamugü ga tupauca ga taxŭneärü purichíagü na Ngechuchuxŭ yanayauxgüxŭcèx. ³³ Rü yexguma ga Ngechuchu rü ñanagürü nüxŭ: —Paxaãchi tátama nixĩ i petanüwa changëxmaxŭ, rü ñuxŭchi tá chataegu naxütawa ya yima núma choxŭ mucü. ³⁴ —Pema rü tá chauxcèx pedaugü, natürü täütáma choxŭ ipeyangaugü. Erü ngëma ngextá tá íchangëxmaxŭwa rü taxuacü ngëma pengugü. ³⁵ Rü yexguma ga yema Yudíugüarü äëxgacügü rü nügüna nacagüe, rü ñanagürügü: —¿Ngextá tá naxŭ ega taxuacütáma nüxŭ iyarüngaugügu? ¿Éxna ngëma Yudíugü i to i nachiŭãnewa ngëxmagüxŭtanüwa tá naxŭ rü éxna ngëma tama Yudíugü ixíngüxŭtanüwa tá naxŭ na yangúexëëaxŭcèx? ³⁶ —¿Rü tacüchiga nixĩ i ngëma na ngëma ñaxŭ:

“Tá chauxcèx pedaugü natürü täütáma choxŭ ipeyangaugü, erü taxuacütáma ngëma pexĩ i ngëma tá íchangëxmaxŭwa”, ñaxŭ? —ñanagürügü.

Dexá i maxëëruŭchiga nidexa ga Ngechuchu

³⁷ Rü yema nawa iyacuáxŭ ga petaarü ngunexŭ nixĩ ga guxŭ ga togü ga ngunexŭärü yexera rümemaëxŭ naxcèx ga Yudíugü. Rü yema

ngunexũgu nixĩ ga inachixũ ga Ngechuchu rü tagaãcü ñaxũ: —Rü ngẽxguma texé itawaxgu rü jnuã chauxũtawa taxũ rü tayaxaxe! ³⁸ —Rü “texé ya choxũ yaxõxẽ rü tümaãrũ maxũnewa tá nibaibe i taxũ i dexá i maxẽẽruũ” ngẽma Tupanaãrũ ore i ümatũxũ nüxũ ixuxũrũ — ñanagürũ. ³⁹ Rü yexguma yema ñaxgu ga Ngechuchu rü Tupanaãẽ i Üünexũchiga nixĩ ga yadexaxũ. Rü nüxũ nixu ga guxũma ga yema nüxũ yaxõgũxũ rü tá na nayauxgũãxũ i Naãẽ i Üünexũ. Natürũ tama yexgumatama nanayauxgũ, yerü tauta wenaxãrũ daxũguxũ ga naãnecẽx nataegu ga Ngechuchu na guxũãrũ ãẽxgacü na yiĩxücèx.

Ngechuchugagu nügü nitoye ga duũxũgü

⁴⁰ Rü nümaxũ ga yema duũxũgü rü yexguma nüxũ naxĩnüẽgu ga yema Ngechuchu nüxũ ixuxũ, rü ñanagürũgü: —Aixcüma ñaã yatü nixĩ i ngẽma Tupanaãrũ orearü uruũ i ínguxchaũxũ —ñanagürũgü. ⁴¹ Rü togü rü ñanagürũgü: —Daa nixĩ ya Cristu —ñanagürũgü. Natürũ togü rü ñanagürũgü: —Tama nixĩ, erü taxucürüwa Gariréaanecũãx nixĩ ya Cristu. ⁴² —Erü Tupanaãrũ ore i ümatũxũwa rü ñanagürũ:

“Cristu rü tá Dabítaa nixĩ, rü tá nangox i ñãne i Berẽũwa ga ngextá Dabí íbuxũwa”, ñanagürũgü. ⁴³ Rü yemaãcü Ngechuchugagu nügü nitoye ga duũxũgü. ⁴⁴ Rü ñuxre ga yema duũxũgü rü Ngechuchuxũ niyauxgũchaũ, natürũ taxuũma nayayauxgü.

Yudíngüarü ãẽxgacügü rü tama Ngechuchuaxũ nayaxõgũchaũ

⁴⁵ Rŭ yema tupauca ga taxŭneärŭ purichíagŭ, rŭ Parichéugücèx rŭ paigŭarŭ ãëxgacŭgŭcèx nawoegu. Rŭ yema ãëxgacŭgŭ rŭ nüxna nacagŭ, rŭ ñanagŭrŭgŭ: —¿Tŭxcŭŭ tama nuã penaga? —ñanagŭrŭgŭ. ⁴⁶ Rŭ yema purichíagŭ rŭ nanangãxŭgŭ rŭ ñanagŭrŭgŭ: —Taguma texé tidexa i ñaã yatŭ idexaxŭrŭŭ —ñanagŭrŭgŭ. ⁴⁷ Rŭ yexguma ga Parichéugŭ rŭ ñanagŭrŭgŭ nüxŭ: —¿Éxna pexŭ rŭ ta marŭ nawomŭxëë i nümax? ⁴⁸ —Dŭcèx, rŭ taxúema i tomax i Parichéugŭ rŭ taxuŭma i tórŭ ãëxgacŭgŭ rŭ nüxŭ nayaxögŭ i ngëma Ngechuchu. ⁴⁹ —Natŭrŭ ñaã duŭxŭgŭ i tama Tupanaärŭ mugŭxŭ cuèxgŭxŭ rŭ marŭ nachixexŭgugŭ —ñanagŭrŭgŭ. ⁵⁰ Natŭrŭ Nicodému ga Parichéu ixícŭ ga wŭxicana Ngechuchuxŭtagu naxŭãnecŭ, rŭ ñanagŭrŭ nüxŭ: ⁵¹ —Ngëma tórŭ mugŭ i ũmatŭxŭwa rŭ ñanagŭrŭ: “Taxuacŭma wŭxi i yatŭxŭ tapoxcu ega tama nüxŭ ixĩnüëxĩragu i norŭ dexa na nüxŭ icuáxŭcèx na tacŭ na naxŭxŭ”, ñanagŭrŭ. ⁵² Rŭ yexguma ga natanŭxŭgŭ rŭ nanangãxŭgŭ, rŭ ñanagŭrŭgŭ nüxŭ: —¿Éxna cuma rŭ ta Gariréaanecŭãx quixĩ? ¡Nawa nangux i Tupanaärŭ ore i ũmatŭxŭ rŭ ngëma tá nüxŭ cudau rŭ taxuŭtáma i Tupanaärŭ orearŭ uruŭ rŭ Gariréaanecŭãx nixĩ! —ñanagŭrŭgŭ. ⁵³ Rŭ yexguma ga wŭxichigŭ rŭ nachiŭwa naxĩ.

8

Nge ga ãtecŭ ga naĩ ga yatŭmaã ngëãëxcŭ

¹ Rŭ Ngechuchu rŭ Oríbunecŭgu ãëgane ga mèxpŭnewa naxŭ. ² Rŭ moxŭãcŭ ga yexguma yangunegu, rŭ wenaxärŭ tupauca

ga taxũnecèx nataegu. Rũ ga duũxũgũ rũ naxcèx naxĩ. Rũ nũma ga Ngechuchu rũ ínaruũto, rũ inanaxũgũ ga na nangũexẽẽaxũ ga duũxũgũ. ³ Rũ yema ngũexẽẽeruũgũ ga Moĩchearũ mugũwa nguxẽẽtaegũxũ rũ Parichéugũ, rũ Ngechuchuxũtawa ngĩxũ nagagũ ga wũxi ga nge ga aĩtecũ ga ngĩxũ nadaugũcũ ga naĩ ga yatũmaã na inapexũ. Rũ guxũma ga yema duũxũgũ ga yema yexmagũxũpẽxegu ngĩxũ nayachixẽẽgũ. ⁴ Rũ ñanagũrũgũ Ngechuchuxũ: —Pa Ngũexẽẽruũx, ñaã nge i aĩtecũ rũ ngĩxũ itayangau na naĩ ya yatũmaã na inapexũ. ⁵ Moĩchearũ mugũwa tamaã nũxũ nixu na nutamaã ngĩxũ ímuxũchiãcũma ngĩxũ imáxũ i wũxi i nge i ngẽmaãcũ maxũcũ. ¿Ñuxũ ñacuxũ i cuma i ñuxmax? —ñanagũrũgũ. ⁶ Rũ yema ñanagũrũgũ ga nũmagũ, yerũ Ngechuchuxũ guxchaxũgu nanguxẽẽgũchaũ na nũxũ nayexmaxũcèx ga tacũcèx na ínaxuaxũgũãxũ. Natũrũ ga Ngechuchu rũ inayarũmaxãchi rũ inanaxũgũ ga naxmẽxmaã waixũmũwa na naxũmatũãxũ. ⁷ Natũrũ nũxũ nacèxũgũama, rũ yemacèx dũxwa wenaxãrũ nadaunagũ ga Ngechuchu, rũ ñanagũrũ nũxũ: —Ngexerũxe i petanũwa ya ngearũ pecaduãxẽ rũ tũxira nuta ngĩxũ tanaña —ñanagũrũ. ⁸ Rũ wenaxãrũ inayarũmaxãchi ga Ngechuchu rũ naxmẽxmaã nanaxũmatũ ga waixũmũwa. ⁹ Natũrũ yexguma nũxũ naxĩnũẽgu ga yema ore ga Parichéugũ rũ inanaxũgũe ga nũgũ na yawũxĩxũ ga nũgũwe na ínachoxũxũ. Rũ yaguãxgũ ga Parichéugũwa inaxũgũ ga na ínachoxũxũ rũ dũxwa guxũma ínachoxũ. Rũ yexguma marũ

guxŭma ga Parichéugŭ íchoŭxgu, rŭ Ngechuchu rŭ yema ngecŭxicatama yéma duŭxŭgŭpĕxewa nayaxŭgŭ. ¹⁰ Rŭ yexguma ga Ngechuchu rŭ wena nadaunagŭ. Rŭ ngĭxna naca rŭ ñanagŭrŭ ngĭxŭ: —Pa Ngecŭx, ¿Ngĕxŭgŭ nixĭ i ngĕma cuxŭ ixugŭexŭ? ¿Rŭ taxuŭma cuxŭ imáxchaŭ? —ñanagŭrŭ. ¹¹ Rŭ ngĭma rŭ ngĭgŭrŭgŭ nŭxŭ: —Taxuŭma Pa Corix —ngĭgŭrŭgŭ. Rŭ yexguma ga Ngechuchu rŭ ñanagŭrŭ ngĭxŭ: —Choma rŭ ta tama cuxŭ chapoxcu. Ñuxma rŭ marŭ name rŭ íquixŭ rŭ tama wena pecadu cuxŭ —ñanagŭrŭ.

Ngechuchu rŭ ñoma i naãneãrŭ ngóonex- ěĕruŭ nixĭ

¹² Rŭ wenaxãrŭ duŭxŭgŭmaã nidexa ga Ngechuchu, rŭ ñanagŭrŭ nŭxŭ: —Choma nixĭ i ñoma i naãnecŭãxãrŭ ngóonexěĕruŭ. Rŭ yĭxema chowe rŭxŭxĕ rŭ chorŭ ngóonexŭwa tangĕxma rŭ tŭxna chanaxã i maxŭ. Rŭ tá nŭxna ítanguxuchi i tŭmaãrŭ chixexŭ —ñanagŭrŭ. ¹³ Rŭ yexguma ga Parichéugŭ rŭ ñanagŭrŭgŭ nŭxŭ: —Cuma rŭ cugŭchigaxŭtama quixu. Rŭ ngĕma cuchiga i nŭxŭ quixuxŭ rŭ taxuwama name —ñanagŭrŭgŭ. ¹⁴ Rŭ Ngechuchu nanangãxŭ rŭ ñanagŭrŭ nŭxŭ: —Rŭ ngĕma ore i chauchiga nŭxŭ chixuxŭ rŭ aixcŭma nixĭ woo chomatama yixĭgu i namaã chaugŭétŭwa chidexaxŭ. Erŭ choma rŭ nŭxŭ chacuèx i ngextá ne chaxŭxŭ, rŭ ngextá tá chaxŭxŭ. Natŭrŭ pema rŭ tama nŭxŭ pecuèx na ngextá ne chaxŭxŭ rŭ tama nŭxŭ pecuèx na ngextá tá chaxŭxŭ. ¹⁵ Pema rŭ choxŭ pengugŭ i ñoma i naãnecŭãx i duŭxŭgŭ nagu rŭxŭnŭĕxŭãcŭmamare. Natŭrŭ i choma rŭ taxŭexŭma changugŭ. ¹⁶ Natŭrŭ ngĕxguma chi

texéxŭ changugügu rŭ aixcüma meãma tüxŭ changugü. Erŭ tama chaxicatama tüxŭ changugü, natürŭ yima Chaunatü ga núma choxŭ mucümaã nixĩ i wüxigu tüxŭ tangugüxŭ. ¹⁷ Rŭ ngẽma mugü ga Moĩché ũmatüxŭ i nagu pexĩxŭ, rŭ ñanagürŭ:

“Ngẽxguma taxre i duŭxŭgü rŭ wüxitama i orexŭ yaxugügu, rŭ ngẽmawa ãẽxgacü nüxŭ nacuèx na aixcüma yĩixŭ i ngẽma nüxŭ yaxugüexŭ”, ñanagürŭ. ¹⁸ Rŭ dücax, choma nixĩ i wüxi i chauchigaxŭ chixuxŭ rŭ Chaunatü ga núma choxŭ mucü nixĩ ya naĩ. ¿Rŭ tüxcüŭ tama choxŭ peyaxõgüchaŭ i ñuxmax? —ñanagürŭ. ¹⁹ Rŭ yexguma ga nümagü rŭ nüxna nacagüe rŭ ñanagürügü: —¿Ngexcü ya yima Cunatü? —ñanagürügü. Rŭ Ngechuchu nanangãxŭ rŭ ñanagürŭ: —Choxŭ rŭ tama pecuèx rŭ Chaunatüxŭ rŭ ta tama pecuèx. Rŭ ngẽxguma chi choxŭ pecuèxgügu rŭ Chaunatüxŭ rŭ chi ta pecuèxgü —ñanagürŭ. ²⁰ Rŭ yema orexŭ nixu ga Ngechuchu ga yexguma nanguxẽtaegu ga tupauca ga taxŭnewa naxŭtawa ga yema nachica ga ngextá duŭxŭgü tupaucana dĩeru ngĩxŭ íxãgüxŭwa. Natürŭ taxuŭma Ngechuchuxŭ niyauxgü, yerü tauta nawa nangu ga yema ngunexŭ ga nagu yayauxgüãxŭ.

Ngechuchu rŭ Parichéugümaã nüxŭ nixu rŭ ngextá nüma ínaxŭxŭwa rŭ taxucürŭwa ngema naxĩ

²¹ Rŭ Ngechuchu rŭ wenaxärŭ namaã nüxŭ nixu, rŭ ñanagürŭ: —Choma rŭ tá pexna chixŭ i núma, rŭ pema rŭ tá chauxcèx pedaugü, natürŭ tá perü pecadugu peyue. Rŭ ngextá íchaxŭxŭwa rŭ taxucürŭwama ngema pexĩ —ñanagürŭ. ²² Rŭ yexguma ga yema Yudíugü rŭ ñanagürügü: —¿Éxna nügü tátama nimèx rŭ ngẽmacèx tamaã nüxŭ

yaxuxŦ na taxucŦrŦwama ngema ixŦxŦ i ngema ínaxŦxŦwa? —ñanagŦrŦgŦ. ²³ RŦ Ngechuchu ñanagŦrŦ nŦxŦ: —Pema rŦ ñoma i naâneçŦâx i duŦxŦgŦ pixŦgŦ, natŦrŦ i choma rŦ daxŦguxŦ i naânewa ne chaxŦ. Pema rŦ ñoma i naâneârŦ duŦxŦgŦ pixŦgŦ natŦrŦ i choma rŦ tama ñoma i naâneçŦâx chixŦ. ²⁴ —RŦ ngẽmacèx pemaã nŦxŦ chixu rŦ tá perŦ pecadugu peyue. ErŦ ngẽxguma tama choxŦ peyaxŦgŦgu na choma çhŦxŦ ya Cristu, rŦ perŦ pecadugu tá peyue —ñanagŦrŦ. ²⁵ RŦ yexguma nŦxna nacagŦe, rŦ ñanagŦrŦgŦ: —¿NatŦrŦ texé quixŦ i cumax? —ñanagŦrŦgŦ. RŦ Ngechuchu nanangãxŦ, rŦ ñanagŦrŦ: —MarŦ noxritama pemaã nŦxŦ chixu na texé çhŦxŦ. ²⁶ — RŦ choma rŦ choxŦ nangẽxma i muxŦma i ÷acŦ i chomatama pexŦ changúexẽçhaŦxŦ rŦ ÷acŦcèx pexna na chaçaxŦ, natŦrŦ tãŦtãma chanaxŦ i ngẽma. ErŦ yima Chaunatu ga núma choxŦ mucŦ chomaã nŦxŦ ixuxŦ i orexŦcatama nixŦ i ñoma i naâneçŦâxgŦmaã nŦxŦ chixuxŦ. RŦ guxŦma i ngẽma nŦxŦ yaxuxŦ ya Chaunatu, rŦ aixçŦma nixŦ —ñanagŦrŦ. ²⁷ NatŦrŦ nŦmagŦ rŦ tama nŦxŦ nacuèxgŦéga ga Nanatu ya Tupanachiga na yŦxŦ na yema ñaxŦ ga Ngechuchu. ²⁸ RŦ yemacèx ga Ngechuchu rŦ ñanagŦrŦ nŦxŦ: —Choma nixŦ i Tupana Nane i duŦxŦxŦ çhŦxŦ. RŦ yixçŦra ngẽxguma curuchawa choxŦ pipotagŦgu, rŦ tá nŦxŦ picuèxãchitanŦ na Cristu na çhŦxŦ. RŦ tá nŦxŦ pecuèx na taxuŦma chauechamatama chaxŦxŦ. RŦ ngẽma Chaunatu chomaã nŦxŦ ixuxŦçŦcatama nixŦ i pemaã nŦxŦ chixuxŦ. ²⁹ —Yima núma choxŦ mucŦ ya Chaunatu rŦ chauxŦtawana nangẽxma. RŦ taguma choxna nixŦgachi, erŦ

choma rü guxŭguma chanaxü i ngēma norü ngúchaŭ ixĩxŭ —ñanagürü. ³⁰ Rü yexguma yema ñaxgu ga Ngechuchu rü muxŭma ga duŭxŭgü nüxŭ nayaxōgü.

Yíxema Tupanaxãcügü ixĩgüxechiga, rü yíxema pecadutüüwa ngēxmagüxechiga

³¹ Rü yexguma ga Ngechuchu rü ñanagürü nüxŭ ga yema Yudíugüarü ãëxgacügü ga nüxŭ yaxōgüxŭ: —Ngēxguma pema meãma peyaxōgüechagu i ngēma pemaã nüxŭ chixuxŭ, rü aixcūmaxŭchi tá chorü ngüexŭgü pixĩgü. ³² —Rü tá nüxŭ pecuèx i ore i aixcūma ixĩxŭ. Rü ngēma ore tá pexŭ ínanguxŭxëë —ñanagürü. ³³ Rü nümagü rü Ngechuchuxŭ nangãxŭgü, rü ñanagürügü: —Toma rü nuxcūmaŭcü ga torü oxí ga Abráŭtaa tixĩgü rü taguma texémëxëwa tangëxmagü. ¿Ñuxãcü i cumax rü tá na ítanguxŭxŭ, ñacuxŭ? —ñanagürügü. ³⁴ Rü Ngechuchu ñanagürü nüxŭ: —Aixcūma pemaã nüxŭ chixu rü guxãma ya pecaduãxë rü pecadutüüwa tangëxmagü. ³⁵ —Wüxi i coriarü duŭxŭmare rü tama norü coripatacŭãx nixĩ. Natürü wüxi i cori nane rü guxŭguma nanatü nane nixĩ. ³⁶ —Choma rü Tupana Nane chixĩ. Rü ngëxguma chi choma pecaduna pexŭ íchanguŭxëëgu, rü aixcūma tá nüxna ípenguŭ. ³⁷ —Marü nüxŭ chacuèx na Abráŭtaa pixĩgüxŭ i pemax. Natürü choxŭ pimëxgüchaŭ erü tama aixcūma choxŭ peyaxōgü i ngēma ore i pemaã nüxŭ chixuxŭ. ³⁸ —Choma rü yema Chaunatü choxŭ wéxŭ nixĩ i pemaã nüxŭ chixuxŭ. Natürü pema rü penaxü i ngēma penatü pemaã nüxŭ ixuxŭ —ñanagürü ga Ngechuchu. ³⁹ Rü nümagü rü

NgechuchuxŦ nangãxŦ rŦ ñanagŦrŦgŦ: —TorŦ oxŦ nixŦ ga AbrãŦ —ñanagŦrŦgŦ. NatŦrŦ Ngechuchu nanangãxŦ rŦ ñanagŦrŦ nŦxŦ: —Ngẽxguma chi aixcŦma AbrãŦtaa pixŦgŦgu rŦ chi AbrãŦ ũxŦrŦŦ penaxŦ. ⁴⁰ —NatŦrŦ woo pemaã nŦxŦ chixu i ore i aixcŦma ixŦxŦ ga ChaunatŦ ga Tupana choxŦ ngŦxẽẽxŦ, rŦ pema rŦ choxŦ pimẽxgŦchaŦ. NatŦrŦ ga AbrãŦ rŦ taguma yemaãcŦ nanaxŦ. ⁴¹ —Pema rŦ penaxŦ i penatŦgŦcŦmatama —ñanagŦrŦ. RŦ yexguma ga nŦmagŦ rŦ ñanagŦrŦgŦ: —Toma rŦ tama tangŦrŦwaŦgŦmare, rŦ toxŦ nangẽxma ya wŦxitama ya tonatŦ. RŦ yima nixŦ ya Tupana —ñanagŦrŦgŦ. ⁴² RŦ Ngechuchu nanangãxŦ, rŦ ñanagŦrŦ nŦxŦ: —Ngẽxguma chi aixcŦma Tupana yixŦgu ya penatŦ rŦ choxŦ chi pengechaŦ, erŦ choma rŦ TupanaxŦtawa nixŦ i ne chaxŦxŦ, rŦ ngẽmacèx chanuxma. RŦ tama chauechamatama nŦma chaxŦ, natŦrŦ nŦma chaxŦ yerŦ ChaunatŦ ya Tupana nŦma choxŦ namu. ⁴³ —¿TŦxcŦŦ tama nŦxŦ pecuèxéga i ngẽma pemaã nŦxŦ chixuxŦ? PexŦ naguxcha erŦ woetama tama iperŦxŦnŦẽchaŦ i ngẽma pemaã nŦxŦ chixuxŦ i ore. ⁴⁴ —PenatŦ rŦ Chataná nixŦ rŦ pema rŦ naxãcŦgŦ pixŦgŦ. RŦ ngẽmacèx penaxŦ i ngẽma nŦma pexŦ nanaxwèxexŦ. RŦ ngẽma Chataná rŦ noxriarŦ ũgŦgumama wŦxi i máẽtaxŦ nixŦ. RŦ taguma ore i aixcŦmaxŦgu narŦxŦnŦ rŦ taguma ore i aixcŦmaxŦ nixu. RŦ ngẽxguma yadeaxgu rŦ doraxŦxŦcatama nixu, erŦ nŦma rŦ wŦxi i doratèxãxŦ nixŦ. RŦ guxŦma i doratèxãxŦnatŦ nixŦ. ⁴⁵ —NatŦrŦ i pema rŦ tama choxŦ peyaxŦgŦchaŦ erŦ ore i aixcŦmaxŦ chixu. ⁴⁶ —¿Texé ya petanŦwa choxŦ dauxe na

pecadu chaxüxü? Rŭ ñuxma na nüxü chixuxü i ore i aixcüma ixixü, rŭ çtŭxcüŭ tama choxü peyaxögü? ⁴⁷ —Texé ya Tupanaärü duüxü ixixé rŭ itarüxĩnŭ i Tupanaärü ore. Natürŭ i pema rŭ tama Tupanaärü duüxügü pixigü, rŭ ngëmacèx nixĩ i tama iperüxĩnŭẽchaüxü i Tupanaärü ore —ñanagürŭ.

Tauta nangoxgu ga Abráŭ rŭ Cristu rŭ marŭ nayexma

⁴⁸ Rŭ yexguma ga yema Yudíugüarŭ ãëxgacügü rŭ ñanagürügü nüxü: —Rŭ aixcüma nixĩ ga yema torŭ ore ga yexguma ñatagügü:

“Cuma rŭ wüxi i Chamáriacŭãx quixĩ, rŭ ngoxo cuwa nangëxma”, ñatagügü —ñanagürügü. ⁴⁹ Rŭ Ngechuchu nanangãxü, rŭ ñanagürŭ nüxü: —Chowa rŭ nataxuma i ngoxo. Rŭ ngëma chaxüxü nixĩ na Chaunatüxü chicuèxüüxü, natürŭ i pema rŭ chixri chauchiga pidexagü. ⁵⁰ —Choma rŭ tama naxcèx chadau na texé choxü icuèxüügüxücèx. Natürŭ Tupana nixĩ ya naxwèxecü na duüxügü choxü icuèxüügüxü. Rŭ nüma tá nanapoxcue i ngëma chauxchi aiexü. ⁵¹ —Aixcüma pemaã nüxü chixu, rŭ texé ya naga ñnuxé i ngëma tümamaã nüxü chixuxü rŭ guxügutáma tamaxëcha —ñanagürŭ.

⁵² Rŭ yexguma ga yema Yudíugüarŭ ãëxgacügü, rŭ Ngechuchuxü nangãxügü, rŭ ñanagürügü: —Ñuxma rŭ meãxüchima nüxü tacuèx na cuwa nangëxmaxü i wüxi i ngoxo. Yerŭ ga Abráŭ rŭ guxüma ga nuxcümaügüxü ga Tupanaärü orearŭ uruügü rŭ nayue. Natürŭ cuma rŭ ñuxma tomaã nüxü quixu rŭ texé ya naga ñnuxé i ngëma curŭ ore rŭ guxügutáma tamaxëcha —ñacurügü. ⁵³ —¿Éxna

cuma rü tórü օxi ga AbráŮärü yexera quixĩ? Yerü nüma rü nayu rü guxŮma ga nuxcŮmaŮgŮxŮ ga Tupanaärü orearü uruŮgü rü ta nayue. ¿Rü cugŮcèx rü texé quixĩ? —ñanagŮrŮgü. ⁵⁴ Rü Ngechuchu nanangãxŮ, rü ñanagŮrŮ nŮxŮ: —Ega chaugŮ chitama chicuèxŮŮgu rü ngẽma rü taxuwama name. Natürü yima choxŮ icuèxŮŮcŮ rü Chaunatü nixĩ. Rü yima Chaunatütama nixĩ ya perü Tupana ixĩcŮ —ñapegŮcŮ nŮxŮ. ⁵⁵ —Natürü i pema rü tama aixcŮma nŮxŮ pecuèx ya Chaunatü ya Tupana. Natürü i choma rü ngẽmããcŮ nŮxŮ chacuèx. Rü ngẽxguma chi:

“Tama nŮxŮ chacuèx”, ñachaxgu, rü pexrŮŮ chi wŮxi i doratèxãxŮ chixĩ. Natürü i choma rü aixcŮmaxŮchima nŮxŮ chacuèx ya Chaunatü ya Tupana, rü naga chaxĩnŮ i guxŮma i norü ore i chomaã nŮxŮ yaxuxŮ. ⁵⁶ —Perü օxi ga AbráŮ rü nataãẽ yerü aixcŮma nayaxŮ rü tá na íchanguxŮ i ñoma i naãnewa. Rü yemaxŮ nacuèx rü yemacèx nataãẽ —ñanagŮrŮ ga Ngechuchu. ⁵⁷ Rü yexguma ga yema YudiŮgŮarü ãèxgacŮgü rü NgechuchuxŮ nangãxŮgü, rü ñanagŮrŮgü: —Cuma rü tauta 50 ya taunecŮ cuxŮ nangèxma. ¿ÑuxãcŮ AbráŮxŮ cudau ga tauta cunŮoxgux ga yexguma? —ñanagŮrŮgü. ⁵⁸ Rü Ngechuchu nanangãxŮ rü ñanagŮrŮ nŮxŮ: —AixcŮma pemaã nŮxŮ chixu rü tauta AbráŮ ngoxgu rü choma rü marü chayexma —ñanagŮrŮ. ⁵⁹ Rü yexguma ga nŮmagü rü nutane nanayauxgü na gumamaã ínamuxŮchigŮãxŮcèx. Natürü ga Ngechuchu rü naxchaxwa inicux. Rü yemaãcŮ ínaxŮxŮ nawa ga guma tupauca ga taxŮne.

9

Ngechuchu nanamexêê ga wüxi ga yatü ga norü bucüma ngexetücü

¹ Rü yexguma namagu tomaã yaxüxgu ga Ngechuchu, rü yéma nüxü nadau ga wüxi ga yatü ga woetama norü bucüma ngexetücü. ² Rü toma ga norü ngúexügü rü nüxna tacagü, rü ñatarügügü: —Pa Ngúexêêruüx, ¿Tüxcüü ngexetücüma nabu ya daa yatü? ¿Éxna nanatü rü naêärü pecadugagu rü éxna norü pecadugagutama? —ñatarügügü. ³ Rü Ngechuchu toxü nangãxü, rü ñanagürü toxü: —Tama norü pecadugagu rü tama i nanatü rü naêärü pecadugagu nixi i ngêmaäcü nabuxü. Natürü ngêmaäcü nabu na nawa nüxü pedauxüçèx na ñuxäcü Tupana tüxü na rümexêêxü. ⁴ —Rü ñoma rü ta nangune rü name nixi na paxama na naxüxü i ngêma puracü ya Chaunatü ga núma choxü mucü tüxna äxü. Erü paxa tá nachüta rü ngêxguma rü taxucürüwama texé tá tapuracü. ⁵ —Rü ñuxma na ñoma i naãnewa changêxmaxü rü ñoma i naãneärü ngóonexêêruü chixi —ñanagürü. ⁶ Rü yexguma yema ñaxguwena rü Ngechuchu waixü müãnewa nacuaxi. Rü yema waixü mü ga iwaixümaã nanachaxetü ga guma yatü ga ngexetücü. ⁷ Rü yexguma guma ngexetücüxü ñanagürü: —¡Dexámaã cugü yayauxetü i Chiruéarü puchuwa! —ñanagürü. Rü ngêma naega rü “Tüxü muxü”, ñaxüchiga nixi. Rü yéma naxü ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü. ⁸ Rü yexguma ga yema duüxügü ga guma ngexetücüpataarü ngaicamagu pegüxü

rü yema duũxũgũ ga ũpaacũ nüxũ daugũxũ ga na nangexetũxũ, rü ñanagũrũgũ: —¿Taux êxna i ñaã yĩixũ ga yema yatũ ga ngexetũchirẽxũ ga duũxũgũxũ dĩerucẽx cẽexũxũ? —ñanagũrũgũ. ⁹ Rü nümaxũ rü ñanagũrũgũ: —Ngẽmããcũ nüma nixĩ —ñanagũrũgũ. Rü togũ rü ñanagũrũgũ: —Tama nixĩ i yima yĩxũ, natũrũ nanangẽxgumaraũxũchi —ñanagũrũgũ. Natũrũ nümatama ga guma yatũ ga ngexetũchirẽcũ, rü ñanagũrũ: —Ngẽmããcũ choma chixĩ —ñanagũrũ. ¹⁰ Rü yexguma ga yema duũxũgũ rü nüxna nacagũ rü ñanagũrũgũ: —¿Rũ ñuxãcũ nixĩ i marũ quidauchixũ i ñuxmax? —ñanagũrũgũ. ¹¹ Rü nüma nanangãxũ rü ñanagũrũ: —Yima yatũ ya Ngechuchugu ãegacũ rü yima waixũmũãnewa nacuaxi. Rü yema waixũmũ ga iwaixũmaã choxũ nachaxetũ. Rü ñanagũrũ choxũ: “¡Yẽa Chiruẽarũ puchuwa naxũ rü ngẽma dexãmaã cugũ yayauxetũ!” ñanagũrũ choxũ. Rü yẽma chaxũ, rü yexguma dexãmaã chaugũ chayauxetũgu rü chidauchi —ñanagũrũ ga guma yatũ. ¹² Rü yexguma nüxna nacagũe, rü ñanagũrũgũ: —¿Ngextã nangẽxmaxũ i ñuxma ya yima yatũ ya cuxũ rümexẽẽcũ? —ñanagũrũgũ. Rü nüma ga guma yatũ ga ngexetũchirẽcũ rü ñanagũrũ: —Tama nüxũ chacuẽx —ñanagũrũ.

Parichẽugũ rü guma ngexetũcũ ga Ngechuchu namexẽẽcũna nacagũe

¹³⁻¹⁴ Natũrũ yema ngunexũ ga Ngechuchu nagu namexẽẽxũ ga guma ngexetũcũ, rü ngũxchigaarũ ngunexũ nixĩ. Rü yemacẽx ga duũxũgũ rü Parichẽugũxũtawa nanagagũ ga guma yatũ ga ngexetũchirẽcũ. ¹⁵ Rü yexguma ga yema

Parichéugü rü nüxna nacagüe ga guma yatü, rü ñanagürügü: —¿Ñuxäcü i marü curümexëtüxü i ñuxmax? —ñanagürügü. Rü nüma nanangäxü rü ñanagürü: —Waixümü ga naxbüxágümaã yawaixëëxümaã choxü nachaxetü ga Ngechuchu, rü ñuxüchi dexámaã chaugü chayayauxetü, rü ngëmacèx marü chidauchi —ñanagürü. ¹⁶ Rü yexguma ga ñuxre ga Parichéugü rü ñanagürügü: —Yema yatü ga cuxü rümexëëxü rü tama Tupanaärü duüxü nixi, erü tama nanaxaure i ngüxchigaarü ngunexü —ñanagürügü. Natürü togü ga Parichéugü rü ñanagürügü: —¿Ñuxäcü nanaxü i ngëma cuèxruü i mexü i taxü ega wüxi i pecaduäxü yixixgux? —ñanagürügü. Rü yemaäcü nügü nitoye ga nagu naxinüëxüwa ga yema Parichéugü. ¹⁷ Rü wena nüxna nacagüe ga guma yatü ga ngexetüchirécü, rü ñanagürügü: —¿Natürü cuma rü ñuxü ñacuxü nachiga i ngëma yatü ga cuxü rümexëëxü? —ñanagürügü. Rü nüma nanangäxü, rü ñanagürü: —Chauxcèx rü wüxi i Tupanaärü orearü uruü nixi —ñanagürü. ¹⁸ Natürü ga yema Yudiugüarü äëxgacügü rü tama nüxü nayaxögüchaü ga nüma na yixü ga na nangexetüchiréxü ga noxrix, rü ñuxma rü marü na yadauchixü. Rü yemacèx ga yema äëxgacügü rü tümacèx nangemagü ga nanatü rü naë ga guma yatü ga rümexëtücü. ¹⁹ Rü tüxna nacagü, rü ñanagürügü: —¿Daa yixü ga guma pene ga nüxü pixucü ga woetama ngexetüäcü bucü? ¿Ñuxäcü i ñuxma i yadauchixü? —ñanagürügü. ²⁰ Rü nanatü rü naë tanangäxügü rü ñatarügügü: —Ngëmääcü nüxü tacuèx rü daa nixi ya tone ga

ngexetüãcüma buchirécü. ²¹ Natürü tama nüxü tacuèx ga ñuxãcü na yadauchixü i ñuxmax. Rü tama nüxü tacuèx ga texé na namexëtüxëëxü. ¡Ëcü nüxnatama pecagü! Erü nüma rü marü naya, rü nümatama pemaã nüxü na yaxuxüçèx —ñatarügügü. ²² Rü yema ñatarügügü ga nanatü rü naë, yerü tamuñë. Yerü ga Yudíugüarü ãëxgacügü rü marü nügümaã nanamexëëgü na tüxü ínatëxüchigüxüçèx ga ngutaquëxepataüwa ga texé ga Ngechuchuaxü yaxõxë na Cristu yíxü. ²³ Rü yemacèx nixí ga nanatü rü naë ga ñatagügüxü: “¡Ëcü, nüxnatama pecagü! Erü nüma rü marü naya rü nümatama pemaã nüxü na yaxuxüçèx”, ñatagügüxü. ²⁴ Rü yexguma ga yema Yudíugüarü ãëxgacügü rü wenaxärü naxcèx nacagü ga guma ngexetüchirécü. Rü ñanagürügü nüxü: —Rü ñuxma tanaxwèxe i Tupanapëxewa rü aixcüma tomaã nüxü quixu na texé cuxü rümexëëxü. Erü toma rü meãma nüxü tacuèx i ngëma Ngechuchu rü wüxi i pecaduãxü na yíxü —ñanagürügü. ²⁵ Rü nüma nanangãxü rü ñanagürü nüxü: —Choma rü tama nüxü chacuèx ega wüxi i pecaduãxü yixígu rü éxna tama. Rü ngëma nüxü chacuãxü nixí ga na changexetüchiréxü ga noxrix rü ñuxma rü na chidauchixü —ñanagürü. ²⁶ Rü wenaxärü nüxna nacagüe, rü ñanagürügü: —¿Rü tacü nixí ga cumaã naxüxü? ¿Rü ñuxãcü ga naxüãxü ga cuxü na yadauchixetüxëëxü? —ñanagürügü. ²⁷ Rü nanangãxü rü ñanagürü nüxü: —Marü pemaã nüxü chixu, rü tama choxü iperüxíñüëchaü. ¿Tüxcüü penaxwèxe na wena pemaã nüxü chixuxü? ¿Éxna pema rü ta nüxü

peyaxōgüchaŦ? —ñanagürü. ²⁸ RŦ yexguma rŦ guma yatümaã chixexŦ nixugüe, rŦ ñanagürügü: —CumaērŦ nixŦ i nüxŦ cuyaxōxŦ i ngēma yatü, natürŦ i toma rŦ MoŦchéarŦ oreaxŦ nixŦ i tayaxōgüxŦ. ²⁹ —Toma rŦ nüxŦ tacuèx ga Tupana rŦ aixcüma MoŦchémaã na yadexaxŦ, natürŦ ngēma Ngechuchu rŦ tama nüxŦ tacuèx na ngextá na ne naxŦxŦ —ñanagürügü. ³⁰ RŦ guma yatü nanangāxŦ, rŦ ñanagürŦ nüxŦ: —¿Ñuxācü nixŦ i ngēma? Nüma rŦ marŦ choxŦ narümexētüxēē, natürŦ ¿ñuxācü i pema i tama nüxŦ pecuáxŦ na ngextá ne naxŦxŦ? ³¹ —RŦ guxāma i yixema rŦ meāma nüxŦ tacuèx rŦ Tupana tama nüxŦ naxŦnŦ i pecaduāxgüxŦārŦ yumüxē. NatürŦ Tupana rŦ tüxŦ nüxŦ naxŦnŦ i tümaārŦ yumüxē ya yŦxema nüxŦ icuèxüügüxe rŦ naxŦxe i TupanaārŦ ngüchaŦ. ³² —Taguma ñuxgu nüxŦ taxŦnŦchiga i wüxi i yatü na yadauchixēēāxŦ i wüxi i duŦxŦ i norŦ bucüma ngexetüxŦ. ³³ —RŦ ngēxguma chi tama Tupana núma namüxgux ya daa yatü ya choxŦ rŦmexēēcü, rŦ taxuacü chima mexŦ naxŦ —ñanagürŦ ga guma yatü ga ngexetüchirécü. ³⁴ RŦ yexguma ga yema YudŦgüarŦ āēxgacügü, rŦ ñanagürügü nüxŦ: —Cuma na pecadugu na cubuxŦ, ¿rŦ ñuxācü cunaxwēxe na toxŦ cungüxēēchaŦxŦ? —ñanagürügü. RŦ ñuxŦchi ínanatèxüchigŦ ga ngutaquēxepataŦwa.

DuŦxŦgü i tama yaxōgüxŦ rŦ ngexetüxŦrŦrŦ nixŦgü

³⁵ RŦ Ngechuchu rŦ nüxŦ nacuáchiga ga na ínatèxüchigüāxŦ ga guma ngexetüchirécü. RŦ yexguma nüxŦ nadèuxgu, rŦ ñanagürŦ

nüxŦ: —¿NüxŦ cuyaxõxŦ ya Tupana Nane ya duŦxŦxŦ ixĩcü? —ñanagŦrŦ. ³⁶ RŦ yexguma ga nüma rŦ NgechuchuxŦ nangãxŦ rŦ ñanagŦrŦ: —Pa Corix, ¡chomaã nüxŦ ixu na texe yĩxŦ na nüxŦ chayaxõxŦcèx! —ñanagŦrŦ. ³⁷ RŦ Ngechuchu nanangãxŦ, rŦ ñanagŦrŦ: —MarŦ nüxŦ cudau ya Tupana Nane. RŦ chomatama nixĩ i cumaã na íchidexaxŦ chiŦxŦ —ñanagŦrŦ. ³⁸ RŦ yexguma ga guma yatŦ ga ngexetŦchirécŦ rŦ Ngechuchupèxegu nacaxãpŦxŦ, rŦ nüxŦ nicuèxŦŦ, rŦ ñanagŦrŦ nüxŦ: —Ngẽmaãcü cuxŦ chayaxõ, Pa Corix —ñanagŦrŦ. ³⁹ RŦ yexguma ga Ngechuchu rŦ ñanagŦrŦ: —RŦ ñoma i naãnewa chaxŦ na chayadexechixŦcèx i chorŦ duŦxŦgŦ nüxna i ngẽma duŦxŦgŦ i tama choxrŦ ixĩgŦxŦ. RŦ nuã chaxŦ na chanameèxèxŦcèx i ngẽma duŦxŦgŦ i noxri tama TupanaxŦ cuèxgŦxŦ. RŦ ngèxgumarŦŦ ta núma chaxŦ na duŦxŦgŦ i tama choxŦ cuèxgŦchaŦxŦxŦ chanawéxŦ na duŦxŦgŦ i ngexetŦxŦrŦŦ na yixĩgŦxŦ, erŦ tama choxŦ nayaxõgŦchaŦ —ñanagŦrŦ. ⁴⁰ RŦ ñuxre ga ParichéugŦ ga yéma Ngechuchumaã yexmagŦxŦ, rŦ yexguma yema orexŦ naxĩnüègu, rŦ Ngechuchuna nacagŦ, rŦ ñanagŦrŦgŦ: —¿Éxna toma rŦ ta tama TupanaxŦ tacuèxgŦ ñacuxŦ? —ñanagŦrŦgŦ. ⁴¹ RŦ Ngechuchu nanangãxŦ rŦ ñanagŦrŦ nüxŦ: —Ngèxguma chi tama aixcüma TupanaxŦ pecuèxgŦgu rŦ tãŦ chima pegagu nixĩ na pepecaduãxgŦxŦ. NatŦrŦ ngẽma na pegŦ pixuxŦ na TupanaxŦ pecuáxŦ rŦ ngẽmacèx pegagutama nixĩ na pepecaduãxgŦxŦ i ñuxmax —ñanagŦrŦ.

10

Carnerugüarü dauruü rü norü carnerugü

¹ Rū yexguma ga Ngechuchu rü ñanagürü: — Rū aixcūma pemaã nüxü chixu rü ngēma yatü i tama carnerupúxüârü ãxwa ixücuxü rü wüxi i ngîtèxáxü nixĩ i ngēma, erü ngextámare nixücu. ² —Natürü ngēma carnerupúxüârü ãxwa meãma ixücuxü, rü ngēma nixĩ i norü dauruüxüchi i carnerugü. ³ —Rū ngēma yatü i carnerupúxüârü ãxna dauxü rü nayawãxna i ãx na yaxücuxüçèx i carnerugüarü dauruü. Rū nūma i carnerugü rü nüxü nacuèxgü i naga i ngēma norü dauruü. Rū ngēma norü dauruü rü wüxichigü i norü carneru rü naegamaã naxcèx naca na ínamuxüãxüçèx i naxpúxüwa. ⁴ —Rū ngëxguma ínamuxüãxgu i guxüma i norü carnerugü, rü nūma i norü dauruü rü napëxegu nixüchigü. Rū nūmagü i carnerugü rü nawe narüxĩ, erü nüxü nacuèxgü i naga. ⁵ — Natürü ngëxguma wüxi i yatü i tama aixcūma norü dauruü ixixü, rü tama nawe narüxĩ i ngēma carnerugü. Rū nüxna naxĩgü, erü tama nüxü nacuèxgü i naga i ngēma tama norü dauruü ixixü —ñanagürü ga Ngechuchu. ⁶ Rū Ngechuchu rü duüxügümaã nüxü nixu ga yema ore ga cuèxruü, natürü ga nūmagü rü tama nüxü nacuèxgüéga ga tacüchiga na yĩxü.

Ngechuchu rü carneruarü dauruü ya mecü nixĩ

⁷ Rū yexguma ga Ngechuchu rü wenaxârü ñanagürü nüxü: —Aixcūma pemaã nüxü chixu rü choma nixĩ i carnerupúxüârü ãx i nawa yachocuxüxü i carnerugü. ⁸ Guxüma ga yema

chopegu nüxira núma ïxŭ rü ngŭtèèxgŭxŭ rü máétagŭxŭ nixŭgŭ. Natürü yema carnerugŭ rü tama naga naxŭnŭē. ⁹ Choma nixŭ i ïāx. Rŭ texé ya chowa ixŭcuxe rü tá tamaxŭ. Rŭ meāma tá tŭxŭ naxŭpetŭ ngēxgumarŭŭ i wŭxi i carneru i naxpŭxŭgu ŭcuxŭ rü íxŭxŭxŭxŭ rü nüxŭ iyangaucŭ ya mecŭ ya maxē. ¹⁰ Ngēma ngŭtèxáxŭ rü núma naxŭ na yangŭxŭcèx rü namáétaxŭcèx rü nachixexēēxŭcèx. Rŭ ngēmacèxicatama núma naxŭ. Natürü i choma rü núma chaxŭ na chanamaxēxŭcèx i duŭxŭgŭ rü na aixcŭma nüxŭ nangēxmaxŭcèx i maxŭ i taguma gŭxŭ. ¹¹ Choma nixŭ i carneruarŭ dauruŭ ya mecŭ chíxŭ. Erŭ wŭxi i carneruarŭ dauruŭ ya mecŭ rü norŭ carnerugŭxŭ ínapoxŭ rü ñŭxmata naxcèx nayux. ¹² Natürü ngēma dŭerucèxmare puracŭxŭ, rü ega ngēxguma aixŭ nadèuxgux rü carnerugŭna ngēma niña. Rŭ ngēmaācŭ nanaxŭ erŭ tama aixcŭma norŭ dauruŭ nixŭ i nümax, rü tama noxrŭ nixŭ i ngēma carnerugŭ. Rŭ ngēma ai rü carnerugŭxŭ ínayauxŭ rü ngēxma tŭxŭ naxŭanexēēmare. ¹³ Rŭ ngēma yatŭ rü niña, erŭ norŭ dŭerucèxicatama ngēma napuracŭ. Rŭ tama aixcŭma carnerugŭgu narŭxŭnŭ. ¹⁴⁻¹⁵ Choma nixŭ i carnerugŭarŭ dauruŭ ya mecŭ chíxŭ. Rŭ ngēxgumarŭŭ ya Chaunatŭ na choxŭ nacuáxŭ rü choma rü Chaunatŭxŭ na chacuáxŭ, rü ngēxgumarŭŭ ta nüxŭ chacuèx i chorŭ carnerugŭ, rü nümagŭ rü choxŭ nacuèxgŭ. Rŭ choma rü naxcèx chayu i chorŭ carnerugŭ. ¹⁶ Rŭ choxŭ nangēxmagŭ ta i togŭ i carnerugŭ i tama ñā naxpŭxŭwa ngēxmagŭxŭ. Rŭ ngēmagŭ rü tá ta nuā chanagagŭ, rü tá chauga naxŭnŭē. Rŭ wŭxitŭcumŭ

tátama nixĩ rü choma tátama nixĩ i norü dauruŦ chĩxũ. ¹⁷ Chaunatu rü choxũ nangechaũ, erü chorü carnerugücèx chayu rü wena táxaru chamaxũ. ¹⁸ Taxúema choxũ tayuxẽẽ, natürü chomatama chorü ngúchaũmaãtama ichanaxã i chorü maxũ. Erü choxmẽxwa nangẽxma na ichanaxãxücèx, rü wena na chanayaxuxücèx, yerü yemaãcü choxũ namu ga Chaunatu — ñanagürü. ¹⁹ Rü yexguma yema orexũ naxĩnũegu ga yema Yudíugüaru ãëxgacügü rü wenaxãrü nügü nitoye ga yema nagu naxĩnũëxüwa. ²⁰ Rü muxüma ga nümagü rü ñanagürügü: —¿Tüxcüũ nüxũ iperüxĩnũe i ñãã yatü i ngẽãëxü i ngoxo nawa ngẽxmaxũ? —ñanagürügü. ²¹ Natürü ga togü rü ñanagürügü: —Taxuũma i yatü i ngoxo nawa ngẽxmaxũ rü ñããrũũ meã nidexa. ¿Ñuxãcü i wüxi i yatü i ngoxo nawa ngẽxmaxũ rü tüxũ narümexëtüxẽẽ ya wüxi ya ngexetüxe? —ñanagürügü.

Yudíugüaru ãëxgacügü rü Ngechuchuxü naxoe

²² Rü nawa nangu ga yema peta ga gucü ga taunecügu norü tupauca ga taxü necèx naxügüxũ ga Yudíugü na nüxna nacuèãchigüxücèx ga yema ngunexũ ga nagu yanguxũ ga guma tupauca. Rü nagáuane ga Yerucharéüwa ga yexguma. ²³ Rü guma tupauca ga taxünewa nayexma ga wüxi ga chopetüchica ga Charumóũãrü Chopetüchicagu ãegaxũ. Rü yemagu nayarüxũxũ ga Ngechuchu. ²⁴ Rü ga yema Yudíugüaru ãëxgacügü rü nüxũ ínachomaëguãchi, rü ñanagürügü nüxũ: — ¿Ñuxgurátata tomaã quixaixcüma na cügü quixuxũ na texé na quiĩxũ? Ega aixcüma cuma rü Cristu

quixĩgu, rü jmeã noxtacüma tomaã nüxũ ixu! —ñanagürügü. ²⁵ Rũ Ngechuchu nanangãxũ, rü ñanagürü nüxũ: —Marü pemaã nüxũ chixu, natürü i pema rü tama choxũ peyaxõgü. Guxũma i tacü i chaxüxũ rü Chaunatüarü poramaã nixĩ i chanaxüxũ, rü ngẽmawa meãma pexũ nüxũ chadauxẽẽ na choma rü Cristu na chiĩxũ. ²⁶ —Natürü pema rü tama peyaxõgü, erü tama chorü carnerugütanüxũ pixĩgü. ²⁷ —Chorü carnerugü rü nüxũ nacuèx i chauga, rü choma rü chorü carnerugüxũ chacuèx, rü nüma rü chowe narüxĩ. ²⁸ —Rũ choma rü nüxna chanaxã i maxũ i taguma gúxũ. Rũ nümagü rü tagutáma inayarütauxe, rü taxúetáma choxna tanapuxũ i choxmẽxwa. ²⁹ —Rũ yíxema Chaunatü choxna tũxũ mugüxe ya chorü carnerugü, rü guxũãrũ yexera tixĩ i napẽxewa. Rũ taxúema texé nüxna tũxũ tapuxũ. ³⁰ —Chaunatü rü choma rü wüxitama tixĩgü —ñanagürü. ³¹ Rũ yexguma ga yema Yudiugüarü ãẽxgacügü rü wenaxãrũ nutane nanayauxgü na gumamaã Ngechuchuxũ ínamuxũchigüxũcèx. ³² Natürü ga Ngechuchu rü ñanagürü nüxũ: —Pepẽxewa chanaxü i muxũma i mexügü i Chaunatüarü poramaã chaxüxũ. ¿Rü ngẽxürüüxũ i ngẽma mexü i chaxüxũcèx nixĩ i choxũ nutamaã ípemukũchigüchaũxũ? —ñanagürü. ³³ Rũ yema Yudiugüarü ãẽxgacügü rü Ngechuchuxũ nangãxügü, rü ñanagürügü: —Tama wüxi i puracü i mexücèx cuxũ ítamuxũchigüchaũ. Natürü cuxũ ítamuxũchigüchaũ erü Tupanamaã rü tacü quixugü. Cuma rü wüxi i duũxũmare quixĩ rü cugü Tupanaxũ quixĩxẽẽchaũ —ñanagürügü. ³⁴ Rũ nüma ga Ngechuchu rü ñanagürü nüxũ: —

Perü mugüpanewa rü naxümatü i Tupanaãrü ore i ñaxũ:

“Rü pematama nixĩ i tupanagü pixĩgüxũ”,
 ñaxũ. ³⁵ —Rü ngẽma Tupanaãrü ore i ümatüxüwa
 nüxũ yaxuxũ, rü nüxũ tacuèx rü taxucürüwama
 texé itayanaxoxêê. Rü ngẽma orewa rü Tupana rü
 ñanagürü:

“Guxãma ya yíxema texé yanayauxgüxe i chorü ore
 rü tupanagü tixĩgü”,

ñanagürü i ngẽma orewa. ³⁶ —Rü Tupana choxũ
 nayaxu na chanaxüxcèx i norü puracü, rü
 yemacèx ñoma ga naãnewa choxũ namu. ¿Rü
 ñuxãcü i pema nagu perüxĩnüëgu rü chixexũ
 Tupanamaã chaxüxũ i ngëxguma Tupana Nane
 chixĩ —ñachagu pemaã? ³⁷ —Rü ngëxguma chi
 tama chanaxüxgu i ngẽma mexũ i Chaunatü üxũ,
 rü marü name ega woo tama choxũ peyaxögügu.

³⁸ —Natürü ngëxguma chanaxüxgu i ngẽma
 Chaunatü üxũ, rü woo tama choxũ peyaxögügu,
 rü chanaxwexe i nüxũ peyaxögü i ngẽma taxũ
 i mexügü i Chaunatüarü poramaã chaxüxũ.
 Erü ngẽmawa tá nüxũ pecuèx na Chaunatü rü
 chowa nangëxmaxũ rü choma i nawa —ñanagürü.

³⁹ Rü wenaxãrü Ngechuchuxũ niyauxgüchaũ ga
 yema Yudiügüarü aëxgacügü. Natürü nüma ga
 Ngechuchu rü naxchaxwa niña. ⁴⁰ Rü yexguma ga
 Ngechuchu rü natü ga Yudáũãrü tocutücèx tomaã
 nataegu. Rü yema nachica ga Cuáũ duüxügüxũ
 üpaacü nawa íbaiüxêëxügu tomaã narüxãüx.

⁴¹ Rü muxüma ga duüxügü rü Ngechuchuxũ
 ínayadaugü, rü ñanagürügü: —Cuáũ rü taxuüma
 ga taxũ ga mexũ ga cuèxruũ naxü ga Tupanaãrü
 poramaã. Natürü guxüma ga ore ga Cuáũ tamaã

nüxü ixuxü ga ñaã yatüchiga rü aixcüma nixĩ — ñanagürügü. ⁴² Rü yema nachicawa rü muxüma ga duüxügü rü Ngechuchuaxü nayaxögü.

11

Dácharuarü yuxchiga

¹ Nayexma ga wüxi ga yatü ga idaawecü ga Dácharugu äegacü. Rü nüma rü naëyèxgü ga María rü Marta rü ñãne ga Betániãcüãx nixīgü. ² Rü yema María iyixĩ ga Cori ga Ngechuchucutügu pumara bacü rü ñuxüchi ngïyaemaã ínapicutücü. Rü guma Dácharu ga idaawecü nixĩ ga ngïeneë. ³ Rü poraãcü nidaawe ga Dácharu. Rü yemacèx ga naëyèxgü, rü Ngechuchuxütawa imugagü, rü ngïgürügügü: “Pa Corix, cumücü ya Dácharu ya nüxü cungechaücü rü nidaawe”, ngïgürügügü. ⁴ Rü yexguma yema orexü naxĩnügu ga Ngechuchu, rü ñanagürü: —Ngëma daawe rü täütáma yumaã inayacuèx. Natürü nidaawe na duüxügü nüxü nadaugüxücèx na ñuxãcü naporaxü ya Tupana rü ñuxãcü choma i Nane rü ta na chaporaxü —ñanagürü. ⁵ Rü Ngechuchu poraãcü María rü Marta rü Dácharuxü nangechaü. ⁶ Natürü yexguma nüxü naxĩnügu ga na yadaawexü ga Dácharu, rü tama paxa ínayadau. Rü taxre ga ngunexüãmatama yexma narüxãüx ga yema nachica ga nawa nayexmaxüwa. ⁷ Rü yixcama ga yemawena rü toxü ñanagürü: —¡Ngïã rü wena Yudéaanewa taxĩ! —ñanagürü. ⁸ Rü toma ga norü ngúexügü rü ñatarügügü nüxü: —Pa Ngúexëruüx, yexwacatama nixĩ ga yemacüãx ga Yudíugüarü äëxgacügü yexma nutamaã cuxü ímuxüchigüchaüxü. ¿Rü tüxcüü

wena ngema cuxŭchaŭ i ñuxmax? —ñatarügügü.
 9 Rŭ Ngechuchu rŭ tomaã nüxŭ nixu ga wŭxi
 ga ore na nüxŭ tacuèxgŭxŭcèx na tauta nawa
 nanguxŭ na nayuxŭ ga nümax. Rŭ ñanagŭrŭ toxŭ:
 —¿Taux éxna i wŭxi i ngunexŭ rŭ 12 i ora nawa
 ngèxmaxŭ? Ngèxguma texé ngunecü ixŭxgu rŭ
 tama tacümaã itayarüña, erü tŭmacèx nangóone.
 10 —Natŭrŭ ngèxguma wŭxie chŭtacü ixŭxgu
 rŭ ngémaãcü tacümaã itayarüña, erü tŭmacèx
 naxèãne —ñanagŭrŭ. Rŭ yemaãcü nanangoxèe na
 tauta nawa nanguxŭ na nayuxŭ ga nümax. 11 Rŭ
 yemawena ga Ngechuchu rŭ ñanagŭrŭ toxŭ: —
 Tamücü ya Dácharu rŭ napemare. Natŭrŭ ñuxma
 rŭ tá chayabaixächixèe —ñanagŭrŭ. 12 Rŭ yexguma
 ga toma ga norü ngúexŭgŭ rŭ ñatarügügü: —Pa
 Corix, ega napemaregu, rŭ ngémawa nüxŭ tacuèx
 na naxcèx tá yataanexŭ —ñatarügügü. 13 Natŭrŭ
 ga Ngechuchu rŭ nüxŭ nixuxchaŭchirèx ga
 Dácharu ga marü na nayuxŭ. Natŭrŭ ga toma
 nüxŭ tacuèxgŭgu rŭ na napemarexŭchigaxŭ yŭxŭ
 ga tomaã yaxuxŭ. 14 Rŭ yexguma ga Ngechuchu rŭ
 meãma tomaã nüxŭ nixu rŭ ñanagŭrŭ: —Dácharu
 rŭ marü nayu. 15 —Natŭrŭ choma rŭ chataãe na
 tama ngema changèxmaxŭ, erü ngémaãcü nixŭ i
 namemaèxŭ i pexcèx na choxŭ peyaxögŭxŭcèx.
 ¡Rŭ ngŭxã rŭ itayadaugŭ! —ñanagŭrŭ. 16 Rŭ yema
 nayexma ga totanŭxŭ ga Tumachi ga Wŭxigu
 Buexŭ ga Taxreèxpŭxŭmaã, naxugŭxŭ. Rŭ nüma
 ga Tumachi rŭ ñanagŭrŭ toxŭ: —¡Ngŭxã i yixema
 rŭ ta ngema taxŭ na wŭxigu Ngechuchumaã
 iyuxŭcèx! —ñanagŭrŭ.

Ngechuchu nixŭ i wena namaxèxèxŭ i yuxŭ

17 Rŭ yexguma Betániãwa tomaã nanguxgu ga Ngechuchu, rŭ marŭ ãgŭmŭcŭ ga ngunexŭ nangupetŭ ga na iyatèxgŭãxŭ ga Dácharu. 18 Rŭ guma Betániã rŭ Yerucharéŭãrŭ ngaicamana nayexma. Rŭ tomaëxpŭx ga kilómetru nixŭ ga norŭ yaxŭ. 19 Rŭ muxŭma ga Yudiŭgŭ rŭ Dácharueyèx ga Marta rŭ Maríaxŭtawa naxŭ na ngŭxŭ yataãèxègŭxŭcèx, yerŭ nayu ga ngŭèneè. 20 Rŭ yexguma Marta nüxŭ cuèxgu ga marŭ na ínanguxŭ ga Ngechuchu, rŭ nüxŭ iyatŭxãchi. Natŭrŭ ga María rŭ Ìxgutama irŭxãŭx. 21 Rŭ Marta rŭ ngŭgŭrŭgŭ nüxŭ ga Ngechuchu: —Pa Corix, yexguma chi cuma cunumèxgu rŭ tãŭ chima nayu ga chaueneè. 22 —Natŭrŭ choma nüxŭ chacuèx na woo i ñŭxma na nayuxŭ, rŭ Tupana tá cuxna nanaxã i guxŭma i tacŭ i naxcèx ícuçaxŭ —ngŭgŭrŭgŭ. 23 Rŭ Ngechuchu ngŭxŭ nangãxŭ rŭ ñanagŭrŭ: —Cueneè rŭ wena tá namaxŭ —ñanagŭrŭ. 24 Rŭ Marta ngŭgŭrŭgŭ nüxŭ: —Ngẽmããcŭ nüxŭ chacuèx rŭ wena tá namaxŭ i ngèxguma naguxgu i naãne rŭ ngèxguma wena namaxègu i guxŭma i yuexŭ —ngŭgŭrŭgŭ. 25 Rŭ yexguma ga Ngechuchu rŭ ñanagŭrŭ: —Choma nixŭ i íchanadagŭxèèxŭ i yuexŭgŭ, rŭ wena chanamaxèèxŭ. Rŭ yixema choxŭ yaxõxè rŭ woo tayuxgu rŭ tá wenaxãrŭ tamaxŭ. 26 —Rŭ guxãma ya texé ya maxŭxè rŭ choxŭ yaxõxè, rŭ guxŭgutãma tamaxŭ. ¿Cuyaxõxŭ yŭxŭ i ngẽma? —ñanagŭrŭ ga Ngechuchu. 27 Rŭ ngŭma rŭ ngŭgŭrŭgŭ nüxŭ: —Ngŭ, Pa Corix, choma rŭ chayaxõ na cuma rŭ Tupana Nane ya Cristu ga ítananguxècŭ na quiŭxŭ —ngŭgŭrŭgŭ.

Dácharu itáxŭwa naxaxu ga Ngechuchu

28 Rŭ yema ñaxguwena rŭ Marta rŭ ngĩeyèx ga Maríacè x iyaca. Rŭ bexma ngĩmaã nüxŭ iyarŭxu, rŭ ngĩgŭrŭgŭ: —Marŭ nuã nangu ya Ngúexēēruŭ ya Ngechuchu, rŭ choxŭ cuxcèx nay-acaxēē —ngĩgŭrŭgŭ. 29 Rŭ yexguma María nüxŭ ñngu ga marŭ yéma na nanguxŭ ga Ngechuchu, rŭ paxa ichi, rŭ Ngechuchuxŭ íyadau. 30 Rŭ Ngechuchu rŭ tauta ññewa nangu ga yexguma, rŭ yema nachica ga Marta nüxŭ ídauxŭwatama nixŭ ga nayexmaxŭ. 31 Rŭ Maríapatawa nayexma ga ñuxre ga yémacŭãx ga Yudíugŭarŭ ãëxgacŭgŭ ga ngĩxŭ yéma taãëxëëgŭxŭ. Rŭ yexguma ngĩxŭ nadaugŭgu ga paxa na inachixŭ rŭ na ínaxŭxŭxŭ, rŭ ngĩwe narŭxŭ. Yerŭ nŭma nüxŭ nacuèxgŭgu rŭ yéma Dácharu itáxŭwa ixŭ na yéma yaxaxuxŭcèx. 32 Rŭ yexguma Ngechuchuxŭtawa nanguxgu ga María, rŭ napèxegu iyacaxãpŭxŭ, rŭ ngĩgŭrŭgŭ: —Pa Corix, yexguma chi cuma cunumèxgu rŭ tãŭ chima nayu ga chaueneē ya Dácharu —ngĩgŭrŭgŭ. 33 Rŭ yexguma Ngechuchu ngĩxŭ dèuxgu ga na naxaxuxŭ rŭ na naxauxexŭ ga yema Yudíugŭarŭ ãëxgacŭgŭ ga ngĩwe rŭxŭxŭ, rŭ poraãcŭ ngechaŭ nüxŭ nangŭx. 34 Rŭ Ngechuchu nŭxna naca rŭ ñnanagŭrŭ: —¿Ngexta nixŭ i ipenatáxŭ? —ñnanagŭrŭ. Rŭ nŭmagŭ nanangãxŭ rŭ ñnanagŭrŭgŭ: —Pa Corix, ¡dŭcax, nuã naxŭ, rŭ íyadau! —ñnanagŭrŭgŭ. 35 Rŭ naxaxu ga Ngechuchu. 36 Rŭ yema Yudíugŭ rŭ ñnanagŭrŭgŭ: —¡Dŭcèx ñuxãcŭ poraãcŭ Dácharuxŭ nangechaŭ! —ñnanagŭrŭgŭ. 37 Natŭrŭ ñuxre ga yema ãëxgacŭgŭ ga Yudíugŭarŭ rŭ ñnanagŭrŭgŭ: —Daa nixŭ ga guma yatŭ ga ngexetŭcŭxŭ rŭmexëëcŭ.

¿Rü tüxcüŷ taxucürüwa tacü rü mexŷ Dácharucèx naxü na tama nayuxŷcèx? —ñanagürügü.

Wenaxãrü namaxŷ ga Dácharu

³⁸ Rü Ngechuchu poraãcü ngechaŷ nüxŷ nangux rü Dácharumaxŷcèx nixü. Rü wüxi ga mèxpŷneãrü ãxmaxŷ nixĩ ga yema naxmaxŷ. Rü nayexma ga wüxi ga nuta ga norü ngŷxtaŷruŷ.
³⁹ Rü Ngechuchu rü ñanagürü: —¡Ípenangŷgachix ya yima nuta ya namaã nangŷxtaŷcü! — ñanagürü. Natürü ga Marta ga Dácharueyèx rü ngŷgürügü: —Pa Corix, cuxã marü nayixane nixĩ, erü marü ãgümücü i ngunexŷ naetü nixĩ ga na nayuxŷ —ngŷgürügü. ⁴⁰ Natürü ga Ngechuchu rü ñanagürü ngŷxŷ: ¿Taux èxna i marü cumaã nüxŷ chixuchiréxŷ rü ngèxguma cuyaxõxgu rü tá nüxŷ cudau i wüxi i mexŷ i taxŷ i Tupana üxŷ? —ñanagürü. ⁴¹ Rü yexguma ínanangŷgachigü ga guma nuta. Rü Ngechuchu daxŷgu nadawenüãcüma ñanagürü: — Pa Chaunatü Pa Tupanax, moxè cuxna chaxã erü marü choxŷ cuxĩnü. ⁴² —Choma nüxŷ chacuèx rü guxŷguma choxŷ cuxĩnü. Natürü moxè cuxna chaxã i ñuxma erü chanaxwèxe i ñãã duŷxŷgü na yaxõgüãxŷ na cuma núma choxŷ cumuxŷ —ñanagürü. ⁴³ Rü yexguma yema ñaxguwena, rü tagaãcü ñanagürü: —Pa Dácharux, jínaxŷxŷ i ngema! —ñanagürü. ⁴⁴ Rü ínaxŷxŷ ga Dácharu ga naxchápenüãmaã guxŷwama rübuxpŷxŷcü. Rü Ngechuchu ñanagürü nüxŷ ga duŷxŷgü: — ¡Ípeyawèxpŷxŷ na íyaxŷxŷcèx! —ñanagürü.

*Āēxgacügü naxcèx nadaugü na ñuxãcü
Ngechuchuxü yayauxgüxü*

(Mt 26.1-5; Mr 14.1-2; Lc 22.1-2)

⁴⁵ Rū yema Yudíugüarü āēxgacügü ga Mariawe rüxixü rü nüxü nadaugü ga yema Ngechuchu üxü, rü muxüma Ngechuchuaxü nayaxōgü ga yexguma nüxü nadaugügu ga ñuxãcü wena Dácharuxü na namaxēēxü. ⁴⁶ Natürü ñuxre ga yema āēxgacügü rü Parichéugümaã nüxü nayarüxugü ga yema Ngechuchu üxü. ⁴⁷ Rū yexguma ga yema Parichéugü rü paigüarü āēxgacügü rü nangutaquēxegü namaã ga guxüma ga yema āēxgacügütücümüwa ügüxü. Rū ñanagürügü: —¿Tacü tá taxüe? Erü ñaã yatü i Ngechuchu rü nanaxü i muxüma i mexü i cuēxruügü. ⁴⁸ —Ngēxguma chi tama yayauxgügu, rü guxütáma i duüxügü rü tá nüxü nayaxōgü, rü Dumacüāxgüarü churaragü rü núma chi naxī rü nagu napogüe ya tórü tupauca ya taxüne, rü düxwa tãü chima tóxrü nixī i ñaã tachiüāne —ñanagürügü. ⁴⁹ Natürü guma taunecügu rü yema paigütanüwa rü Caipá nixī ga norü āēxgacü. Rū nüma rü ñanagürü nüxü: —Pemagü rü taxuüma pecuèx. ⁵⁰ —¿Éxna tama nüxü pecuèx rü taxcèx rü na namemaēxü na wüxitama i yatü guxü i duüxügücèx na yuxü, na tama nayuexücèx i guxüma i tachiüānecüāx i duüxügü? —ñanagürü. ⁵¹ Natürü ga Caipá rü tama nüēchama yema ñanagürü, yerü guma taunecügu rü nüma nixī ga paigüarü āēxgacü yixü. Rū yemacèx rü Tupana nixī ga Caipáwa idexacü ga yexguma nüxü yaxuxgu na Ngechuchu rü guxüma i Yudíugücèx tá na nayuxü. ⁵² Rū yema orewa

rü nanangoxêê na tama Yudíugücèxicatama tá na nayuxŭ, natürü guxŭma i Tupanaârü duŭxŭgŭ i guxŭ i nañnewa ngëxmagŭxŭcèx rü tá ta na nayuxŭ, na ngëmaâcü wüxigu nangutaquëxexŭcèx i guxŭma i ngëma duŭxŭgŭ i Tupanaârü ixŭgŭxŭ.

⁵³ Rü yexgumaücüü nixŭ ga inaxŭgŭeãxŭ ga Yudíugŭarü âëxgacŭgŭ ga nagu na naxŭnŭëxŭ ga ñuxãcü tá na Ngechuchuxŭ yamèxgŭxŭ. ⁵⁴ Rü yemacèx ga Ngechuchu rü marü tama yema Yudíugŭ ímoxŭtanŭgu naxã. Rü tomaã ínaxŭxŭ ga Yudéanewa, rü wüxi ga ñanexãcü ga Efraŭgu äeganewa naxŭ. Rü yexma tomaã narŭxãŭx. Rü guma ñane rü wüxi ga nachica ga ngextá taxúema íxãpataxŭârü ngaicamana nayexma. ⁵⁵ Rü marü ningaica ga yema Yudíugŭarü peta ga Üpetŭchiga. Rü yemacèx muxŭma ga duŭxŭgŭ ga náí ga ñanecŭãx rü Yerucharéŭwa naxŭ na Tupanacèx nŭgŭ yamexëëgŭxŭcèx naxŭpa ga yema peta.

⁵⁶ Rü Ngechuchucèx nadaugŭ ga duŭxŭgŭ. Rü tupauca ga taxŭnewa nŭgŭna nicagŭetanŭ, rü ñanagŭrŭgŭ: —¿Ñuxŭ ñapegŭxŭ i pemax? ¿Ñoma i petawa tá naxŭxŭ rü ëxna tama? —ñanagŭrŭgŭ.

⁵⁷ Rü yema Parichéugŭ rü paigŭarü äëxgacŭgŭ rü duŭxŭgŭna naxãgagŭ, rü ñanagŭrŭgŭ: —Ngëxguma ngextá nŭxŭ pedaugŭgu i ngëma Ngechuchu, ¡rŭ tomaã nŭxŭ peyarŭxu na tayayauxgŭxŭcèx! —ñanagŭrŭgŭ.

12

*Wüxi ga nge rü Ngechuchucutŭgu pumara iba
(Mt 26.6-13; Mr 14.3-9)*

¹ RŦ 6 ga ngunexŦ naxŦpa ga ŦpetŦchigaarŦ peta, rŦ Ngechuchu rŦ tomaã Betániãwa naxŦ. RŦ guma iãne nixŦ ga nagu naxãchixŦne ga Dãcharu ga Ngechuchu wena namaxẽẽcŦ.
² RŦ yẽma DãcharuchixŦwa Ngechuchucèx nanaxŦgŦ ga taxŦ ga õna. RŦ totanŦwa ga yema mechawa yexmagŦxe rŦ Dãcharu nixŦ ga NgechuchuxŦtawaama chibŦcŦ. RŦ Marta iyixŦ ga inaxŦcŦ ga õna. ³ RŦ yexguma ga María rŦ yẽma inange ga wŦxi ga taxŦraweŦxŦ ga pumara ga yixichixŦ rŦ tatanŦxŦchixŦ. RŦ NgechuchuxŦ namaã iyixcutŦ. RŦ ñuxŦchi ngŦyaemaã ínapicutŦ. RŦ guma í rŦ guxŦwama nayixmachŦã namaã ga yema pumara. ⁴⁻⁵ RŦ yexguma ga Yuda ga Icaríute ga wŦxi ga totanŦxŦchirèx ixixŦ ga yixcama bexma cúãcŦ NgechuchuxŦ íxuaxŦxŦ, rŦ ñanagŦrŦ: —¿TŦxcŦ tama tatanŦxŦgu namaã itaxe i ngẽma pumara na ngẽma dŦãrumaã nŦxŦ nangŦxẽẽxŦcèx i ngẽma duŦxŦgŦ i ngearŦ dŦãruãxgŦxŦ? —ñanagŦrŦ. ⁶ NatŦrŦ ga Yuda rŦ tama aixcŦma nagu narŦxŦnŦ ga yema ngearŦ dŦãruãxgŦxŦ. NatŦrŦ yema ñanagŦrŦ yerŦ nŦma rŦ wŦxi ga ngŦtèxãxŦ nixŦ. RŦ naxmèxwa nayexma ga yema choca ga dŦãru ngŦxŦ nagu taxŦgŦxŦ ga guxãma ga toma ga NgechucharŦ ngúexŦgŦ. RŦ Yuda rŦ ñuxguacŦ rŦ noxrŦxŦtama ngŦxne nangŦxŦxŦ. ⁷ RŦ yexguma ga Ngechuchu rŦ ñanagŦrŦ nŦxŦ: —¿TãxŦ i ngŦxŦ cuchixewexŦ! ErŦ choma rŦ paxa tá chayu rŦ tá ichatèx. RŦ ngẽmacèx nixŦ i ngẽma pumaramaã choxŦ nachaxŦ. ⁸ —Ngẽma ngearŦ dŦãruãxgŦxŦ rŦ guxŦgutãma petanŦwa nangèxmagŦ. NatŦrŦ i

choma rü täütáma guxũgu petanüwa changẽxma
—ñanagürü.

*Paigüarü ãẽxgacügü rü nügümaã nanamexẽẽgü
ga ñuxãcü Dácharuxũ tá na yamèxgüxũ*

⁹ Rü muxüma ga Yudíugü rü nüxũ nacuáchiga
ga Betániãwa na nayexmaxũ ga Ngechuchu.
Rü yéma naxĩ na nüxũ nadaugüxũcèx. Rü
tama Ngechuchuxũxĩcatama nadaugüchaũ
natürü nüxũ nadaugüchaũ ta ga Dácharu ga
Ngechuchu wena namaxẽẽcü. ¹⁰ Rü yexguma
ga paigüarü ãẽxgacügü rü nügümaã nanamexẽẽgü
ga Dácharuxũ rü ta na yamèxgüxũcèx. ¹¹ Yerü
Dácharugagu nixĩ ga muxüma ga Yudíugü ga
Ngechuchuaxũ yaxõgüãxũ rü yema paigüna
naxĩgüxũ.

*Ngechuchu rü Yerucharéũgu naxücu
(Mt 21.1-11; Mr 11.1-11; Lc 19.28-40)*

¹² Rü muxüma ga duũxügü rü Yerucharéũwa
naxĩ naxcèx ga Üpetüchigaarü peta. Rü moxüãcü
duũxügü nüxũ nacuáchigagü ga Ngechuchu rü
guma ñãnewa na nanguxchaũxũ. ¹³ Rü yexguma
moruatüta nadaũgü rü yemamaã Ngechuchuxũ
nayatüxgütanüãchi. Rü tagaãcü ñanagürügü: —¡Rü
naxüüne rü namecümaxüchi ya daa Tupanaégagu
núma ücü! ¡Rü yixema na Iraétanüxũ ixĩgüxũ
rü namecümaxüchi ya daa tórü ãẽxgacü! —
ñanagürügü. ¹⁴ Rü Ngechuchu nüxũ inayangau
ga wüxi ga buru, rü naetügu naxaunagü ga yema
Tupanaãrü ore ga ümatüxũ nüxũ ixuxürüũ ga
yexguma ñaxgu:

15 “¡TãxŦ i pemuŦẽxŦ, Pa YerucharẽcŦãxgŦx! ¡RŦ iperũdaunũ na ngema ne naxũxŦ ya perũ ãẽxgacũ ya wũxi i buru i íraxŦetũgu au-nagũcũ!”

ñaxŦ. 16 RŦ noxri ga toma ga norũ ngũexũgũ rŦ tama nũxŦ tacuẽxgũẽga ga Ngechuchuchiga na yĩxŦ ga yema ore. Natũrũ yixcũra marũ Ngechuchu Tupanaxũtawa ũxgu, rŦ yexguma nixĩ ga nũxna tacuẽxãchiexŦ ga guxũma ga yema NgechuchuxŦ ngupetũxŦ, rŦ yema Tupanaãrũ ore nũxŦ ixuxũãcũtama nũxŦ na nangupetũxŦ.

17 RŦ yema duũxũgũ ga Ngechuchuxũtawa yexmagũxŦ ga yexguma DãcharuxŦ wena namaxẽẽgu, rŦ nũxŦ nixugũe ga yema nũxŦ nadaugũxŦ.

18 RŦ yemacẽx nixĩ ga duũxũgũ ga NgechuchuxŦ yatũxãchitanũxŦ na nayauxgũãxũcẽx, yerũ nũxŦ nacuãchigagũ ga yema taxŦ ga mexŦ ga Tupanaãrũ poramaã naxũxŦ. 19 Natũrũ ga yema Parichẽgũ rŦ nũgũmaã ñanagũrũgũ: —Marũ nũxŦ pedauxŦ i ñuxma na taxucũrũwama tacũ namaã ixũxŦ. ¡RŦ dũcax, guxũma i duũxũgũ rŦ nawe narũxĩ! —ñanagũrũgũ.

Griẽgũgũ rŦ NgechuchuxŦ nadaugũchaĩ

20 RŦ muxũma ga duũxũgũ rŦ petacẽx Yerucharẽũwa naxĩ na yẽma TupanaxŦ na yanacuẽũũgũxũcẽx. RŦ yema duũxũgũtanũwa nayexma ga ñuxre ga Griẽgũgũ. 21 RŦ yema Griẽgũgũ rŦ Piripicẽx naxĩ. RŦ nũma ga Piripi rŦ Garirẽaaneãrũ iãne ga Bechaĩdacũãx nixĩ. RŦ nũxŦ nacẽexũgũ rŦ ñanagũrũgũ: —Pa Corix, nũxŦ tadauxchaũ ya Ngechuchu —ñanagũrũgũ. 22 RŦ Piripi rŦ Aũdrẽmaã nũxŦ nayarũxu. RŦ yema taxre

rü wüxigu Ngechuchuxütawa naxĩ, rü namaã nüxũ nayarüxugü. ²³ Rü yexguma ga Ngechuchu rü ñanagürü nüxũ: —Rü marü nawa nangu tá na chayuxũ rü wenaxârü Chaunatüxütawa tá na chaxũxũ i choma i Tupana Nane i duũxũxũ chiĩxũ. ²⁴ —Rü aixcüma pemaã nüxũ chixu rü ngëxguma chi wüxipüxü i trigu tama waixũmüãnegu toxgu rü wüxipüxüechatama nixĩ. Natürü ega waixũmügu natoxgu, rü ngema naxüxgu, rü muxüchinema ínguxuchi. [Rü ngëxgumarüũ tá ta Tupanaxütawa nangugü i muxüma i duũxügü ega chayuxgux.] ²⁵ —Rü pemaã nüxũ chixu rü texé ya yixema tümaãrü maxũxũ ngechaũxẽ i ñoma i naãnewa rü tá itayarütaxu. Natürü texé ya yixema tama tümaãrü maxũxũ ngechaũxẽ rü tama yuxü muũxẽ i ñoma i naãnewa, rü tá tüxũ nangëxma i maxü i taguma gúxũ. ²⁶ —Rü ngëxguma texé choxü puracüchaũgu rü name nixĩ i chowe tarüxũ. Rü ngema choma tá íchangëxmaxüwa rü ngema rü tá ta tangëxma i tümax. Rü ngëxguma texé choxü puracügu rü Chaunatü ya Tupana rü tá tümamaã nataãẽ — ñanagürü.

Ngechuchu nanaxunagü ga norü yuxchiga

²⁷ —Rü Ngechuchu ñanagürü: —Rü ñüxma rü poraãcü changechaũ rü chanaxixãchiãẽ. ¿Rü tacüxũ tá Chaunatümaã chixuxũ? Taxucürüwa ñamaã nüxũ chixu na choxü ínguxuchixëxüçèx na tama chayuxüçèx, erü woetama ngëmacèx núma chaxü —ñanagürü. ²⁸ Rü ñanagürü: —Pa Chaunatüx, ¿Choxü rüngüxëẽ na duũxügüpëxewa cuxü chataxëxüçèx! —ñanagürü. Rü yexguma ga yema duũxügü ga yéma yexmagüxũ rü nüxũ

naxĩnũẽ ga wũxi ga naga ga daxũwa inaxũxũ
 ga ñaxũ: —Marũ cuxũ charũngũxẽẽ na choxũ
 cutaxẽẽxũ ga noxrix, rũ wena táxarũ cuxũ
 charũngũxẽẽ na choxũ cutaxẽẽxũcèx —ñanagũrũ
 ga yema naga. ²⁹ Rũ yema duũxũgũ ga yema
 yexmagũxũ ga nũxũ ñnũẽxũ ga yema naga,
 rũ ñanagũrũgũ: —Wũxi i duruanexũ nixĩ —
 ñanagũrũgũ. Natũrũ togũ rũ ñanagũrũgũ: —Wũxi
 i Tupanaãrũ orearũ ngeruũ i daxũcũãx nixĩ i
 namaã idexaxũ —ñanagũrũgũ. ³⁰ Rũ yexguma ga
 Ngechuchu rũ ñanagũrũ nũxũ: —Tama chauxcèx
 nixĩ i nũxũ pexĩnũẽxũ i ngẽma naga. Rũ pexcẽxtama
 nixĩ i nũxũ pexĩnũẽxũ. ³¹ —Rũ ñuxma tá nixĩ
 i Tupana inaxũgũãxũ na tũxũ napoxcuxũ ya
 duũxẽ naxcèx i tũmaãrũ pecadugũ. Rũ ñuxma
 tá nixĩ i Tupana ínatèxũchixũ i ngẽma ñoma i
 naãnewa poraxũ i Chataná. ³² —Rũ ngẽxguma
 curuchawa chipotagu rũ chaugũxũtawá tá
 chanagagũ i guxũma i duũxũgũ —ñanagũrũ ga
 Ngechuchu. ³³ Rũ yema orewa duũxũgũmaã
 nũxũ nixu ga ñuxãcũ tá na nayuxũ. ³⁴ Rũ yema
 duũxũgũ nanangãxũgũ, rũ ñanagũrũgũ: —Torũ
 mugũ i ùmatũxũwa nũxũ tadaugũ na guxũgutáma
 namaxẽchaxũ ya Cristu. ¿Rũ ñuxãcũ i cuma rũ
 ñacurũgũ: “Rũ Tupana Nane ya duũxũxũ ixĩcũ
 rũ curuchawa tá nipota”, ñacurũgũ? ¿Rũ texé
 tixĩ ya yixema Tupana Nane ya duũxũxũ ixĩxẽ?
 —ñanagũrũgũ. ³⁵ Rũ yexguma ga Ngechuchu rũ
 ñanagũrũ nũxũ: —Ñoma rũ ta petanũwa changẽxma
 na ñoma i naãnewa pexũ changũexẽẽxũcèx
 rũ ngẽmaãcũ pexũ changóonetanũxẽẽxũcèx.
 Natũrũ paxaãchicèxicatama petanũwa changẽxma.

Rü name nixĩ i paxa choxũ peyaxõgũ ñoma rü ta pexcèx chanangónexẽẽ naxũpa na naxẽãnexũ. Erü yíxema êãnexũwa ngẽxmaxẽ rü tama nüxũ tacuèx na ngextá taxũxũ. ³⁶ —Rü ñoma rü ta petanüwa changẽxma rü name nixĩ i paxa choxũ peyaxõgũ na chorü ngónexũwa pengẽxmagũxũcèx —ñanagürü. Rü yema ñaxguwena rü natanüwa ínaxũxũ ga Ngechuchu. Rü naxchaxwa inicux.

Tacüçèx nixĩ ga Yudíugü ga tama Ngechuchuaxũ yaxõgüãxũ

³⁷ Rü woo ga Ngechuchu rü duũxũgüpẽxewa nanaxü ga muxũma ga taxũ ga mexũ ga cuèxruũgü ga Tupanaärü poramaã naxũxũ, natürü yexguma rü ta tama nüxũ nayaxõgü ga duũxũgü. ³⁸ Rü yemaãcü Tupana nayanguxẽẽ ga yema ore ga Ichaxía ümatũxũ ga ñaxũ:

“Pa Corix, taxúema tayaxõ ga yema ore ga tüxũ tangúexẽẽxũ. Rü woo nüxũ tadaugü na ñuxãcü naporaxũ ya Tupana, rü tama tayaxõgü”,

ñaxũ. ³⁹⁻⁴⁰ Rü yemaãcü ga yema duũxũgü rü tama nayaxõgü yema Ichaxía ümatũxũwa nüxũ yaxuxürüü, rü:

“Yema duũxũgü rü tama nüxũ nadaugüchaũ rü tama nayaxõgüchaũ rü tama Tupanacèx na-woegüchaũ. Rü yemacèx ga Tupana rü nüxna nixü na tama nüxũ nadaugüxũcèx rü tama yaxõgüãxũcèx rü tama naxcèx na-woegüxũcèx na nüma nüxna naxããxũcèx i maxũ i ngexwacaxũxũ”,

ñaxŭ. ⁴¹ Rŭ yema ñanagŭrŭ ga Ichaxía yerŭ nangoxetŭgu marŭ nŭxŭ nadau na ñuxãcŭ ãëxgacŭ ya tacŭxŭchi na yŭxŭ ya Ngechuchu ya Cristu. Rŭ yemaãcŭ nachiga nidexa. ⁴² Natŭrŭ muxŭma ga yema Yudŭgŭarŭ ãëxgacŭgŭ rŭ Ngechuchuaxŭ nayaxŭgŭ, rŭ woo ga ñuxre ga naërugŭ rŭ ta nayaxŭgŭ, natŭrŭ tama nŭgŭ nixugŭchaŭ ga duŭxŭgŭpëxewa, yerŭ namuŭë na Parichëugŭ ngutaquëxepataŭwa ínawoxŭxŭ. ⁴³ Rŭ yemaãcŭ tama nŭgŭ nixugŭchaŭ, yerŭ norŭ me nixŭ ga duŭxŭgŭ namaã nataãëgŭxŭ rŭ tama aixcŭma naxcèx nadaugŭ na Tupana namaã taãëxŭ.

Texé ya tama Ngechucharŭ oreaxŭ yaxŭxë rŭ tá tapoxcu

⁴⁴ Rŭ tagaãcŭ ñanagŭrŭ ga Ngechuchu: —Texé ya choxŭ yaxŭxë rŭ tama choxŭxŭcatama tayaxŭ. Natŭrŭ Chaunatŭ ya núma choxŭ mucŭaxŭ rŭ ta tayaxŭ. ⁴⁵ —Rŭ texé ya choxŭ dauxe, rŭ Chaunatŭ ya núma choxŭ mucŭxŭ rŭ ta tadau. ⁴⁶ —Choma na ngónexëëruŭ chiŭxŭ, rŭ ñoma i naãnewa changu na guxãma ya texé ya choxŭ yaxŭxë rŭ tama ëãnexŭwa na tangëxmagŭechaxŭcèx. ⁴⁷ —Natŭrŭ ngëxguma texé nŭxŭ ñnŭgu i chorŭ ore rŭ tama tayaxŭxgu rŭ tama choma nixŭ i tŭxŭ chapoxcuxŭ. Erŭ tama ñoma i naãnewa changu na chanapox-cuexŭcèx i duŭxŭgŭ, natŭrŭ núma chaxŭ na chanamaxëëxŭcèx. ⁴⁸ —Yŭxema texé ya tama choxŭ yaxŭxë rŭ tama chauga ñnŭxë rŭ marŭ tŭxŭ nangëxma na tacŭcèx tá Tupana tŭxŭ poxcuxŭ. Erŭ ngëma ore i nŭxŭ chixuxŭgagu tátama nixŭ ya Tupana i tŭxŭ napoxcuxŭ i naãneärŭ gŭxgu,

erü tama tayaxõ i ngẽma ore i nüxũ chixuxũ.
 49 —Tama chaugagutama chidexa, natürü guma
 Chaunatü ga núma choxũ mucü, rü guma nixĩ
 ga chomaã nüxũ ixucü na tacüxũ tá duũxũgümaã
 chixuxũ rü ñuxãcü tá chanangúexẽxũ. 50 —Rü
 nüxũ chacuèx na Chaunatüarü orewa nangẽxmaxũ
 i maxũ i taguma gúxũ. Rü ngẽmacèx i ngẽma ore
 i nüxũ chixuxũ, rü ngẽmatama ore nixĩ i Chau-
 natü choxũ muxũ na nüxũ chixuxũ —ñanagürü ga
 Ngechuchu.

13

Ngechuchu rü norü ngúexũgüxũ niyauxgücutü

1 Rü wüxi ga ngunexũ nataxu ga nawa na
 nanguxũ ga yema Yudíugüarü peta ga Üpetüchiga.
 Rü Ngechuchu nüxũ nacuèx ga marü nawa na
 nanguxũ ga ñoma ga naãnewa na yaxũxũ rü
 wenaxãrü Nanatüxütawa na naxũxũ. Rü nüma
 rü yexguma ñoma ga naãnewa nayexmagu rü
 guxũguma tüxũ nangechaũ ga guxema noxrü
 ixĩgüxe. Rü yexgumarüũ ta ga yexguma toxna
 yaxũxchaũgu ga daxũguxũ ga naãnewa na naxũxũ,
 rü yemaãcü poraãcü toxũ nangechaũ. 2-4 Natürü
 ga Chataná rü marü Yuda ga Chimáũ ga Icariüte
 nanena nangu na bexma cúãcü Ngechuchuxũ
 ínaxuaxũxücèx. Rü Ngechuchu rü marü nüxũ
 nacuèx ga Nanatüxütawa na ne naxũxũ rü
 wena táxarü Nanatücèx na nataeguxũ. Rü nüxũ
 nacuèx ga Nanatü rü naxmẽxgu na naxüãxũ
 ga guxũma ga pora. Rü yemacèx ga yema
 chütaxũgu ga yexguma mechawa ítachibüeyane,
 rü inachi ga Ngechuchu. Rü ínacuꝑxuchi ga

norü gáuxŧchiru, rü wüxi ga tuayamaã nügü nigoye. ⁵ Rü ñuxŧchi yauxmëxŧpáxŧgu dexáta naba, rü toxŧ niyauxgücutü. Rü guma tuaya ga namaã yagoyecümaã toxŧ ínapigücutü. ⁶ Rü yexguma Chimáũ ga Pedruxŧ nayauxcutüchaŧgu rü ñanagürü ga Pedru: —Pa Corix, ¿ñuxãcü tá i cuma i choxŧ cuyauxcutüxŧ? —ñanagürü. ⁷ Rü Ngechuchu nanangãxŧ rü ñanagürü: —Ñuxma rü tama nüxŧ cucuèx i tüxcüŧ na chanaxüxŧ i ñãã, natürü yixcama rü tá nüxŧ cucuèx —ñanagürü. ⁸ Natürü ga Pedru rü ñanagürü: —Choma rü täütáma chanaxwèxe na choxŧ cuyauxcutüxŧ —ñanagürü. Rü Ngechuchu nanangãxŧ rü ñanagürü nüxŧ: —Ngëxguma tama cuxŧ chayauxcutügu, rü täütáma choxrü quixĩ —ñanagürü. ⁹ Rü yexguma ga Chimáũ ga Pedru rü ñanagürü nüxŧ: —Pa Corix, ¡Tama choxŧ cuyauxcutüxícatama! Natürü chanaxwèxe i choxŧ cuyauxmëx rü choxŧ cuyauxeru ta —ñanagürü. ¹⁰ Natürü Ngechuchu nanangãxŧ rü ñanagürü nüxŧ: —Texé ya ngexwacèx aiyaxe rü tanaxwèxe i tümacutüxícatama tayaxu, erü guxŧwama tangemata. Rü pema rü marü pingematagü, natürü tama guxãma aixcüma tingemata —ñanagürü. ¹¹ Rü Ngechuchu nüxŧ nacuèx na texé tá bexma cúãcü ínaxuaxüxŧ, rü yemacèx ñanagürü nüxŧ: —Natürü tama guxãma aixcüma tingemata —ñaxŧ. ¹² Rü yexguma toxŧ yayauxgücutüguwena, rü Ngechuchu wena nicuxcuchi ga norü gáuxŧchiru. Rü wenaxärü mechawa narüto. Rü ñanagürü toxŧ: —¿Nüxŧ pecuáxŧ yĩxŧ i ngëma chaxüxŧ? ¹³ —Pema rü: “Pa Ngúexëëruŧ” rü “Pa Corix”, ñaperügü

choxŭ. Rŭ marŭ name i ngẽma ñaperŭgŭ, erŭ aixcŭmaxŭchi ngẽma chixĩ. ¹⁴—Rŭ ñuxma i choma na ngúexẽeruŭ chixĩxŭ rŭ pemaã na ichacuáxŭ, rŭ pexŭ chiyauxgŭcutŭ. Rŭ ngexgumarŭxŭ ta i pema rŭ name i wŭxichigŭ i pemŭcŭxŭ piyauxgŭcutŭ.. ¹⁵ —Choma rŭ pexŭ nüxŭ chadauxẽ na ñuxãcŭ tá penaxŭxŭ na pema rŭ ngema pemaã chaxŭxŭãcŭ penaxŭxŭcèx. ¹⁶ —Rŭ aixcŭma pemaã nüxŭ chixu rŭ taxuŭma i wŭxi i coriarŭ duŭxŭ rŭ norŭ coriétŭwa nügŭ nangexmaxẽ. Rŭ taxuxŭma i ãëxgacŭarŭ orearŭ ngeruxŭ i norŭ ãëxgacŭ i namuxŭtŭwa nügŭ nangexmaxẽ. ¹⁷ —Rŭ ngëxguma nüxŭ pecuèxgu i chorŭ ore rŭ penaxŭxgu i ngẽma pemaã nüxŭ chixuxŭ, rŭ aixcŭma tá petaãëgŭ. ¹⁸ —Rŭ tama guxãma i pechiga nixĩ i chidexaxŭ. Erŭ choma rŭ tŭxŭ chacuèx rŭ texégŭ tixĩ ya yíxema tŭxŭ chidexechíxe. Natŭrŭ Tupana nayanguxẽëchaŭ i norŭ ore i ũmatŭxŭ i ñaxŭ:

“Texé ya chomaã chibŭxe rŭ chomaã tarŭxuwãnu”, ñaxŭ. Rŭ ngẽmaãcŭ tá nangupetŭ na yanguxŭcèx i ngema Tupanaarŭ ore. ¹⁹ —Natŭrŭ naxŭpa na nangupetŭxŭ i ngẽma, rŭ pemaã nüxŭ chixu na choxŭ peyaxŭgŭxŭcèx i ngëxguma nangupetŭxgu. ²⁰ —Aixcŭma pemaã nüxŭ chixu rŭ texé ya tŭxŭ yaxúxe ya yíxema choma ngẽma tŭxŭ chamuxẽ, rŭ choxŭ nixĩ i tayaxuxŭ. Rŭ texé ya choxŭ yaxúxe, rŭ Chaunatŭ ga núma choxŭ mucŭxŭ nixĩ i tayaxuxŭ —ñanagŭrŭ ga Ngechuchu.

Ngechuchu nüxŭ nixu ga Yuda rŭ tá bexma cúãcŭ na ínaxuaxŭãxŭ
(Mt 26.20-25; Mr 14.17-21; Lc 22.21-23)

²¹ Rŭ yexguma yema ñaxguwena ga Ngechuchu rŭ poraãcŭ ngechaŭ nŭxŭ nangux, rŭ meãma tomaã nanangoxëë, rŭ ñanagŭrŭ toxŭ: —Aixcŭma pemaã nŭxŭ chixu rŭ wŭxie i petanŭwa tá nixŭ i bexma cúãcŭ choxŭ ítaxuaxŭxŭ —ñanagŭrŭ.

²² Rŭ yexguma ga toma ga norŭ ngúexŭgŭ rŭ wŭxichigŭ togŭ tadawenŭ, rŭ tama nŭxŭ tacuèxgŭ ga texéchiga na yema ñaxŭ.

²³ Rŭ choma ga norŭ ngúexŭ ga poraãcŭ choxŭ nangechaŭxë rŭ nacŭwawa charŭto ga Ngechuchu ga mechawa.

²⁴ Rŭ Chimáŭ ga Pedru rŭ bexma choxŭ naxuneta ga na Ngechuchuna chaçaxŭcèx ga texéchiga na yŭxŭ ga yema.

²⁵ Rŭ yexguma ga choma rŭ yexeraãcŭ Ngechuchuna chimaxcuchi rŭ nŭxna chaca, rŭ ñacharŭgŭ: —Pa Corix, ¿texé tá tixŭ ya yŭxema? —ñacharŭgŭ.

²⁶ Rŭ Ngechuchu choxŭ nangãxŭ, rŭ ñanagŭrŭ: —Wŭxi i pãŭãrŭ bŭcuxŭ tá íchacúe, rŭ yŭxema tŭxna chanaxãxë, rŭ yŭxema tixŭ —ñanagŭrŭ. Rŭ yexguma ínanacúe ga wŭxi ga pãŭãrŭ bŭcuxŭ rŭ Yuda ga Icariúte ga Chimáŭ nanena nanaxã.

²⁷ Rŭ yexgumatama Yuda nayauxgu ga yema pãŭãrŭ bŭcuxŭ rŭ ngoxo ga Chataná rŭ Yudagu naxŭcu. Rŭ yexguma ga Ngechuchu rŭ ñanagŭrŭ nŭxŭ: —Rŭ ngëma cuxŭxchaŭxŭ, ¡rŭ paxa naxŭ! —ñanagŭrŭ.

²⁸ Natŭrŭ taxúema ga toma ga mechawa chibüexe nŭxŭ tacuèxgŭ ga tacŭchiga na yŭxŭ ga yema ñaxŭ ga Ngechuchu.

²⁹ Rŭ nŭma ga Yuda rŭ dŭëruchiŭãrŭ dauruŭ nixŭ. Rŭ yemacèx ñuxre ga toma nŭxŭ tacuèxgŭgu rŭ Ngechuchu taxewa nanamu, na tacŭcèx yataxexŭcèx naxcèx ga peta, rŭ éxna duŭxŭgŭ ga ngearŭ dŭëruãxŭna

ngĩxũ na naxãxũcèx ga dĩèru. ³⁰ Rũ yexguma Yuda nayauxgu ga yema pãũ, rũ ínaxũxũ ga yema ucapuwa. Rũ marũ nachũta ga yexgumax.

Ngechuchu norũ ngúexũgũmaã nũxũ nixu ga yexwacaxũxũ ga norũ mu

³¹ Rũ yexguma Yuda íxũxguwena, rũ Ngechuchu rũ ñanagũrũ: —Rũ ñũxma rũ tá aixcũma nangox na ñuxãcũ naporaxũ ya Tupana Nane ya duũxũxũ ixĩcũ. Rũ yimawa tá nixĩ i nangoxẽẽãxũ ya Tupana i norũ pora. ³² —Rũ ngẽxguma yima Tupana Nane nangoxẽẽxgu i Tupanaãrũ pora, rũ ngẽxgumarũũ tá ta ya Tupana rũ nanangoxẽẽ i Naneãrũ pora. Rũ paxa tá nixĩ i ngẽma. ³³ —Pa Chauxacũãxgũx, tãũtãma muxũ i ngunexũ petanũwa changẽxma. Rũ pema rũ tá chauxcèx pedaugũ, natũrũ ngẽma choma íchaxũxũwa rũ taxucũrũwama ngẽma pexĩ. Rũ ñããtama ore nixĩ ga marũ Yudíugũarũ ãẽxgacũgũmaã nũxũ chixuxũ, rũ ñũxma rũ pemaã rũ ta nũxũ chixuxũ. ³⁴ —Rũ pemaã nũxũ chixu i wũxi i ngexwacaxũxũ i mu. Rũ ngẽma pexũ chamuxũ nixĩ i pemũcũgũxũ na pengechaũxũ i wũxichigũ. Rũ ngẽma na choma pexũ changechaũxũrũũ, rũ chanaxwèxe i wũxichigũ i pema rũ pemũcũgũxũ pengechaũgũ. ³⁵ —Rũ ngẽxguma wũxichigũ pemũcũgũxũ pengechaũgu, rũ guxũma i duũxũgũ tá nũxũ nicuèxãchitanũ na chorũ ngúexũgũ pixĩgũxũ —ñanagũrũ.

Ngechuchu nũxũ nixu rũ Pedru rũ tãxũtãma nũgũ nixu na norũ ngúexũ yixĩxũ

(Mt 26.31-35; Mr 14.27-31; Lc 22.31-34)

³⁶ RŦ Chimáũ ga Pedru rŦ Ngechuchuna naca, rŦ ñanagŦrŦ: —Pa Corix ¿ngextá tá cuxũ? —ñanagŦrŦ. RŦ Ngechuchu nanangãxũ, rŦ ñanagŦrŦ: —Ngema íchaxũxŦwa rŦ taxucŦrŦwa chowe curũxũ i ñuxmax. NatŦrŦ yixcama rŦ ngẽmáãcŦ tá chowe curũxũ —ñanagŦrŦ. ³⁷ RŦ yexguma ga Pedru rŦ ñanagŦrŦ: —Pa Corix, ¿tŦxcŦũ taxucŦrŦwa cuwe charũxũ i ñuxmax? ErŦ marŦ íchamemare na cuxcèx na chayuxũ —ñanagŦrŦ. ³⁸ RŦ Ngechuchu nanangãxũ, rŦ ñanagŦrŦ: —¿AixcŦma yĩxũ i marŦ ícumemarexũ na chauxcèx cuyuxũ? AixcŦma cumaã nŦxũ chixu rŦ tãŦtátama yacaxgu ya otá, rŦ tomaẽpŦxcŦna tá nŦxũ quixu na tama choxũ cucuáxũ —ñanagŦrŦ ga Ngechuchu.

14

Ngechuchu rŦ nama i NanatŦxŦtawa nadaxũ nixĩ

¹ —¡Tãxũ i penaxixãchiãẽgũxũ i pemax! ¡Tupanaãxũ peyaxõgŦ rŦ choxũ rŦ ta peyaxõgŦ!
² —ChaunatŦxŦtawa nangẽxma i muxũchixũma i nachicagŦ. Ngẽxguma chi natauxguma, rŦ tãũ chima pemaã nŦxũ chixu na pexcèx chayamexẽẽxŦcèx i pechicagŦ. ³ —RŦ ngẽxguma marŦ ngema chaxũxgu rŦ wŦxi i pechica chamexẽẽxgu, rŦ wena táxarŦ núma chaxũ. RŦ pexũ tá chayagagŦ na ngẽma nachica i chomatátama nawa changẽxmaxŦwa na pengẽxmagũxŦcèx i pemax. ⁴ —RŦ pema rŦ nŦxũ pecuèx na ngextá tá na chaxũxũ, rŦ marŦ nŦxũ pecuèx i nama i ngema nadaxũ —ñanagŦrŦ ga Ngechuchu. ⁵ RŦ Tumachi rŦ

ñanagürü: —Pa Corix, tama nüxŭ tacuèx na ngextá na cuxŭxŭ. ¿Rü ñuxãcü tá i nüxŭ tacuáxŭ i ngẽma nama? —ñanagürü. ⁶ Rü Ngechuchu nanangãxŭ, rü ñanagürü: —Choma nixĩ i ngẽma nama i Chaunatŭxŭtawa nadaxŭ chiixŭ. Rü aixcŭma nixĩ i ngẽma ore i nüxŭ chixuxŭ. Rü choma nixĩ i duŭxŭgŭxŭ chamaxẽxẽxŭ. Rü chaugaguxicatama nixĩ i Chaunatŭxŭtawa nangugŭxŭ i duŭxŭgŭ. ⁷ —Rü ngẽxguma chi pema rü aixcŭma meã choxŭ pecuèxgŭgu, rü Chaunatŭxŭ rü chi ta pecuèxgŭ. Rü ñuxmaŭcüü nixĩ i Chaunatŭxŭ pecuáxŭ, erü marü nüxŭ pedaugüecha —ñanagürü. ⁸ Rü yexguma ga Piripi rü ñanagürü: —Pa Corix, ¿Toxŭ nüxŭ nadauxẽẽ ya Cunatü! Rü ngẽxĩcatama i tanaxwèxegŭxŭ —ñanagürü. ⁹ Rü Ngechuchu nanangãxŭ, rü ñanagürü: —Pa Piripix, ¿ñuxre ya taunecü marü petanüwa changẽxma rü ñuxma rü ta tama choxŭ cucuèxégaxŭ? Yíxema choxŭ dauxe rü Chaunatŭxŭ rü ta tadau. ¿Rü tüxcüŭ i ngẽxguma rü ta cunaxwèxexŭ i pexŭ nüxŭ na chadauxẽẽxŭ ya Chaunatü? ¹⁰ —¿Tama éxna cuyaxõ na choma rü Chaunatümaã rü wüxitama tixĩgŭxŭ? Rü guxŭma i ore i pemaã nüxŭ chixuxŭ rü tama chauechama nüxŭ chixu. Erü yima Chaunatü ya wüxiwa chomaã ngẽxmacü, rü yima nixĩ ya naxücü i guxŭma i noxrütama puracü. ¹¹ —Chanaxwèxe i choxŭ peyaxõgŭ na choma rü Chaunatümaã wüxitama tixĩgŭxŭ. Natürü woo tama ngẽma pixõgŭgu rü chanaxwèxe na choxŭ peyaxõgŭxŭ naxcèx i ngẽma mexŭgŭ i taxŭ i Tupanaãrŭ poramaã chaxŭxŭ. ¹² —Aixcŭma pemaã nüxŭ chixu rü yíxema choxŭ yaxõxẽ rü

tá tanaxü i guxüma i choma chaxüxü. Rü ngëma chaxüxüârü yexera tá taxü, erü choma rü tá Chaunatüxütawa chaxü. ¹³ —Rü guxüma i tacü i chauégagu Tupanaxütawa naxcëx ípeçaxü rü tá pexna chanaxã. Rü ngëmaãcü tá chanaxü na chaugagu nangóxcëx i Chaunatüarü pora. ¹⁴ —Rü choma tá chanaxü i guxüma i tacü i chauégagu choxna naxcëx peçaxü.

Ngechuchu rü norü ngüexügümaã inaxuneta na naxcëx tá núma namuãxü i Naãe i Üünexü

¹⁵ —Rü ngëxguma aixcüma choxü pengechaügu, rü naga tá pexñüë i chorü mugü. ¹⁶ —Rü choma tá Chaunatüna naxcëx chaca na núma pexcëx namuãxcëx i to i perü ngüxëëruü i Naãe i Üünexü, na guxügutáma petanüwa nangëxmaxüçëx. Rü nüma tá nixí i pexcëx nangoxëëãxü i ore i aixcüma ixixü. ¹⁷ —Rü ñoma i naãnecüãx i duüxügü rü taxucürüwama nanayauxgü, erü tama nüxü nadaugü rü tama nüxü nacüëxgü. Natürü i pema rü marü nüxü pecuëx, erü nüma rü petanüwa nangëxma. Rü guxügutáma pemaã inarüxãüx. ¹⁸ —Rü täütáma núma pexü chawogümare i chomax, erü wena táxarü pexcëx chataegu, na petanüwa changëxmaxüçëx. ¹⁹ —Rü paxa tá nixí na täütáma choxü nadaugüxü i ñoma i naãnecüãx i duüxügü. Natürü i pema rü tá choxü pedaügü. Rü tá pemaxë, erü choma rü chamaxü. ²⁰ —Rü ngëxguma yuwa ícharüdaxgu rü wena chamaüxgu, rü ngëxguma tá nüxü picüëxãchitanü na choma rü Chaunatüwa chamaxüxü rü pema i chowa rü choma i pewa. ²¹ —Yíxema texé ya nüxü cuáxe rü naga ñnüxë i chorü mugü, rü tanangoxëë na

aixcūma choxŭ tangechaŭxŭ. Rŭ Chaunatŭ tá tŭxŭ nangechaŭ ya yíxema choxŭ ngechaŭxē, rŭ choma rŭ tá ta tŭxŭ changechaŭ. Rŭ tŭxŭ tá chaugŭ chawēx —ñanagŭrŭ ga Ngechuchu. ²² Rŭ nayexma ga to ga Ngechuchuarŭ ngúexŭ ga Yudagu ãegaxŭ ta. Rŭ yema rŭ ñanagŭrŭ: —Pa Corix, ¿tŭxcŭŭ toxŭ cugŭ cuwēx, rŭ tama ñoma i naãnecŭãx i duŭxŭgŭxŭ cugŭ cuwēx? —ñanagŭrŭ. ²³ Rŭ Ngechuchu nanangãxŭ, rŭ ñanagŭrŭ: —Yíxema choxŭ ngechaŭxē rŭ naga taxŭnŭ i ngēma ore i tŭmamaã nŭxŭ chixuxŭ. Rŭ Chaunatŭ tá tŭxŭ nangechaŭ. Rŭ choma rŭ Chaunatŭmaã wŭxigu tŭmaxŭtawa tá tangēxmagŭ. ²⁴ —Yíxema tama choxŭ ngechaŭxē rŭ tama naga taxŭnŭ i ngēma chorŭ ore. Rŭ ngēma ore i chauxŭtawa nŭxŭ pexŭnŭexŭ rŭ tama chorŭ ore nixŭ, natŭrŭ guma Chaunatŭ ga nŭma choxŭ mucŭarŭ ore nixŭ. ²⁵ —Ñoma rŭ ta petanŭwa changēxma rŭ pemaã nŭxŭ chixu i guxŭma i ngēma ore i pexcèx choxŭ ngēxmaxŭ. ²⁶ —Natŭrŭ Chaunatŭ rŭ tá chauégagu nŭma nanamu i Naãē i Ūñexŭ na pexŭ nangŭxēēxŭcèx. Rŭ nŭma i Naãē i Ūñexŭ tá pexŭ nangúexēē i guxŭma, rŭ tá nŭxna pexŭ nacuèxãchixēē i guxŭma i ore ga pemaã nŭxŭ chixuxŭ. ²⁷ —Rŭ ñuxma na pexna íchixŭxŭ, rŭ pexna chanaxã i taãē. Natŭrŭ ngēma taãē i pexna chaxãxŭ, rŭ tama ñoma i naãnecŭãx pexna ãxŭ i taãērŭŭ nixŭ. Rŭ tama chanaxwèxe i penaxixãchiãégŭ rŭ pemuŭē. ²⁸ —Marŭ pemaã nŭxŭ chixu na pexna tá íchixŭxŭ rŭ wena táxarŭ pexcèx chataeguxŭ na pemaã changēxmaxŭcèx. Rŭ choxŭ pexŭnŭē ga yexguma yema ñachaxgu.

Rü ngëxguma aixcüma choxü pengechaügu rü tá petaãëgü ega nüxü pecuèxgu na Chaunatücèx chataeguxü, erü Chaunatü rü chorü yexera nixĩ. ²⁹ —Rü naxüpa na nangupetüxü i ngëma, rü pemaã nüxü chixu na choxü peyaxõgüxücèx i ngëxguma nangupetügu. ³⁰ —Marü täütáma poraãcü pemaã chidexa, erü marü ínangu i Chataná i ñoma i naãneärü äëxgacü ixixü. Natürü nüma rü taxuwama choxü narüyexera. ³¹ —Natürü ngëma tá choxü ngupetüxü, rü ngëmaãcü tá nixĩ na guxüma i ñoma i naãnecüãx i duüxügü nüxü nacuáxücèx na choma rü Chaunatüxü na changechaüxü, rü chanaxüxü i ngëma nüma choxü namuxü. ¡Rü ipechigü, rü ngĩxã ítixĩ! —ñanagürü ga Ngechuchu.

15

Ubanegu nügü nangu ga Ngechuchu

¹ Rü ñanagürü ga Ngechuchu: —Choma nixĩ i ñoma wüxi i ubanerüü chiixü rü Chaunatü nixĩ ya norü yora ixïcü i ngëma uba. ² —Rü chorü duüxügü rü ngëma ubachacüügürüü nixigü. Rü ngëma ubachacüü i tama oxü, rü norü yora rü nayadae. Natürü ngëma nachacüü i oxü, rü meã nanamexëëtanü na yexeraãcü poraãcü naxoxücèx. ³ —Pema rü marü pime, yerü naga pexĩnüë ga yema ore ga pexü changüexëëxü. ⁴ —Rü name nixĩ i guxüguma chowa peyaxüxgü, ngëma na choma rü pewa chayaxüxürüü. Erü wüxi i ubachacüü rü tama nüxĩca naxo, ega tama nanewa yaxüxgux. Rü ngëxgumarüü ta i pema rü taxuacüma chauxcèx pemaxë, ega tama chowa peyaxüxgüechagu. ⁵ —Choma nixĩ i

ubane, rü pema i nachacüügü. Rü yíxema chowa yaxũẽchaxe rü choma i tümawa, rü aixcüma tá chauxcèx tamaxũ. Rü ngẽmaãcü wüxi i ubachacüü i oxürüũ tá tixĩ. Natürü ngẽxguma tama chowa peyaxũxgüechagu, rü taxucürüwama tacü pexüe. ⁶ —Rü texé ya tama chowa yaxũẽchaxe rü tá ítatèxüchi. Rü wüxi i ubachacüü i daexũ rü ipaxũ rü iguxürüũ tá tixĩ, rü ngẽxma tá tayarüxo. ⁷ —Rü ngẽxguma chowa peyaxũxgüechagu rü taguma nüxũ ipeyarüngümaẽgu i ngẽma ore i pexũ changüexèexũ, rü marü name i naxcèx ípeca i tacü i penaxwèxexũ, rü choma rü tá pexna chanaxã. ⁸ —Rü ngẽxguma aixcüma meã chauxcèx pemaxẽgu, rü Chaunatüxũ tá nicuèxüügü i duũxüügü. Rü ngẽmaãcü aixcüma chorü ngüexüügü tá pixĩgü. ⁹ —Choma rü pexũ changechaũ ngẽma na Chaunatü choxũ ngechaũxürüũ. Rü chanaxwèxe i aixcüma meã chauga pexĩnüẽcha, erü choma rü guxügguma pexũ changechaũ. ¹⁰ —Choma rü naga chaxĩnü i Chaunatüarü mugü rü nüma rü guxügguma choxũ nangechaũ. Rü ngẽxgumarüũ tá ta nixĩ ega naga pexĩnüẽgu i chorü mugü, rü guxügutáma pexũ changechaũẽcha. ¹¹ —Choma rü ngẽmaãcü pemaã nüxũ chixu na wüxigu chomaã petaãgüxüçèx. Rü ngẽmaãcü tá aixcüma petaãgü. ¹² —Rü choma pexũ chamu na pemücügüxũ pengechaũgüxüçèx, ngẽma choma na pexũ changechaũxürüũ. ¹³ —Rü ngẽxguma wüxie aixcüma tümamücüxũ ngechaũgu, rü nüxũ tangechaũãma rü nüetama ega woo tümamücücèx tayuxgu. Rü nataxuma i to i ngechaũ i ngẽmaãrü yexera. ¹⁴ —Pema rü chomücügü pixĩgü i ngẽxguma chauga pexĩnüẽgu. ¹⁵ —Choma rü marü tama chorü duũxüggümareãcü pexũ

chaxu. Erü wüxi i coriarü duŭxũmare rü tama nüxũ nacuèx i ngẽma norü cori üxũ. Natürü ñuxma rü chomücügũmaã pexũ chaxu, erü pexũ nüxũ chacuèxẽ i guxũma i ore ga Chaunatü chomaã nüxũ ixuxũ. ¹⁶ —Pema rü tama pexira chauxcèx pedaugü, natürü chaxira nixĩ ga pexcèx chadauxũ rü pexũ chamuxũ na aixcũma chauxcèx pemaxèxücèx rü chauxütawa penagagüxücèx i muxũma i duŭxũgü na guxũguma choxũ yaxõgüãxücèx. Rü Chaunatü ya Tupana tá pexna nanaxã i guxũma i tacü i chauégagu nüxna naxcèx peçaxũ. ¹⁷ —Rü ngẽma nixĩ i pexũ chamuxũ na pemücügüxũ pengechaũgüxücèx.

Ñoma i naãnecũãx i duŭxũgü rü Ngechuchuchi rü norü ngúexũgüchi naxaie

¹⁸ —Ngẽxguma ñoma i naãnecũãx i duŭxũgü pexchi aiegu, rü jnũxna pecuèxãchie ga chaxira chauxchi na naxaie xũ! ¹⁹ —Rü ngẽxguma chi ñoma i naãnecũãx i duŭxũgürüü pixĩgügu, rü ñoma i naãnecũãx i duŭxũgü rü chi pexũ nangechaũgü ngẽma natanüxũgüxũ na nangechaũgüxürüü. Natürü choma nixĩ ga pexcèx chadauxũ natanüwa ga ñoma ga naãnecũãx ga duŭxũgü. Rü ngẽmacèx nixĩ i pexchi naxaie xũ, erü marü tama naxrũü pixĩgü. ²⁰ —jNũxna pecuèxãchie ga pemaã ñachagu:

“Taxuxũma i wüxi i coriarü duŭxũ rü norü coriétüwa nügü nangexmaxèè”, ñachagu! Rü yema na chauxchi na naxaie xũ, rü pexchi rü tá ta naxaie. Rü yexguma chi chauga naxĩnüëgu rü ñuxma rü chi ta pega naxĩnüë. ²¹ —Rü ngẽmaãcü ta chaugagu pexchi naxaie i ñoma i naãnecũãx

i duŭxŭgŭ erŭ tama nŭxŭ nacuèxgŭ ya Chau-
 natŭ ga nŭma choxŭ mucŭ. ²² —Rŭ ngèxguma
 chi choma tama namaã chanangoxèègu na ñuxãcŭ
 chixri na namaxèxŭ, rŭ tãũ chima nŭxŭ nacuèxgŭ
 ga pecadu na naxŭgŭxŭ. Natŭrŭ ñuxma namaã
 nŭxŭ na chixuxŭ na ñuxãcŭ chixri namaxèxŭ,
 rŭ ngèmacèx i ñuxma rŭ taxuacŭma nŭxŭ nix-
 ugŭ na yangearŭ pecaduãxŭ. ²³ —Rŭ guxŭma
 i duŭxŭgŭ i chauxchi aixŭ rŭ Chaunatuŭchi rŭ
 ta naxaie. ²⁴ —Rŭ ngèma duŭxŭgŭpèxewa rŭ
 Tupanaãrŭ poramaã chanaxŭ i mexŭgŭ i taxŭ i
 taguma texé ya togue ŭxŭ. Rŭ ngèxguma chi tama
 napèxewa chanaxŭxgu i ngèma mexŭgŭ rŭ tãũ
 chima Tupana namaã nanaxuegu na nagagutama
 yapecaduãxgŭxŭ. Natŭrŭ na woo marŭ nŭxŭ
 nadaugŭxŭ i ngèma mexŭgŭ i taxŭ i Tupanaãrŭ
 poramaã chaxŭxŭ, rŭ ngèxguma rŭ ta chauxchi
 naxaieama rŭ Chaunatuŭchi rŭ ta naxaie. ²⁵ —
 Natŭrŭ ngèmaãcŭ nangupetŭ erŭ Tupana nayan-
 guxèèchaŭ i norŭ ore i ũmatŭxŭ i ñaxŭ:

“Chauxchi naxaie woo taxuŭma i chixexŭ
 chaxŭxgu”,

ñaxŭ. ²⁶ —Natŭrŭ choma rŭ tá Chaunatuégagu
 pexcèx nŭma chanamu i perŭ ngŭxèèruŭ i Tu-
 panaãe i Ũnèxŭ i tá pexŭ nŭxŭ cuèxèèxŭ i ore i
 aixcŭma ixŭxŭ. Rŭ nŭma tá nixŭ i meãma pemaã
 nŭxŭ yaxuxŭ i chauchiga. ²⁷ —Rŭ pema rŭ tá ta
 chauchigaxŭ pixugŭe, yerŭ noxri ichanaxŭgŭgu
 ga duŭxŭgŭmaã nŭxŭ na chixuxŭ ga chorŭ ore,
 rŭ woetama marŭ chauxŭtawa peyexmagŭ —
 ñanagŭrŭ ga Ngechuchu.

16

¹ Rŭ Ngechuchu rŭ ñanagŭrŭ nŭxŭ: —Rŭ pemaã nŭxŭ chixu i ñaã ore na tama nŭxŭ na perŭxoexŭcèx na choxŭ peyaxŭgŭxŭ. ² —Rŭ ngutaquèxepataŭgŭwa tá pexŭ ínawoxŭ. Rŭ aixcŭma tá nawa nangu na texé pexŭ dèixŭ rŭ tá nagu tarŭxŭnŭxŭ na ngèmaãcŭ mexŭ Tupanacèx taxŭxŭ. ³ —Rŭ ngèmaãcŭ tá pemaã namaxè i duŭxŭgŭ, erŭ taguma nŭxŭ nacuèxgŭ ya Chaunatu, rŭ choxŭ rŭ ta tama nacuèxgŭ. ⁴ —Rŭ pemaã nŭxŭ chixu i ñaã ore i ñuxmax, na nŭxna pecuèxãchiexŭcèx i ngèxguma yixcŭra ngèmaãcŭ pexŭ nangupetŭgu.

Tupanaãe i Üünexŭãrŭ puracŭchiga

—Noxri rŭ tama pemaã nŭxŭ chixu i ñaã ore, yerŭ petanŭgu charŭxãŭx. ⁵ —Natŭrŭ i ñuxma rŭ tá pexna ichixŭ na Chaunatu ga núma choxŭ mucŭxŭtawa na changèxmaxŭcèx. Rŭ pema rŭ taxúema choxna peca na ngextá tá na chaxŭxŭ. ⁶ —Natŭrŭ poraãcŭ pengechaŭgŭama erŭ pemaã nŭxŭ chixu i ngèma ore. ⁷ —Natŭrŭ aixcŭma pemaã nŭxŭ chixu rŭ pexcèx narŭmemaè nixŭ na Chaunatŭcèx chataeguxŭ. Rŭ ngèxguma chi tama Chaunatŭxŭtawa chaxŭxgu rŭ tãŭ chima núma naxŭ i Naãe i Üünexŭ i pexŭ rŭngŭxèèxŭ. Natŭrŭ ngèxguma ngema chaxŭxgu rŭ choma tá núma chanamu i Naãe i Üünexŭ. ⁸ —Rŭ ngèxguma Naãe i Üünexŭ núma ŭxgu rŭ tá guxŭ i duŭxŭgŭxŭ nŭxŭ nacuèxèè na yapedaduãxgŭxŭ. Rŭ tá nanangoxèè i ñuxãcŭ na yŭxŭ i ngèma maxŭ i Tupanapèxewa aixcŭma mexŭ. Rŭ tá duŭxŭgŭxŭ nŭxŭ nacuèxèè na Tupana tá napoxcuexŭ i duŭxŭgŭ naxcèx i

norü pecadugü. ⁹ —Rü nüma i Naãe i Üünexü tá duüxügüxü nüxü nacuèxëe na pecaduãxgüxü yïixü erü tama choxü nayaxögü. ¹⁰ —Rü tá nanangüexëe i ñuxácü na yïixü i ngëma maxü i Tupanapëxewa aixcüma mexü, erü choma rü tá Chaunatüxütawa chaxü, rü pema rü täütáma marü choxü pedaugü. ¹¹ —Rü Naãe i Üünexü tá duüxügüxü nüxü nacuèxëe na Tupana tá napoxcuexü i duüxügü i chixexü ügüxü, erü Tupana rü namaã nanaxuegu na marü napoxcuãxü i Chataná i ñoma i naãnemaã icuáxü. ¹² —Choma rü choxü nangëxma i muxüma i to i ore i pemaã nüxü chixuxchaüchiréxü. Natürü ega ñuxma chi pemaã nüxü chixuxgu rü täü chima nüxü pecuèxgü. ¹³ —Rü Tupanaãe i Üünexü rü nüxü nixu i ore i aixcüma ixixüxĩcatama. Rü ngëxguma núma naxüxgu rü nüma tá pexü nangüexëe i guxüma i ore i aixcüma ixixü. Erü nüma rü tama nüëchama tá nidexa, natürü ngëma ore i Chaunatüxütawa rü chauxütawa nüxü naxĩnüxüxüxica tátama nixu. Rü tá pexü nüxü nacuèxëe i guxüma i tacü i yixcúra tá ngupetüxü. ¹⁴ —Rü nüma rü tá choxü nataxëe, erü chauxütawa tá nanayaxu i norü nguxëëtae, rü ñuxüchi tá pexü nangüexëe namaã i ngëma nguxëëtae. ¹⁵ —Guxüma i Chaunatüaxü ngëxmaxü rü choxrü ta nixĩ. Ngëmacèx pemaã nüxü chixu rü Naãe i Üünexü rü chauxütawa tá nanayaxu i norü nguxëëtae, rü ñuxüchi pexü tá namaã nangüexëe. ¹⁶ —Rü paxa täütáma choxü pedau. Natürü ngëmawena rü wena táxarü choxü pedau erü Chaunatüxütawa tá chaxü —ñanagürü ga Ngechuchu.

Ngema guxchaxǵü rü yixcüama rü tá taãxǵü nananguxuchi

¹⁷ Rü yexguma ñuxre ga toma ga Ngechuchuarü ngúexǵü rü togüna tacagü, rü ñatarügügü: — ¿Tacüchiga nixǵi na ngẽma ñaxǵü:

“Rü paxa täütáma choxǵü pedaugü. Natürü ngẽmawena rü wena táxarü choxǵü pedaugü”, ñaxǵü? ¿Rü tacüchiga ta nixǵi na ñaxǵü:

“Choma rü Chaunatüxütawa tá chaxǵü”, ñaxǵü? ¹⁸ — ¿Rü tacüchiga ta nixǵi na ñaxǵü:

“Rü paxa täütáma choxǵü pedaugü”, ñaxǵü? Rü yixema rü tama nüxǵü tacuèxgüéga na tacüchigaxǵü tamaã yaxuxǵü —ñatarügügü. ¹⁹ Rü Ngechuchu rü nüxǵü nacuèxama ga nüxna na tacagüchaǵǵü ga tomax. Rü yemacèx ñanagürü toxǵü: — Choma rü marü pemaã nüxǵü chixu rü paxa täütáma choxǵü pedau, natürü ngẽmawena rü wena táxarü choxǵü pedau. ¿Rü ngẽma dexacèxtama i pegüna pecagüxǵü? ²⁰ —Rü aixcüma pemaã nüxǵü chixu rü pema rü tá pexauxe, rü tá pengechaǵü. Natürü ñoma i naãnecüãx i duǵǵü rü tá nataãégü. Natürü woo pema tá pengechaǵü, rü ngẽma perü ngechaǵü rü tá taãxǵü nananguxuchi. ²¹ —Ngèxguma wüxi i nge íraxacüchaǵü rü inaxixãchiãë, erü inguxneca. Natürü ngèxguma marü tabuxgu ya ngîrü õxchana, rü nüxǵü iyarüngüma na ñuxãcü poraãcü ngǵǵü na nanguxchiréxǵü i noxrix, erü tümamaã itaãë ya ngîrü õxchana. ²² —Rü ngèxgumarüǵü tá ta pexǵü nangupetü i pemax, erü ñuxma rü penaxixãchiãëgü. Natürü wena táxarü chataegu rü pexǵü íchayadau. Rü ngèxguma rü tá pexǵü nangèxma

i wüxi i taãe i taxucürüwama texé pexna yaxuxü. ²³ —Rü ngëxguma ínanguxgu tá i ngëma ngunexü na yanguxü i ñaã pemaã nüxü chixuxü, rü taxucèxtáma ñacücèx choxna pecagü erü aixcüma Chaunatü tá nixí ya pexna naxãcü i guxüma i ñacü i chauégagu nüxna naxcèx peçaxü. ²⁴ —Ñuxmarüta i pema rü taxuüçèxma chauégagu ípecagü. ¡Naxcèx ípeca rü tá penayaxu i ngëma naxcèx ípeçaxü! Rü ngëmaãcü rü tá aixcüma petaãëgü.

Ngechuchu rü marü nüxü narüyexera i guxüma i ñacü i ñoma i naãnewa ngëxmaxü

²⁵ —Ñuxma rü cuèxruüügügu chayaxuãcüma pemaã nüxü chixu i ore. Natürü nawa tá nangu i ngunexü i marü tãütáma ngëmaãcü pemaã nüxü chixu. Rü ngëxguma rü tá noxtacüma meã pemaã chanangoxëë i Chaunatüchiga. ²⁶⁻²⁷ —Rü ngëma ngunexügu i pema rü Chaunatüxütawa tá chauégagu naxcèx ípeca i ñacü i penaxwèxexü. Rü taxucèxma tüxcüü choma tá Chaunatüxütawa pexü naxcèx íchaca, erü nümatama ya Chaunatü rü woetama pexü nangechaü, erü pema rü choxü pengechaü rü peyaxõgü na naxütawa ne chaxüxü. ²⁸ —Chaunatüxütawa ne chaxü na ñoma ga naãnewa chaxüxüçèx. Rü ñuxma rü tá nüxna chataegu i ñoma i naãne na wenaxãrü Chaunatüxütawa chaxüxüçèx —ñanagürü. ²⁹ Rü yexguma ga toma ga norü ngüexügü rü ñatarügügü: —Ñuxma waxi nixí i meãxüchima tomaã cunangoxëëxü i curü ore i tomaã nüxü quixuxü. Rü tama ñacügu ixuxüãcüma tomaã nüxü quixu. ³⁰ —Rü ñuxma rü nüxü tacuèx na aixcüma guxüxüma na cucuáxü. Rü taxuacüma

texé ñuxũ ñatagürü cuxũ. Rũ ngẽmacèx nixĩ i tayaxõgũxũ na aixcũma Tupanaxũtawa na ne cuxũxũ —ñatarügügü. ³¹ Rũ Ngechuchu toxũ nangãxũ rũ ñanagürü: —¿Aixcũma peyaxõgũxũ i ñuxmax? ³² —Rũ nawa tá nangu i ngunexũ rũ ñuxmatátama nixĩ i na pegü pewoonexũ. Rũ wüxichigü i pema rũ tá pepatawa pexĩ, rũ chaxica tá nuã choxũ petèx. Natürü tama chaxica tá icharuxãũx, erü Chaunatü rũ chauxõtawa nangẽxma. ³³ —Rũ guxũma i ñaã ore rũ pemaã nüxũ chixu na chaugagu petaãgũxũcèx. Rũ ñoma i naãnewa rũ tá ngúxũ pingè. Natürü ¡peporae! erü choma rũ marü nüxũ charüyexera i guxũma i tacü i ñoma i naãnewa ngẽxmaxũ —ñanagürü.

17

Ngechuchu rũ norü ngúexũgücèx nayumüxê

¹ Rũ yema ñaxguwena rũ Ngechuchu daxũgu nadawenü, rũ ñanagürü: —Pa Chaunatũx, marü nawa nangu i ngunexũ na chayuxũ. Rũ chanaxwèxe na duũxũgũxũ nüxũ cucuèxèèxũ na aixcũma choma rũ cune chiĩxũ. Rũ ngẽmaãcü i choma rũ tá nüxũ nüxũ chacuèxèè na cuma rũ aixcũma Tupana na quiĩxũ. ² —Erü marü guxũ i duũxũgüarü ãẽxgacũxũ choxũ quixĩxèè, na chanamaxèèxũcèx i guxũma i duũxũgü i choxna cumugũxũ. ³ —Rũ ngẽma duũxũgü tá nüxũ nangẽxma i maxũ i taguma gúxũ ega cuxũ nacuèxgügu na cuxicatama Tupana na quiĩxũ, rũ choxũ nacuèxgügu na choma rũ Cristu ga núma choxũ cumucü na chiĩxũ. ⁴ —Choma rũ marü cuxũ chataxèè i ñoma i naãnewa rũ chayanguxèè i guxũma i puracü ga nawa choxũ cumuxũ.

5 —Rü ñuxma Pa Chaunatüx, rü chanaxwèxe i cugüxütawa choxü cungëxmaxëë na choxü nangëxmaxüçèx ga yematama pora ga cumaã choxü yexmaxü ga noxri tauta naãne üxgu. 6 —Rü guxema duüxëgü ya tüxü quidexechixe ga ñoma ga naãnewa na choxna tüxü cumugüxüçèx, rü marü tüxü nüxü chacuèxëë i texé na quiixü i cumax. Rü woetama cuxrügü tixīgü rü cuma nixī ga choxna tüxü cumugüxü. Rü tümagü rü marü naga taxīnüë i curü ore. 7 —Rü ñuxma rü marü nüxü tacuèx rü guxüma i ngëma choxna cuxāxü, rü aixcüma cuxütawa ne naxü. 8 —Rü choma rü marü tümamaã nüxü chixu ga curü ore ga chomaã nüxü quixuxü. Rü tümagü rü marü tayaxōgü i ngëma ore. Rü nüxü ticuèxāchitanü na aixcüma cuxütawa na ne chaxüxü i chomax. Rü tayaxōgü ga cuma núma choxü na cumuxü. 9 —Rü ngëmacèx cuxna chaca na tüxü na curüngüxëëxüçèx. Rü tama cuxna chaca na nüxü curüngüxëëxüçèx i ñoma i naãnecüāx i duüxügü, natürü cuxna chaca na tüxü curüngüxëëxüçèx ya guxema choxna tüxü cumugüxe, erü curü duüxügü tixīgü. 10 Rü guxāma ya yixema choxrügü ixīgüxe rü cuxrügü tixīgü. Rü guxāma ya cuxrügü ixīgüxe rü choxrügü tixīgü. Rü tümagagu rü duüxügü choxü nicuèxüügü. 11 —Choma rü marü täütáma ñoma i naãnewa changëxmaëcha, natürü i tümagü rü ngëmaãcü ñoma i naãnewa tá tangëxmagü ngëxguma cuxütawa chaxüyane. Pa Chaunatü ya Üünecüx, rü chanaxwèxe na curü pora ga choxna cuxāxümaã tüxna cudauxü ya yixema choxna tüxü cumugüxe, na ngëmaãcü guxāma wüxigu rüxīnüèxüçèx, ngëma cuma rü choma na wüxigu

rũxĩnũẽxũrũũ. ¹² —Rũ yexguma guxema choxna tũxũ cumugũxetanũwa chayexmagu ga ñoma ga naãnewa, rũ curũ pora ga choxna cuxãũmaã tũxna chadau rũ tũxũ íchapoxũ. Rũ taxũema ga guxema choxna tũxũ cumugũxe rũ itayarũtauxe. Rũ Yuda ga woetama iyarũtaxuxũxicatama inayarũtaxu na yanguxũcèx i curũ ore i ũmatũxũ. ¹³ —Rũ ñũxma rũ cuxũtawa tá chaxũ. Natũrũ ñomarũta ñoma i naãnewa changẽxma-yane rũ nũxũ chixu i ñaã curũ ore na tũmagũ rũ ta tũxũ nangẽxmaxũcèx i ngẽma taãẽ i aixcũma ixĩxũ i choma choxũ ngẽxmaxũ. ¹⁴ —Choma rũ marũ tũmamaã nũxũ chixu i curũ ore. Natũrũ ñoma i naãnecũãx i duũxũgũ rũ tũmachi naxaie, erũ tũma rũ tama naxrũũ tixĩgũ, ngẽxgumarũũ i choma rũ tama ñoma i naãnecũãx rũũ chixĩ. ¹⁵ —Tama cuxna tũmacèx chaca na tũxũ na quigagũxũcèx i ñoma i naãnewa. Natũrũ cuxna chaca na tũxũ na ícupoxũxũcèx nũxna i ngoxo i Chataná. ¹⁶ —Choma rũ tama ñoma i naãnecũãx chixĩ. Rũ tũmagũ rũ ta tama ñoma i naãnecũãx tixĩgũ, erũ cuxrũgũ tixĩgũ i ñũxmax. ¹⁷ —Curũ ore rũ aixcũma nixĩ. Rũ chanaxwèxe i tũxũ cungúexẽẽ i curũ ore, na aixcũma cupẽxewa tixũũnecxũcèx ya yĩxema choxna tũxũ cumugũxe. ¹⁸ —Rũ yexgumarũũ ga ñoma ga naãnecũãx ga duũxũgũtanũwa choxũ na cumuxũrũũ, rũ ngẽxgumarũũ i choma rũ ta ñoma i naãnecũãx i duũxũgũ-tanũwa tũxũ chamugũ. ¹⁹ —Rũ tũmagagu chaugũ ichaxã na tũxũ changúexẽẽxũcèx i curũ ore i aixcũma ixĩxũ, na cupẽxewa tixũũnecxũcèx ya yĩxema choxna tũxũ cumugũxe. ²⁰ —Natũrũ tama yĩxema ñũxma yaxõgũxecèxicatama cuxna chaca. Natũrũ cuxna

chaca ta tūmacèx ya yíxema yixcūra tá yaxōgūxe nagagu i tūmaārū ore ya yíxema ñuxma yaxōgūxe. ²¹—Rū guxāma ya yíxemacèx cuxna chaca na aixcūma wūxitama tixīgūxūcèx. Rū ngēma cuma rū choma na wūxitama ixīgūxūrūū, Pa Chaunatūx, rū chanaxwèxe i guxāma i tūma rū ta wūxitama tixīgū. Rū ngēmaācū i ñoma i naānecūāx i duūxūgū, rū tá nayaxōgū na cuma núma choxū cumuxū. ²²—Rū choma rū marū tūxna chanaxā i ngēmatama pora i cuma choxna cuxāxū na ngēmaācū wūxitama tixīgūxūcèx ngēma cuma rū choma na wūxitama ixīgūxūrūū. ²³—Rū chanaxwèxe na tūmawa changēxmaxū rū cuma i chowa na cungēxmaxū na ngēmaācū aixcūma wūxi-tama ixīgūxū i guxāma i yixema. Rū ngēmaācū i ñoma i naānecūāx i duūxūgū rū tá nūxū nicuèxāchitanū na cuma núma choxū cumuxū, rū tá nūxū nicuèxāchitanū na tūxū cungechaūxū ya yíxema choxna tūxū cumugūxe ngēma na choxū cungechaūxūrūū. ²⁴—Pa Chaunatūx, cuma choxna tūxū cumugū. Rū chanaxwèxe i chauxūtawa tangēxmagū i ngema tá íchangēxmaxūwa, na nūxū tadaugūxūcèx i chorū pora ga choxna cuxāxū. Yerū choxū cungechaū ga yexguma tauta naāne ixūgūgumama. ²⁵—Pa Chaunatū ya Mecūx, ñoma i naānecūāx i duūxūgū rū tama cuxū nacuèxgū. Natūrū choma rū cuxū chacuèx. Rū yíxema choxna tūxū cumugūxe rū ta marū nūxū tacuèxgū na cuma núma choxū cumuxū. ²⁶—Rū marū tūxū nūxū chacuèxēē na texé quiixū. Rū guxūgutāma tūxū nūxū chicuèxēēmachigū na cuma choxū cungechaūxūrūū tūgū tangechaūgūxūcèx rū choma rū tūmaxūtawa na changēxmaxūcèx —

ñanagürü ga Ngechuchu.

18

Ngechuchuxŭ niyauxgü

(Mt 26.47-56; Mr 14.43-50; Lc 22.47-53)

¹ Rŭ yema ñaxguwena ga Ngechuchu rŭ tomaã inaxŭñachi, na Cheduruarŭ ngatexŭärŭ tocutüwa taxŭñcèx. Rŭ yéma nayexma ga wŭxi ga nanetüncèü. Rŭ yemawa naxŭ ga Ngechuchu tomaã. ² Rŭ Yuda ga yema bexma cúãcü Ngechuchuxŭ íyaxuaxŭxŭ rŭ nüxŭ nacuèx ga yema nachica, yerü Ngechuchu rŭ muèxpŭxcüna yéma tomaã nangutaquèxexŭ. ³ Rŭ yéma nangu ga Yuda namaã ga ñuxre ga churaragŭ rŭ ñuxre ga tupauca ga taxŭneärŭ purichíagŭ ga yéma namugŭxŭ ga paigŭarŭ àèxgacügŭ rŭ parichéugŭ. Rŭ meãma nixãxne, rŭ yéma nanangegŭ ga omügŭ. ⁴ Natürŭ ga Ngechuchu rŭ marŭ nüxŭ nacuèx ga guxŭma ga tacü tá nüxŭ na ngupetŭxŭ. Rŭ yemacèx naxcèx nixŭ, rŭ nüxna naca, rŭ ñanagürŭ: —¿Texécèx nixŭ i pedaugŭxŭ? —ñanagürŭ. ⁵ Rŭ nümagŭ rŭ Ngechuchuxŭ nangãxŭgŭ, rŭ ñanagürŭgŭ: —Nacharétucŭñax i Ngechuchucèx nixŭ i tadaugŭxŭ —ñanagürŭgŭ. Rŭ Ngechuchu nanangãxŭ, rŭ ñanagürŭ: —Choma chixŭ —ñanagürŭ. Rŭ Yuda ga bexma cúãcü ínaxuaxŭxŭ rŭ yema churaragŭtanüwa nayexma. ⁶ Rŭ yexguma yema ñaxgu ga Ngechuchu: “Choma chixŭ”, ñaxgu, rŭ nügŭweama nacaixŭtanü ga yema churaragŭ, rŭ yexma nayayi. ⁷ Rŭ yexguma ga Ngechuchu rŭ wena nüxna naca, rŭ ñanagürŭ: —¿Texécèx nixŭ i pedaugŭxŭ? —ñanagürŭ. Rŭ nümagŭ rŭ

nanangãxŭgŭ rŭ ñanagŭrŭgŭ: —Nacharétucŭãx i Ngechuchucèx nixĩ i tadaugŭxŭ —ñanagŭrŭgŭ. ⁸ Rŭ Ngechuchu rŭ wenaxârŭ ñanagŭrŭ nŭxŭ: —Marŭ pemaã nŭxŭ chixu rŭ choma chixĩ. Rŭ ngêxguma chauxcèx pedaugŭgu rŭ jípeyaxĩxêê i ñãã chorŭ ngúexŭgŭ! —ñanagŭrŭ. ⁹ Rŭ yemaãcŭ nangupetŭ na yanguxŭcèx ga norŭ ore ga nŭmatama ga Ngechuchu nŭxŭ yaxuxŭ ga ñaxgu:

“Yíxema Chaunatŭ choxna tŭxŭ mugŭxe rŭ taxúetáma itayarŭtauxe”, ñaxgu. ¹⁰ Rŭ Chimáũ ga Pedru rŭ nŭxŭ iyexma ga wŭxi ga cŭxchi. Rŭ ngĩxŭ nayaxu ga norŭ cŭxchi rŭ yemamaã ínanadaechinŭ ga paigŭarŭ ãêxgacŭarŭ duŭxŭ ga Macugu ãegaxŭ. Rŭ norŭ tŭgŭnechinŭ ínadae. ¹¹ Natŭrŭ ga Ngechuchu rŭ Pedruxŭ ñanagŭrŭ: —¡Ngĩxchixŭgu ngĩxŭ ixŭcuchi i curŭ cŭxchi! ¿Tama êxna nŭxŭ cucuèx na choma rŭ tá ngúxŭ chingexŭ ngêma Chaunatŭ chomaã naxueguxŭrŭ? — ñanagŭrŭ.

Anápatawa Ngechuchuxŭ nagagŭ

(Mt 26.57-58; Mr 14.53-54; Lc 22.54)

¹² Rŭ yexguma ga churaragŭarŭ ãêxgacŭ, namaã ga norŭ churaragŭ rŭ tupaucaarŭ purichíagŭ, rŭ Ngechuchuxŭ niyauxgŭ. Rŭ nayanêixchacŭgŭ. ¹³ Rŭ noxri rŭ ãêxgacŭ ga Anápatawa nanagagŭ. Rŭ Aná rŭ Caipánèxtŭ nixĩ. Rŭ guma taunecŭgu ga Caipá rŭ paigŭeru nixĩ. ¹⁴ Rŭ yema Caipá nixĩ ga ũpaacŭ yema Yudíugŭarŭ ãêxgacŭgŭmaã nŭxŭ ixuxŭ ga na namemaêxŭ ga wŭxitama ga yatŭ guxŭma ga Yudíugŭcèx na yuxŭ.

Pedru rŭ Ngechuchuxŭ nixã

(Mt 26.69-70; Mr 14.66-68; Lc 22.55-57)

15 Rŭ choma rŭ Chimáũ ga Pedru rŭ wŭxigu Ngechuchuwe tarŭxĩ. Rŭ yema paigŭarŭ ãĕxgacŭ rŭ choxŭ nacuĕx. Rŭ yemacĕx ga choma rŭ wŭxigu Ngechuchumaã tichocu ga ãĕxgacŭpataĕxtŭwa. 16 Natŭrŭ ga Pedru rŭ ĩãxãrŭ dŭxĕtŭgutama narŭxãũx. Rŭ yemacĕx íchaxũxŭ ga choma, rŭ yema ĩãxãrŭ dauruŭ ga ngecŭmaã chayarŭdexa rŭ yexguma Pedruxŭ iyamucuchi. 17 Rŭ yexguma ga yema ngecŭ ga ĩãxãrŭ dauruŭ, rŭ Pedruna ica, rŭ ngĭgŭrŭgŭ: —¿Tama ĕxna cuma rŭ ta wŭxi i norŭ ngŭxŭ quĩxŭ i ngĕma yatŭ i yayauxgŭxŭ? —ngĭgŭrŭgŭ. Rŭ Pedru ngĭxŭ nangãxŭ, rŭ ñanagŭrŭ: —Tama nixĩ —ñanagŭrŭ. 18 Rŭ yema ĩãxtŭwa rŭ ãĕxgacŭarŭ duŭxŭgŭ rŭ purichĩagŭ rŭ nanaxŭgŭ ga wŭxi ga ũxŭ, yerŭ nagáuane. Rŭ guma ũxŭxetŭarŭ ngaicamagu nachigŭ, rŭ yema nŭgŭ ninaĩxŭgŭ. Rŭ Pedru rŭ ta yema nŭgŭ nanaĩxŭ naxĕtŭwa ga guma ũxŭ.

*Paigŭarŭ ãĕxgacŭ rŭ Ngechuchuna naca
(Mt 26.59-66; Mr 14.55-64; Lc 22.66-71)*

19 Rŭ yema paigŭarŭ ãĕxgacŭ rŭ inanaxŭgŭ ga Ngechuchuna na naçaxŭ, rŭ ñanagŭrŭ: —¿Tacŭ nixĩ ga duŭxŭgŭxŭ namaã cungŭexĕĕxŭ? ¿Rŭ texĕgŭ tixĩ ya yixema curŭ ngŭxŭgŭ? —ñanagŭrŭ. 20 Rŭ Ngechuchu ñanagŭrŭ nŭxŭ: —Choma rŭ guxŭ ga duŭxŭgŭpĕxewa nŭxŭ chixu ga chorŭ ore. Rŭ ngutaquĕxepataũgŭwa rŭ tupauca ya taxŭnewa i ngextá guxŭma i Yudĩugŭ íngutaquĕxegŭxŭwa chanangŭexĕĕ ga duŭxŭgŭ. Rŭ yemaãcŭ taxuŭma ichicux ga chorŭ ore. 21 —¿Rŭ tŭxcŭũ i choxna cuçaxŭ i ñuxmax? Ĕcŭ, ĩnŭxna naca i ngĕma duŭxŭgŭ

ga nüxŦ ĩnüēxŦ ga chorŦ ore! RŦ nümagŦ tá cumaã nüxŦ nixugŦe ga řacŦchigaxŦ namaã na chixuxŦ. ErŦ nümagŦ rŦ nüxŦ nacuēxgŦ i guxŦma ga řacŦ ga namaã nüxŦ chixuxŦ — ñanagŦrŦ. ²² RŦ yexguma Ngechuchu yema ñaxgu, rŦ wŦxi ga tupauca ga taxŦneärŦ purichía ga naxŦtagu chixŦ, rŦ Ngechuchuchiwegu nidagŦ. RŦ ñanagŦrŦ NgechuchuxŦ: —řTŦxcŦŦ ngēmaãcŦ cunangãxŦ ya daa paigŦarŦ âēxgacŦ? —ñanagŦrŦ. ²³ RŦ Ngechuchu nanangãxŦ rŦ ñanagŦrŦ: —RŦ ngēxguma řacŦ rŦ chixexŦxŦ chixuxgu, řrŦ nüxŦ ixu na ñuxãcŦ chixri na chidexaxŦ! NatŦrŦ ega chorŦ ore rŦ aixcŦma yixŦgu, rŦ řTŦxcŦŦ i choxŦ quidagŦxŦ i ñuxmax? —ñanagŦrŦ. ²⁴ RŦ yexguma ga Aná rŦ NgechuchuxŦ yanáĩãcŦma paigŦarŦ âēxgacŦ ga CaipáxŦtawa nanamu.

Pedru rŦ wenaxärŦ tama NgechuchuxŦ nacuēxneta

(Mt 26.71-75; Mr 14.69-72; Lc 22.58-62)

²⁵ RŦ yoxni ga Pedru rŦ ũxŦarŦ ngaicamagu nachiecha, rŦ yéma nügŦ nanaĩxŦãma. RŦ yema yéma yexmagŦxŦ rŦ nüxna nacagŦe, rŦ ñanagŦrŦgŦ: —řTama ēxna cuma rŦ ta norŦ ngŦexŦ quiixŦ i ngēma yatŦ i yayauxgŦxŦ? —ñanagŦrŦgŦ. NatŦrŦ ga Pedru rŦ tama nügŦ nixu, rŦ ñanagŦrŦ: —Tama nixŦ —ñanagŦrŦ. ²⁶ RŦ yéma nayexma ga wŦxi ga paigŦarŦ âēxgacŦarŦ duŦxŦ. RŦ yema rŦ Pedru ĩdaechinŦxŦtanŦxŦ nixŦ. RŦ Pedruna naca, rŦ ñanagŦrŦ: —řTama ēxna cuma yŦixŦ ga nanetŦnecŦwa Ngechuchumaã cuxŦ chadauxŦ? —ñanagŦrŦ. ²⁷ RŦ Pedru rŦ wena tama nügŦ nixu. RŦ yexgumatama nica ga otá.

*Ngechuchu rü Piratu- pëxewa nayexma
(Mt 27.1-2, 11-14; Mr 15.1-5; Lc 23.1-5)*

28 Rŭ yexguma Ngechuchumaã nüxŭ nachauegu ga nüxna na nacagŭxŭ, rŭ Caipápatawa Ínanagaxŭchigŭ rŭ Yudéaaneãrŭ ãëxgacŭ ga Dumacŭãxpatawa nanagagŭ. Natŭrŭ marŭ ningóonechaŭ ga yexguma rŭ yemacèx ga yema Yudíugŭ rŭ tama guma ãëxgacŭpatagu nachocu, yerŭ norŭ mugŭ nüxŭ nixu rŭ taxŭ ga pecadu nixí na wŭxi ga Dumacŭãxpatagu na nachocuxŭ ga yema ngunexŭgu. Rŭ yemaãcŭ tama Tupanapëxewa nügŭ nixŭxaarŭ maxŭãxëëgŭchaŭ, yerŭ yexguma nügŭ yaxŭxaarŭ maxŭãxëëgŭgu, rŭ taxucŭrŭwa nanangŭxgŭ ga òna ga Üpetŭchigaarŭ petacèx namexëëxŭ. 29 Rŭ yemacèx ga guma ãëxgacŭ ga Dumacŭãx ga Piratu rŭ napatawa Ínaxŭxŭ ga duŭxŭgŭmaã na yadexaxŭcèx. Rŭ ñanagŭrŭ nüxŭ: —¿Tacŭcèx Ípenaxuaxŭ ya daa yatŭ? —ñanagŭrŭ. 30 Rŭ nümagŭ rŭ Piratuxŭ nangãxŭgŭ, rŭ ñanagŭrŭgŭ: —Ngëxguma chi tama wŭxi i taxŭ i chixexŭ naxŭxgu, rŭ tãŭ chima cuxŭtawa tanaga —ñanagŭrŭgŭ. 31 Rŭ yexguma ga Piratu rŭ ñanagŭrŭ nüxŭ: —¡Ëcŭ perŭ ãëxgacŭgŭxŭtawa penaga, rŭ perŭ mugŭ pemaã nüxŭ ixuxŭãcŭma penapoxcux! —ñanagŭrŭ. Natŭrŭ ga yema Yudíugŭ rŭ Piratuxŭ nangãxŭgŭ, rŭ ñanagŭrŭgŭ: —Natŭrŭ pema i Dumacŭãxgŭ rŭ marŭ toxna penachuxu na texéxŭ timèxgŭxŭ tŭmaãrŭ chixexŭcèx —ñanagŭrŭgŭ. 32 Rŭ yemaãcŭ ningu ga yema ore ga Ngechuchu ũpaacŭ nüxŭ ixuxŭ ga ñuxãcŭ tá na nayuxŭ. 33 Rŭ Piratu rŭ wenaxãrŭ napatagu naxŭcu, rŭ Ngechuchucèx

nangema. Rũ nüxna naca, rũ ñanagürü: —¿Cuma yĩĩxũ i Yudíugüarũ ãëxgacũ quiĩxũ? —ñanagürü. ³⁴ Rũ Ngechuchu ñanagürü nüxũ: —¿Cuechamatama i nagu curũxĩnũxũ na ngẽmaãcũ choxna cuçaxũ, rũ êxna togũ marũ cumaã nüxũ nixu na ngẽmaãcũ choxna cuçaxũcèx? —ñanagürü. ³⁵ Rũ Piratu Ngechuchuxũ nangãxũ, rũ ñanagürü: —¿Éxna cuma nagu curũxĩnũgu rũ Yudíu chiĩxũ? Rũ ngẽma cuchiũãnecũãxgũ rũ paigüarũ ãëxgacũgütama nixĩ i chauxütawa cuxũ gagũxũ. ¿Éxna tacũ rũ chixexũ cuxũ? —ñanagürü. ³⁶ Rũ yexguma ga Ngechuchu rũ nanangãxũ, rũ ñanagürü: —Choma rũ tama ñoma i naãnewa ãëxgacũ chixĩ. Rũ ngẽxguma ñoma i naãnewa ãëxgacũ chixĩgu, rũ chorũ duũxũgũ rũ chi Yudíugüarũ ãëxgacũgũmaã nügũ nadai rũ tãũ chima choxũ niyauxgũ i ngẽxguma. Natürũ tama ñoma i naãnewa ãëxgacũ chixĩ —ñanagürü. ³⁷ Rũ yexguma ga Piratu rũ ñanagürü nüxũ: —¿Éxna to i nachiũãneãrũ ãëxgacũ quixĩ i cumax? —ñanagürü. Rũ Ngechuchu nanangãxũ rũ ñanagürü: —Cumatama marũ nüxũ quixu na ãëxgacũ chiĩxũ. Rũ yemacèx ga choma rũ chabu rũ ñoma ga naãnewa chaxũ na duũxũgũmaã nüxũ chayarũxuxũcèx i ore i aixcũma ixĩxũ. Rũ guxãma ya texé ya nüxũ cuáxchaũxẽ i ngẽma ore i aixcũma ixĩxũ, rũ choxũ itarũxĩnũẽ i ngẽma ore i nüxũ chixuxũ —ñanagürü. ³⁸ Rũ Piratu rũ ñanagürü nüxũ: —¿Tacũ nixĩ i ngẽma ore i aixcũma ixĩxũ? —ñanagürü.

*Ngechuchumaã nanaxuegu na yamèxgüãxũ
(Mt 27.15-31; Mr 15.6-20; Lc 23.13-25)*

Rü yemaãcü Ngechuchuna nacaxguwena ga Piratu, rü wenaxârü Yudíugümaã nayarüdexa. Rü ñanagürü nüxü: —Taxuüma i chixexüxü nawa chadau i ñaã yatü. ¿Rü tüxcüü chi inapoxcuxü? ³⁹ —Natürü guxüguma ega Üpetüchigaarü petawa nanguxgu, rü pecüma nixĩ na choxna naxcèx na peçaxü na Íchananguxuchixëëxüçèx i wüxi i duüxü i poxcuxü. ¿Rü penaxwèxexü na pexcèx Íchananguxuchixëëxü i ñaã perü ãëxgacü, Pa Yudíugüx? —ñanagürü. ⁴⁰ Rü yexguma ga guxüma ga yema duüxügü, rü tagaãcü aita naxüe, rü ñanagürügü: —Tama tanaxwèxe na cuya-ngéxü i ngêma yatü. Rü Barabá waxi nixĩ i tanaxwèxexü na cuyangéxü —ñanagürügü. Rü yema Barabá rü wüxi ga máëtaxü nixĩ.

19

¹ Rü yexguma ga Piratu rü churaragüxü namu na Ngechuchuxü naçuaixgüxüçèx. ² Rü yema churaragü rü chuchuxüwa nanaxügü ga wüxi ga boxü, rü ñuxüchi naëruwa nayangèxcuchigü. Rü wüxi ga máxü ga naxchiru ga daucharaxügu nayacuxëëgü. ³ Rü ñuxüchi naxcèx naxĩ, rü nüxü nacugüeãcüma ñanagürügü nüxü: —¡Namaxü, Pa Yudíugüarü Æëxgacüx! —ñanagürügü. Rü nanapechwegü. ⁴ Rü Piratu rü wenaxârü düxétüwa naxü, rü Yudíugüxü ñanagürü: —¡Düçèx! ñuxma tá nuã pepèxewa chanaga na nüxü pecuáxüçèx na taxuüma i chixexüxü nawa chadauxü —ñanagürü. ⁵ Rü düxétüwa naxü ga Ngechuchu. Rü namaã nangèxcueru ga yema boxü ga chuchuxüwa naxügüxü. Rü nagu nicux

ga yema máxŧ ga naxchiru ga dauxcharaxŧ. Rŧ yex-guma ga Piratu rŧ Yudíugŧxŧ ñanagŧrŧ: —Daa nixí ya yima yatŧ —ñanagŧrŧ. ⁶ Natŧrŧ yexguma Ngechuchuxŧ nadaugŧgu ga paigŧarŧ ãĕxgacŧgŧ rŧ purichíagŧ, rŧ inanaxŧgŧe ga aita na naxŧexŧ. Rŧ ñanagŧrŧgŧ: —¡Curuchawa yapota! ¡Curuchawa yapota! —ñanagŧrŧgŧ. Rŧ Piratu rŧ ñanagŧrŧ nŧxŧ: —¡Ĕcŧ, peyaga rŧ pematama curuchawa peyapota! Erŧ choma rŧ taxuŧma i chixexŧxŧ nawa chadau —ñanagŧrŧ ga Piratu. ⁷ Natŧrŧ ga yema Yudíugŧ rŧ Piratuxŧ nangãxŧgŧ, rŧ ñanagŧrŧgŧ: —Toma toxŧ nangĕxma i wŧxi i torŧ mu. Rŧ ngĕma torŧ mu toxŧ nŧxŧ nacuĕxĕe na namexŧ na nayuxŧ i ñaã yatŧ, yerŧ nŧma rŧ nŧxŧ nixu ga Tupana Nane na yíxŧ —ñanagŧrŧgŧ. ⁸ Rŧ yexguma yemaxŧ naxínŧgu ga Piratu, rŧ yexeraãcŧ namuŧ. ⁹ Rŧ wena Ngechuchumaã napatagu naxŧcu. Rŧ yema Ngechuchuna nayaca, rŧ ñanagŧrŧ: —¡Ngextácŧãx quixí i cumax? —ñanagŧrŧ. Natŧrŧ ga Ngechuchu rŧ tama nanangãxŧ. ¹⁰ Rŧ yexguma ga Piratu rŧ Ngechuchuxŧ ñanagŧrŧ: —¡Ĕxna ngĕma tãŧtãma choxŧ cungãxŧ? ¡Tau ĕxna i nŧxŧ cucuáxŧ na choxmĕxwa cungĕxmaxŧ na curuchawa cuxŧ chipotaxŧ rŧ ĕxna cuxŧ na íchanguxuchixĕĕxĕcĕx? —ñanagŧrŧ. ¹¹ Rŧ Ngechuchu nanangãxŧ, rŧ ñanagŧrŧ: —Tãŧ chima cuxmĕxwa changĕxma, ega tama Tupana naxwĕxegu. Rŧ ngĕmacĕx nixí i ngĕma duŧxŧgŧ i cuxna choxŧ mugŧxŧ rŧ curŧ yexera porãcŧ napecaduãxgŧ —ñanagŧrŧ. ¹² Rŧ yemawena rŧ Piratu nagu narŧxínŧ ga ñuxãcŧ Ngechuchuxŧ na ínanguxuchixĕĕĕgaxŧ.

Natürü yema Yudíugü rü poraãcü aita naxüe, rü ñanagürügü: —Ngëxguma tá ícunanguxuchixëëxgu rü tama curü ãëxgacü ya tacü ya Dumacüãx ya Chécharuxü cungechaü. Erü ngexerúxe ya ãëxgacü ya tacüxü tügü ingucuchixëëxë, rü Dumacüãx ya ãëxgacü ya tacü ya Chécharuarü uwanü tixí—ñanagürügü. ¹³ Rü yexguma yemaxü naxínügu ga Piratu, rü churaragüxü namu ga Ngechuchuxü düxétüwa na nagagüxücèx. Rü nawa nayarüto ga wüxi ga tochicaü ga taxü ga nutagünaxcèx ga togawa rü Gabatagu äegaxü. Rü yema nachicawa nixí ga poxcuexü ga duüxügüna naçaxü ga ãëxgacü. ¹⁴ Rü wüxi ga ngunexü nataxu ga Üpetüchigaarü petawa na nanguxü ga yexguma, rü marü tocuchiwa nangu. Rü Piratu rü Yudíugüxü ñanagürü: —¡Daa nixí ya yima perü ãëxgacü! ñanagürü. ¹⁵ Natürü ga nümagü rü aita naxüe, rü ñanagürügü: —Tanaxwèxe na nayuxü. Rü ¡curuchawa yapota! —ñanagürügü. Rü Piratu nüxna naca rü ñanagürü nüxü: —¿Ñuxãcü i choma rü ichanamu na curuchawa yapotagüãxücèx ya perü ãëxgacü? —ñanagürü. Natürü ga paigüarü ãëxgacügü rü Piratuxü nangãxügü, rü ñanagürügü: —Yima ãëxgacü ya tacü ya Chécharu ya Dumawa ngëxmacü rü yima nixí ya torü ãëxgacü, rü nataxuma i to —ñanagürügü. ¹⁶ Rü yexguma ga Piratu rü yema Yudíugüna Ngechuchuxü namu na curuchawa yapotagüãxücèx. Rü nümagü rü nayagagü.

*Curuchawa Ngechuchuxü nipotagü
(Mt 27.45-56; Mr 15.33-41; Lc 23.44-49)*

17 Rŭ ínaxŭxŭ ga Ngechuchu, rŭ norŭ curucha ngŭxŭ ininge. Rŭ yéma nanagagŭ nawa ga wŭxi ga nachica ga “Duŭxēēruchinēxāgu” āegaxŭ. Rŭ yema rŭ Górguta nixŭ ga naega ga togawa. 18 Rŭ yéma curuchawa Ngechuchuxŭ nayarŭpotagŭ. Rŭ Ngechuchurŭŭ curuchawa nayapotagŭ ga taxre ga to ga yatŭgŭ, rŭ wŭxi ga norŭ tŭgŭnecŭwawa rŭ to ga norŭ toxwecŭwawa. 19 Rŭ Piratu rŭ churaragŭxŭ namu na Ngechucharŭ curuchatapēxewa na yapocuchigŭāxŭcèx ga wŭxi ga mŭrapewaxacŭ ga āegatachinŭxŭ ga ñaxŭ:

“Ngechuchu ya Nacharétucŭāx ya Yudíugŭarŭ Āēxgacŭ”, ñaxŭ. 20 Rŭ muxŭma ga yema Yudíugŭ nŭxŭ nadaumatŭ ga yema namatŭ ga mŭrapewaxacŭgu ŭxŭ. Yerŭ yema nachica ga Ngechuchuxŭ curuchawa íyanapotagŭxŭwa, rŭ ñāneārŭ ngaicamana nixŭ. Rŭ tomaēxpŭx ga nagawa naxŭmatŭ ga yema naega ga yema mŭrapewawa. Rŭ togawa rŭ Griégugŭgawa rŭ Dumacŭāxgŭgawa naxŭmatŭ. 21 Rŭ yemacèx ga yema Yudíugŭarŭ paigŭarŭ āēxgacŭgŭ rŭ Piratuxŭ ñanagŭrŭgŭ: —Toma rŭ tama tanaxwèxe i cunaxŭmatŭ i “Yudíugŭarŭ Āēxgacŭ”, ñaxŭ. Rŭ narŭmemaē nixŭ i cunaxŭmatŭ rŭ ñacurŭgŭ:

“Nŭgŭ ixucŭ na Yudíugŭarŭ Āēxgacŭ yŭxŭ”, ñacurŭgŭ. 22 Natŭrŭ Piratu nanangāxŭ rŭ ñanagŭrŭ: —Ngēma chaxŭmatŭxŭ rŭ marŭ ngēxma naxŭmatŭ —ñanagŭrŭ. 23 Rŭ curuchawa marŭ Ngechuchuxŭ yapotagŭguwena ga churaragŭ, rŭ nanade ga Ngechuchuchiru. Rŭ yema āgŭmŭcŭ ga churaragŭ rŭ nŭgŭmañ nayatoye ga naxchiru. Rŭ nanayauxgŭ ta ga norŭ gáuxŭchiru ga

máxũ. Natürü taxuwama narüngèixte, yerü woetama yemaãcü naxü. ²⁴ Rû yemacèx ga yema churaragü rû nügümaã ñanagürügü: —¡Tãütáma nagu tagaugüe! Rû narümemaë nixĩ i naxcèx tá naxĩnücèxwèxegü rû ngĩxũ tañanagügü i wüxi i dĩëru na ngẽmawa nüxũ icuèxgüxücèx na texéarü tá na yĩxũ —ñanagürügü. Rû yemaãcü ningu ga Tupanaãrû ore ga umatüxũ ga ñaxũ:

“Nügümaã nayatoye i chauxchiru, rû naxcèx ngĩxũ tanañanagügü i wüxi i dĩëru”,

ñaxũ. Rû aixcüma yemaãcü nixĩ ga naxügüãxũ ga churaragü. ²⁵ Rû Ngechucharü curuchapünewa iyexma ga naë ga María, rû ngĩeyèx, rû María ga Creopá naxmèx, rû María ga Magadácũãx. ²⁶ Rû yexguma Ngechuchu naëxũ dèuxgu ga yexma chauxütagu na nachixũ, rû ñanagürü ngĩxũ: — Pa Mamax, yima nixĩ ya cune, —ñanagürü. ²⁷ Rû yemawena, rû ñanagürü choxũ: —Ngẽma iyixĩ i cue —ñanagürü. Rû yexgumamama rû chopatawa ngĩxũ chayaxu. Rû chauxütawa iyexmaëcha.

Nayu ga Ngechuchu

²⁸ Rû Ngechuchu nüxũ nacuèx ga marü na yanguxũ ga guxũma ga norü puracü ga ñoma ga naãnewa. Rû yema Tupanaãrû ore ga umatüxũ na yanguxèèxücèx, rû ñanagürü: —Chitawa —ñanagürü. ²⁹ Rû yéma iyexma ga wüxi ga tũxũãcü ga binu ga marü üxchiücümaã ããcuxcü. Rû wüxi ga tüèxmü guma binumaã niwaixèëgü, rû wüxi ga dexnemenèxãwa nayanèix. Rû yemamaã naãxgu nanawèxgü. ³⁰ Rû Ngechuchu nayaxaxü ga guma binu ga üxchiücü rû ñanagürü: —Marü ningu i

guxŭma i chorŭ puracŭ —ñanagŭrŭ. Rŭ ñuxŭchi inayarŭmaxãchieru, rŭ nayu.

Wŭxi ga churara rŭ wocaxemaã Ngechuchuxŭ nacanapacŭtŭxŭ

³¹ Natŭrŭ ga yema Yudŭgŭarŭ ãẽxgacŭgŭ rŭ tama nanaxwèxegŭ ga curuchagŭwa na nayexmagŭxŭ ga yema naxŭnegŭ. Yerŭ moxŭãcŭ rŭ ngŭxchigaarŭ ngunexŭ nixŭ. Rŭ yema Yudŭgŭcèx rŭ yema nixŭ ga guxŭ ga ngŭxchigaarŭ ngunexŭarŭ yexera ga ũnexŭ, yerŭ norŭ peta ga Ũpetŭchigaarŭ ũgŭ nixŭ. Rŭ yemacèx Piratuna naxcèx nacagŭ na churaragŭ yema namugŭxŭcèx na yapoyeparagŭãxŭcèx na paxa nayuexŭcèx ga yema curuchawa ipotagŭxŭ, rŭ paxa na nadeãxŭcèx ga curuchawa naxŭpa ga ngŭxchigaarŭ ngunexŭ. ³² Rŭ yema naxŭ ga churaragŭ rŭ inanapoeparagŭ ga yema taxre ga yatŭgŭ ga Ngechuchumaã yema curuchawa ipotagŭxŭ.

³³ Rŭ Ngechuchucèx naxŭ ga churaragŭ, natŭrŭ nŭxŭ nadaugŭ ga marŭ na nayuxŭ. Rŭ yemacèx tama nayapoyeparagŭ.

³⁴ Natŭrŭ wŭxi ga churara rŭ Ngechuchuxŭ nacanapacŭtŭxŭ. Rŭ yexgumatama inayèxŭchi ga nagŭ rŭ dexá. ³⁵ Rŭ choma i Cuáŭ rŭ nŭxŭ chadau i guxŭma ga ñaã pemaã nŭxŭ chixuxŭ. Rŭ aixcŭma nixŭ i ñaã chorŭ ore. Rŭ chomatama nŭxŭ chacuèx i aixcŭma na yŭxŭ, rŭ pemaã nŭxŭ chixu na pema rŭ ta peyaxŭgŭxŭcèx. ³⁶ Rŭ yema nangupetŭ na yanguxŭcèx i Tupanaarŭ ore i ũmatŭxŭ i ñaxŭ:

“Rŭ taxúnetáma ya naxchinèxã nipoyegŭ”,

ñaxŭ. ³⁷ Rŭ toxnamana i Tupanaãrŭ ore i ũmatŭxŭwa rŭ ñanagŭrŭ:
 “Tá nŭxŭ narŭdaunŭ ya yima nacana-
 pacŭtŭxŭgŭãcŭ”,
 ñanagŭrŭ.

Ngechuchuxŭ inatèxgŭ

(Mt 27.57-61; Mr 15.42-47; Lc 23.50-56)

³⁸ Rŭ nayexma ga wŭxi ga yatŭ ga Arimatéacŭãx ga Yúchegu ãegacŭ. Rŭ nŭma rŭ ta Ngechuchuaxŭ nayaxŭ, natŭrŭ cúãcŭ nayaxŭ yerŭ natanŭxŭ ga Yudíugŭarŭ ãëxgacŭgŭxŭ namuŭ. Rŭ guma nixŭ ga Piratuna yaçacŭ na nayauxãxŭcèx ga Ngechuchuxŭne. Rŭ Piratu rŭ: —Ngŭ, — ñanagŭrŭ. Rŭ yexguma ga Yúche rŭ yéma naxŭ ga curuchawa íyapotaxŭwa, rŭ curuchawa nayayaxu ga naxŭne ga Ngechuchu. ³⁹ Rŭ yéma nangu ga Nicodému ga ũpaacŭ chŭtacŭ Ngechuchuxŭtagu naxŭãnecŭ. Rŭ yéma nanange ga 30 kilo naguxŭ ga pumara ga yixichixŭ na Ngechuchuxŭ namaã nachaxŭnegŭxŭcèx. ⁴⁰ Rŭ yemaãcŭ ga Yúche rŭ Nicodému rŭ curuchawa nanayauxgŭ ga naxŭne ga Ngechuchu. Rŭ naxchiru ga marŭ pumarachaxŭmaã nayanáixpŭxŭgŭ. Yerŭ yema nixŭ ga tocŭma ga toma ga Yudíugŭ ga yexguma wŭxi ga yueta tŭxŭ itatèxgŭgu. ⁴¹ Rŭ yema nachica ga Ngechuchu curuchawa ípotaxŭwa nayexma ga wŭxi ga nanetŭnecŭ. Rŭ yema nanetŭnecŭwa nayexma ga wŭxi ga naxmaxŭ ga yexwacaxŭxŭ ga taguma texéxŭ nagu natèxgŭxŭ. ⁴² Rŭ yema naxmaxŭgu nayaxŭcuchigŭ ga Ngechuchuxŭne yerŭ nangaicama, rŭ paxa tá ningune ga ngŭxchigaarŭ ngunexŭcèx.

20

Ínarüda ga Ngechuchu (Mt 28.1-10; Mr 16.1-8; Lc 24.1-12)

¹ Rü yüxüarü pèxmamaxüchi ga tauta meã yangóonegu, rü María ga Magadácüãx rü Ngechuchuxü íyaxüchigüxüwa ixü. Rü nüxü idau ga guma nuta ga Ngechuchumaxü namaã rüngüxtaücü, rü marü na ínaxügachixü. ² Rü yexgumatama iifñaãchi, rü yema choma rü Chimáü ga Pedrumaã ítayexmagüxüwa iña. Rü ngïgürügü toxü: —Rü marü nanayauxgü ya Cori ya Ngechuchu i naxmaxüwa. Rü tama nüxü tacuèx na ngexta na naxügüãxü —ngïgürügü. ³ Rü yexguma ga choma rü Pedru rü Ngechuchuxü íyaxüchigüxüwa taxĩ. ⁴ Rü wüxigu itaxüãchi ga tomox, natürü ga choma rü poraãcü Pedruarü yexera ichañaãchi. Rü chaxira Ngechuchuxü íyaxüchixüwa changu. ⁵ Rü ichayarümaxãchi na nagu chidaucuchixücèx. Rü nüxü chadau ga naxchiru ga namaã yanáïxpüxügüãxü ga yexma na naxüxü. Natürü tama aixepegu chaxücu. ⁶ Rü choweamama ínangu ga Chimáü ga Pedru. Rü nüma rü yema naxmaxügu naxücu. Rü nüma rü ta nüxü nadau ga yema naxchiru ga namaã yanáïxpüxüchiréxü. ⁷ Rü nüxü nadau ta ga naxchiru ga namaã yanèïxèrugüãxü ga meãma dixcumüxü ga nüxrüguma üxü. Rü tama wüxigu namaã nanu ga yema naxchiru ga namaã yanáïxpüxügüãxü. ⁸ Rü yexguma ga choma ga chaxiraxüchi yéma na changuxü, rü choma rü ta chixücu. Rü nüxü chadau ga guxüma, rü chayaxõ ga Ngechuchu rü marü wena na namaxüxü.

⁹ Yerü noxri rü tama nüxŧ tacuèxgüéga ga yema Tupanaârü ore ga ümatüxŧ ga ñaxŧ:
 “Cristu rü tá wena namaxŧ”,
 ñaxŧ. ¹⁰ Rü yexguma ga toma rü tochiüçèx
 tawoegu.

*Ngechuchu rü ngïxcèx nangox ga María ga Mag-
 adácüãx*
 (Mt 16.9-11)

¹¹ Natürü ga María rü yexma irüxãüx naxŧtagu
 ga Ngechuchumaxŧ. Rü yéma ixaxu. Rü
 naxauxãcüma iyarümaxãchi, rü nagu iyadaucuchi
 ga naxmaxŧ. ¹² Rü nüxŧ idau ga taxre ga
 daxüçüãx ga Tupanaârü orearü ngeruŧgü ga
 icómüchiruxŧ. Rü Ngechuchuxŧne ixüchiréxŧwa
 narütogü, rü wüxi ga Ngechuchueru ixüxŧwaama
 rü to ga nacütawaama. ¹³ Rü yema daxüçüãx ga
 duŧxŧgü rü ngïxna nacagüe, rü ñanagürügü: —
 Pa Ngeçüx, çtacüçèx cuxaxu? —ñanagürügü. Rü
 ngïma rü inangãxŧ, rü ngïgürügü: —Chaxaxu
 erü nayangegü i naxŧne ya chorü Cori, rü tama
 nüxŧ chachuèx na ngexta naxügüãxŧ —ngïgürügü.
¹⁴ Rü yexgumatama yema ngïxgu, rü ngïgüweama
 idau. Rü nüxŧ idau ga Ngechuchu ga ngïxŧtawa
 na nayexmaxŧ. Natürü tama nüxŧ icuèx ga
 Ngechuchu na yïxŧ ga guma. ¹⁵ Rü yexguma
 ga Ngechuchu rü ngïxna naca, rü ñanagürü: —
 Pa Ngeçüx, çtacüçèx cuxaxu? çRü texécèx nixï i
 cudauxŧ? —ñanagürü. Rü ngïma nüxŧ nacuèxgu
 rü yema nixï ga yema nanetüneçüarü dauruŧ.
 Rü yemacèx ngïgürügü nüxŧ: —Pa Corix, ega
 cuma cuyangexgu i naxŧne ya Ngechuchu, rü
 çchomaã nüxŧ ixu na ngexta na cunaxüxŧ na

choma chayayaxuxúcèx! —ngĩgürügü. ¹⁶ Rũ yexguma ga Ngechuchu rũ ñanagürü ngĩxũ: —Pa Maríax —ñanagürü. Rũ ngĩma rũ naxcèx idaueguãchi, rũ togawa ngĩgürügü nüxũ: — Pa Rabunix —ngĩgürügü. Rũ ngẽma rũ “Pa Ngúexẽeruũx”, ñaxũchiga nixĩ. ¹⁷ Rũ Ngechuchu rũ ñanagürü ngĩxũ: —¡Tãxũ i choxũ quingõgũxũ, erũ tauta Chaunatũxõtawa chaxũ! ¡Natürü ngẽma chaueneẽgütanüwa naxũ rũ namaã nüxũ yarüxu na choma rũ tá Chaunatü ya chorü Tupana ya Penatü ya perü Tupanaxõtawa chaxũxũ! — ñanagürü. ¹⁸ Rũ yexguma ga María ga Magadácũãx rũ tomaã nüxũ iyarüxu ga marü nüxũ na nadauxũ ga Cori ga Ngechu-chu. Rũ ñuxũchi tomaã nüxũ iyaxu ga yema ore ga Ngechuchu ngĩmaã nüxũ ixuxũ.

*Norü ngúexũgücèx nangox ga Ngechuchu
(Mt 28.16-20; Mr 16.14-18; Lc 24.36-49)*

¹⁹ Rũ yema yüxüarü ngunexũärü chütacü, rũ tangutaquëxegü ga toma ga Ngechuchuarü ngúexũgü. Rũ togü tarüwãtaũgü, yerü yema Yudíugüarü ãëxgacügũxũ tamuũ. Rũ Ngechuchu rũ ngürüãchi yẽma nangox, rũ torü ngãxũtanügu nachi. Rũ toxũ narümoxẽ, rũ ñanagürü: — ¡Petaãëgü! —ñanagürü. ²⁰ Rũ yema ñaxguwena rũ toxũ nügü nawémẽx, rũ nügü inawépacütüxũ. Rũ tomagü ga norü ngúexũgü rũ tataãëgü, yerü nüxũ tadaugü ga guma torü Cori. ²¹ Rũ yexguma rũ wenaxãrũ ñanagürü toxũ: — ¡Petaãëgü! Rũ yema Chaunatü núma choxũ na muxürüũ tátama nixĩ i pexũ chamuxũ i chomax —ñanagürü. ²² Rũ yexguma rũ toétü “cue” ñanagürü ga Ngechuchu.

Rü ñuxũchi ñanagürü toxũ: —¡Penayauxgü i Tupanaãe i Üünexũ! ²³ Rü ngëxguma duũxũgü nüxũ rüxoegu i norü pecadugü, rü pema rü pexũ nangëxma i pora na namaã nüxũ pixuxũ na Tupana marü nüxũ nüxũ rüngümaxũ i norü pecadugü. Natürü ngëxguma duũxũgü tama nüxũ rüxoegu i norü pecadugü, rü pema rü pexũ nangëxma i pora na namaã nüxũ pixuxũ na marü ngëma norü pecadugüwatama nangëxmagüxũ — ñanagürü ga Ngechuchu.

Tumachi nüxũ nadau ga Cori ga wena maxũcü

²⁴ Natürü totanüxũ ga Tumachi ga Wüxigu Buexũmaã taxugüxũ, rü tama totanüwa nayexma ga yexguma Ngechuchu toxcèx ngoxgu. ²⁵ Rü yixcama ga toma rü Tumachimaã nüxũ tixugüe, rü ñatarügügü: —Marü nüxũ tadau ya tórü Cori ya Ngechuchu —ñatarügügü. Natürü ga Tumachi rü toxũ nangãxũ rü ñanagürü: —Ngëxguma tama nüxũ chadèuxgu i norü itapuamaxũ i naxmëxwa rü tama nüxũ chingögügu i ngëma itapuamaxũ rü ngëma norü cana-pacütüxũ, rü täütáma chayaxõ i ngëma ore i chomaã nüxũ pixuxũ —ñanagürü. ²⁶ Rü 8 ga ngunexũguwena rü wenaxârü tangutaquëxegü ga toma ga wüxi ga İpatawa. Rü totanüwa nayexma ga Tumachi ga yexguma. Rü woo ga na nawãtaxũ ga ñãx, rü ngürüãchi yéma nangox ga Ngechuchu, rü torü ngãxũtanügu nachi. Rü toxũ narümoxë, rü ñanagürü: —¡Petaãëgü! —ñanagürü. ²⁷ Rü yexguma Tumachixũ ñanagürü ga Ngechuchu: —¡Nüxũ ingögü i ñaã chorü itapuamaxũ i choxmëxwa ngëxmaxũ, rü nüxũ nadau ya daa choxmëx!

¡Rü nuxa chorü canapacütüxügu ingögü! ¡Rü nüxü rüxo na tama cuyaxõxü! ¡Rü meãma yaxõ i ñuxmax! —ñanagürü. ²⁸ Rü yexguma ga Tumachi rü Ngechuchuxü nangãxü, rü ñanagürü: —Pa Chorü Corix, cuma nixĩ i chorü Tupana quiixü —ñanagürü. ²⁹ Rü Ngechuchu rü ñanagürü nüxü: —Pa Tumachix, cuma cuyaxõ i ñuxma erü choxü cudau. Natürü tataãëgü ya yíxema tama choxü daugüãcüma yaxõgüxe —ñanagürü.

Tacüçèx naxümatü i ñãã popera

³⁰ Rü Ngechuchu rü topëxewa nanaxü ga muxüma ga to ga mexügu ga cuëxruügu i tama ñãã poperagu ümatüxü. ³¹ Natürü guxüma i ñãã poperagu ümatüxü, rü naxümatü na peyaxõgüxüçèx na Ngechuchu rü Cristu ya Tupana Nane na yíxü. Rü ngëxguma nüxü peyaxõgügu rü tá pexü nangëxma i maxü i taguma gúxü.

21

Ngechuchu rü 7 ga norü ngüexügüçèx nangox

¹ Rü yemawena ga Ngechuchu rü wenaxãrü toxcèx nangox naxtaxa ga Gariréaanacüwa. Rü Tibéria nixĩ ga to ga naega. Rü ñããcü nixĩ ga toxcèx nangóxü. ² Rü wüxiwa tayexmagü ga choma rü Chaütiágu ga Zebedeu nanegü rü Chimáü ga Pedru, rü Tumachi ga Wüxigu Buexümaã taxugüxü, rü Natanae ga Gariréaanegune ga ñãne ga Canácüãx, rü to ga taxre ga tomücügü ga Ngechuchuarü ngüexügü. ³ Rü Chimáü ga Pedru rü ñanagürü toxü: —Tá chayapüchae —ñanagürü. Rü yexguma ga toma rü tanangãxügü,

rü ñatarügügü nüxũ: —Toma rü tá ta cuwe tarüxĩ —ñatarügügü. Rũ yéma taxĩ, rü wüxi ga ngegu tichoũ. Natürü yema chütaxũgu rü taxuũma ga choxni tiyauxgü. ⁴ Rũ yexguma noxri yangóonegu rü Ngechuchu toxçèx nangox ga naxtaxaanacüwa. Natürü ga toma rü tama nüxũ tacuèxgü ga Ngechuchu na yĩxũ. ⁵ Rũ yexguma ga Ngechuchu rü toxna naca, rü ñanagürü toxũ: —Pa Ngextüxcügüx, ¿éxna taxuũma i choxni piyauxgü? —ñanagürü. Rũ toma rü tanangãxũgü rü ñatarügügü: —Taxuũma —ñatarügügü. ⁶ Rũ yexguma ga Ngechuchu rü ñanagürü toxũ: —¡Peweũärü tügünecüwawaama penatáe i perü pücha! rü tá ípenayauxũ i choxni —ñanagürü. Rũ yémaãma tanatægü ga torü pücha, rü taxucürüwa ítanatúãchigü, yerü muxũchixũ ga choxni tiyauxgü. ⁷ Rũ yexguma ga choma rü Pedruxũ ñacharügü: —Yima nixĩ ya Cori ya Ngechuchu —ñacharügü. Rũ yexguma yemaxũ naxĩnügu ga Pedru ga guma na yĩxũ ga Cori, rü nicuxcuchi ga naxchiru yerü noxri rü ínacuxuchichirèx. Rũ natüchiüwa nayuxu, rü naxãnacüwa naxçèx nawèxè. ⁸ Rũ toma ga natanüxũ rü nguemaãtama naxãnacüwa taxãgü. Rũ yéma tanatügü ga yema pücha ga choxnimaã ããcuxũ yerü 100 metruxicatama nataxu ga na naxãnacüwa na tangugüxũ. ⁹ Rũ yexguma nguewa ítachoũgu rü yéma nüxũ tadau ga wüxi ga üxü, rü naxètügu naxü ga wüxi ga choxni. Rũ yéma nayexma ta ga wüxi ga pãũ. ¹⁰ Rũ Ngechuchu rü ñanagürü toxũ: —¡Nuãta penge i ñuxre i ngẽma choxni i ípeyauxũxũ! —ñanagürü. ¹¹ Rũ Chimáũ ga Pedru rü ngegu nixüe. Rũ

yema püchamaã naxnücügu ínanatúãchiwetaũ ga choxni ga ínayauxũxũ. Rũ 153 ga choxni ga itaxũ nayexma nawa ga yema pücha. Rũ woo ga na namuxũchixũ, rũ tama narügáu ga pücha. ¹² Rũ yexguma ga Ngechuchu rũ ñanagürü toxũ: —¡Nuã pexĩ rũ peyachibüe! —ñanagürü. Rũ taxúema ga toma rũ nüxna tacaxchaũ na texé yĩxũ ga nümax, yerü marü nüxũ tacuèxgü ga guma na yĩxũ ga Cori ga Ngechuchu. ¹³ Rũ yexguma ga Ngechuchu rũ yéma toxütawa naxũ. Rũ nanayaxu ga pãũ rũ wüxichigü toxna nanaxã. Rũ yexgumarüũ ta ga choxni rũ toxna nanaxã. ¹⁴ Rũ yema nixĩ ga norü tomaẽxpüxcüna ga toxcèx na nangóxũ ga Ngechuchu ga yuwa ínadaaxguwena.

Ngechuchu rũ Pedrumaã nidexa

¹⁵ Rũ yexguma chibüewa tingugüguwena rũ Ngechuchu rũ Chimáũ ga Pedruna naca, rũ ñanagürü: —Pa Chimáũ Pa Cuáũ Nanex, ¿aixcüma choxũ cungechaũxũ i ñãã cumücügüxũ na cungechaũxũãrũ yexera? —ñanagürü. Rũ Pedru nanangãxũ, rũ ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rũ Ngechuchu rũ ñanagürü nüxũ: —¡Nachibüexẽẽ i chorü duũxügü! —ñanagürü. ¹⁶ Rũ wenaxãrũ Pedruna naca, rũ ñanagürü: —Pa Chimáũ Pa Yoná Nanex, ¿aixcüma i choxũ cungechaũxũ? —ñanagürü. Rũ Pedru nanangãxũ, rũ ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rũ Ngechuchu rũ ñanagürü nüxũ: —Ëcü, ¡nüxna nadau i chorü duũxügü! —ñanagürü. ¹⁷ Rũ norü tomaẽxpüxcüna wenama Pedruna naca, rũ ñanagürü: —Pa Chimáũ

Pa Yoná Nanex, ¿aixcūmaxũchi yĩxũ i choxũ cungechaũxũ? —ñanagürü. Rũ yexguma ga Pedru rũ düxwa nangechaũ, yerü norü tomaẽxpũxcūna Ngechuchu nũxna naca ngoxi aixcūma nũxũ nangechaũ. Rũ ñanagürü ga Pedru: —Pa Corix, cuma nũxũ cucuèx i guxũma. Rũ cuma nũxũ cucuèx na aixcūmaxũchi cuxũ changechaũxũ —ñanagürü. Rũ Ngechuchu ñanagürü nũxũ: —Ëcü ¡nachibüexẽẽ i chorü duũxũgü! ¹⁸ — Rũ aixcūma cumaã nũxũ chixu rũ yexguma cungextũxũgu rũ cugü quicuxcuchi ga na ngextá cuma ícunaxwèxexũwa cuxũxũcèx. Natürü ngẽxguma yaguãx quixĩgu rũ tá quixuuchichacüü na togue cuxũ ícuxcuchixũcèx. Rũ ngẽma tama cuma ícunaxwèxexũwa tá cuxũ nagagü —ñanagürü. ¹⁹ Rũ Ngechuchu rũ yema ñanagürü na nũxũ nũxũ nacuèxẽẽxũcèx ga ñuxãcü tá na nayuxũ ga Pedru na yemaãcü Tupanaxũ nataxẽẽxũcèx. Rũ yemawena ga Ngechuchu rũ ñanagürü nũxũ: —¡Chowe rüxũ! —ñanagürü.

Yema ngüexũ ga Ngechuchu poraãcü nũxũ ngechaũxũchiga

²⁰ Rũ yexguma nügüweama nadèuxgu ga Pedru rũ choxũ nadau ga naweama na ne chaxũxũ. Rũ chomachirẽx nixĩ ga chibüwa Ngechuchucüwawa charüttoxũ rũ nũxna chaçaxũ rũ ñachaxũ:

“Pa Corix, ¿texé tá tixĩ ya yíxema bexma cuechita cuxũ íxuaxũxẽ?” ñachaxũ. ²¹ Rũ yexguma Pedru choxũ dèuxgu rũ Ngechuchuna naca, rũ ñanagürü: —Pa Corix, ¿ñaã Cuáũ rũ tacü tá nũxũ üpetũxũ? —ñanagürü. ²² Rũ Ngechuchu nanangãxũ, rũ ñanagürü nũxũ: —Ngẽxguma

choma chanaxwèxegu rü chanamaxêê ñuxmatáta wena núma chaxũ. ¿Rü tüxcüxũ i nagu curüxĩnũxũ i ngema? Rü cuma jrü chowe rüxũ! —ñanagürü. ²³ Rü yexguma yema chomücügü nüxũ ñnüêgu ga yema chauchiga, rü nagu narüxĩnüe na taxütáma chayuxũ. Natürü Ngechuchu rü tama nüxũ nixu ga táxütáma na chayuxũ. Natürü ñanagürümare:

“Ngêxguma choma chanaxwèxegu rü chanamaxêê ñuxmatáta wena núma chaxũ. ¿Rü tüxcüxũ i nagu curüxĩnũxũ i ngêma?”, ñanagürümare. ²⁴ Rü chomatama nixĩ ga nüxũ chadauxũ i guxũma i ñaã pemaã nüxũ chixuxũ, rü chomatama nixĩ i pexcèx chanaxümatüxũ i ñaã ore. Rü guxãma i toma rü nüxũ tacüx na aixcüma na yĩxũ i ñaã pemaã nüxũ chixuxũ. ²⁵ Rü nayexma ga to ga muxũchixũma ga tacü ga Ngechuchu üxũ. Rü ngêxguma chi naxümatügu i guxũma ga yema naxüüchiga, rü nagu charüxĩnügu rü tâũ chima ñoma i naãnegu name i ngêma poperagü i nachiga ümatüxũ.

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

9d5dc22a-30be-5d26-85a9-76047f4c89e6